

BWÀKABUULWIBWÀ,

NSHAPITÀ MWINÂYÌ CITUPÀ III



Twasàkidila Mwanèètù Neville. Mukalenge àkubènèshè peebe. Ne mwoyi wènú awu mu dindà emu, nwènú kàlaasà kàà Bible. Kàdi bantu bônso bàdi bàdyùmvwakù bìshi mu dindà emu? Ndi ntèkemenà ne, mbîmpè. Amen. Tudi bu... eci cìvwa bu dimanyisha dya cintùluntùlu ditùdi benzè pa kwamba ne tuvwa mwà kwikala kaaba aka mu dindà emu, bwalu ncìvwa ne... mwanjì kulongolola ndongamu wa lwendu pa bìdi bitàngilà dîbà dîmvwà ne cyà kuumuka to. Nènku bu mùdibi mpindyewu ne byàtèèkiibu bwà mu ngondo yisambòmbò yidì yìlondà eyi, èè, dîbà adi, mémè kwela meeji ne bìvwa bìmpè bu twètù mwà kwenza disangisha mu dindà emu bwalu nekùpitè cikondo kumpàlà kwa mémè kwalukila cyàkàbìdi, bwà ku dyànyì dimanya; pàmwápa mu movù wà mabèji àpòòpoka ewu.

² Nènku nêngìikalè...netùumukè mpindyewu lumingu lùlwalwà elu bwà kuya ku Beaumont, mu Texas, mutwìkalà mwà kubangila mwòmò amu lumingu lùlwalwà elu bwà kwenza masangisha a matùkù mwandamukùlù anyì dikùmi kuntwaku ne nsangilu wa—wa bisùmbù bidìkàdìle ne èkèleeziyà mishiishìilàngàne. Mmatùùdila mfrangà cyà bushùwà kùdì èkèleeziyà yà *Dîna Dya Yesù* mu Beaumont, mu Texas, mutwàkenzà masangisha manène awu kùkaadi cikondo kampànda, ànu dyàkàmwè paanyimà pàà fòtò ewu mukwàciibwe. Nènku bòbò...Ndi mumanyè ne bààkalwa ne dikaadika kuntwaku ne, ngeela meeji, màkaadikà makùmi àbìdì ne mwandamutekètè...anyì kàwulù kiikàle ne màkaadikà makùmi àbìdì ne mwandamutekètè, kààkalwà ku masangisha à ku Beaumont awu. Kwòkò aku nkwaàkenzà mulombodì wa cimenga lwendu lwà mîndòlòlooci ne kuya mu misèsèsù, ne bônso abu. Twàkapìcila mu cikondo cyà dicyònkòmòka mu Beaumont, ne tudì tukwàlukila lumingu lùlwalwà elu. Ne pashiishe tuvwa beelè meeji bwà mu San Antonio, kàdi katwàkwikala ne dîbà dikùmbàne bwà aku to, ambà ànu mu dipingana's.

³ Nènku tudì tuumuka aku tuya ku Phoenix, ku Los Angeles, too ne ku Long Beach. Ne pashiishe twalukila, bu Mukalenge mwà kwanyisha, twalukila ku Côte Est, twalukila tukabwela mu Virginie ne mu Caroline du Sud. Kwalukila dîbà adi kuya ku Bloomington, mu Illinois. Ne tuumuka aku tuya ku Lane Tech High School, lumingu lwà ndekeelu lwà ngondo mwinâyì, kùdì Beena Kilistò bàà kantu-ku-byanza. Ne pashiishe nguumuka aku nya ku Colombie Britannique wa ku nord, mutàngile ku Alaska, ne nshàalakù too ne ku ngondo mwisambòmbò.

Nènku, díbà adi, tudi batèkèmène ne netùpicilè mu cikondo cyà dicyònkomoka.

4 Mwikàle nsambila díbà adi bwà ne dikenketa dyà . . .kùdi beena cibambalu cyà bitàdi dindì mupicile kùkàadi cikondo kampàndà, pa bìdi bitàngilà èkèleeziyà ewu, ní dyàjikakù pa diine díbà adi. Nènku pashiishe netwikalè . . .Nèngiikalè mwà kuya dyàmwàmwà dyà mbù díbà adi byòbi nàнку, mu ngondo mwisambòmbò amu mene, cìikalè cikondo cimpè bwà Àfrikè; bwà ngondo mwisambòmbò, wa mwandamutekète, ne wa mwandamukùlù, mu—mu Àfrikè. Pa nàнку ncyà bushùwà ne ndi dijinga ne masambila ènù.

5 Kàdi tudi bindile dilwa dyà Mukalenge. Bintu byònsò ebi bìdi ne “cyòci ciikàle diswa dyà Mukalenge,” nwamònu’s. Katwèna bamanyè to, Yèyè mmufwànyine . . .Byòbi ebi kabyèna ànu bulombodi menemene to, tudi ànu basangishe mabiikila ònsò awu ne basambile pa bwalu abu, bakonkè Mukalenge ne: “Njila kaayi udi ukèngela twètù kuya?” Ne—ne mbimwèke bu ne, díbà adi, ncyèna ncilekela bwà kwikalaci bwànyì nkààyaanyì to, ndi ndekela bwà bakwàbò kwelanganabò pààbò meeji pa bwalu abu, ne kucisambidila. Ki díbà adi kumwèkabi bu ne twètù bònsò kwenza bu tudyùmva balombòdibwe bwà kuya batàngile ku wesètè, ku sud ne ku wesètè mùsangu ewu. Pa nàнку díbà adi tuvwa ne mabiikila a ku myaba yònsò, pa nàнку twètù kupweka buludì. Nènku mwaba wà kumpalà wùvwà mumfikile ku mwoyi wùvwà anyì Beaumont anyì San Antonio. Ki twètù kutàngila, nènku tuvwa ne mabiikila a ku myaba yònsò yìbìdi ayi. Nènku . . .

6 Twètù kubiikila umwe mu Beaumont. Ne bu mùvwàbò ne èkèleeziyà makùmi ànaayi ne yìbìdi yìkwàcishangana mu mùdimu, yà beena Mpenta Basanga ne bikwàbò, twètù kwela meeji ne ne dibàlaasà dinènè dimwèpelè bivwa bifwànyine kwikala bìmpè bwà twètù kubàpèèsha matùkù matwè ku dikùmi pamutù pàà kufila àtaanu pa kaaba àtaanu pa kaaba ne kaaba. Ndi mèmè ngeela meeji ne nwènù babitèèke pàmwè mùshindù awu mbitàmbe bwìmpè. Pashiishe, kùdi bantu mu—mu lukèngelu bùngì cyanààná bàà mu myaba yònsò mu Beaumont ne mu citùpà cyà pitùloolù cyà mu Texas mwàmwa, ne pa nàнку tudi batèkèmène cikondo cyà dicyònkomoka mu Beaumont.

7 Nènku, mpindyewu, kacya katùtukù tuteeta bwà kuya kùdi maasantalà manène ne myaba minène nànsha. Kàdi tudi tuteeta kuya mùdi Mukalenge muswè kutùlombola bwà kuya amu, nànsha ciikàle cikesè anyì cinène bìshi, cidi m’Mukalenge udi ulombola. Mpindyewu, díbà kanà dyònsò, Yèyè mmufwànyine kutùpèèsha dibìikila dyà beena *Màkèdooniyà* adi ne tudi bafwànyine kushiya budimi bwà bwambi díbà kanà dyònsò bwà cyònsò cidiYe mufwànyine kutùbìikidila bwà kwenza aci, ní mpenyi pònsò.

⁸ Ne ncyà bushùwà ne tudi basànkile cikondo cyà bwobùmwe eci banyungùlùkile Dìyi dyà Nzambi pàmwe neenù bantu balenga aba. Ndi mutwishùbwe ne nenwikalè ne lulamatu mpindyewu ne nenùlwe mu èkèleeziyà ne nenùtumikilè malongesha a Bible a kùdi mwanèètù wa bukìtù ewu, Mwanèètù Neville, ùndi nnùshùila ne mwoyi mujimà bu musadidi wa Mukalenge Nzambi, ne mwikalè ùtàmba kuya mu ndòndò ne Nzambi, ne mèmè ndi ne disànkà dyàbùngi bwà cyôci aci.

⁹ Nènku nwènù èkèleeziyà mukesè ewu, ndi nnùbela ne munu ku dísù mu Dinà dyà Mukalenge Yesù bwà nùkolè mu ngàsà wa Nzambi, nwikalè biimàne kamungùlù ne batàngile díbà dyònsò ànu ku Kàlvariyò, nuumusha miji yònsò yà bululu mu mwoyi wènù ne musùkà wènù, bwà Nzambi wàmòna mwà kukwàta neenù mudimu díbà kanà dyònsò. Wèwèkù umvwa bwà kwenza cintu kampànda, anyi dibuulula anyi cintu kampànda cìlwa kùdi mu mùshindù wà pabwàwù, cintu kampànda cyà didimwijangana anyi cintu kampànda, wadimuka! Sàtaanà ùdi ne budimù ne malambàkànyi ne mwèndè mwònsò. Nwamònu anyi? Ucitèekè pàmwe ne Dìyi dyà Nzambi ne ùkonkè mpaasàta webè. Nwamònu anyi?

¹⁰ Nènku nudi nusangana mapà ne bikwàbò bìvùlangana mu èkèleeziyà, ne dikwàtá dyà mudimu dyà miinè mapà awu. Kumpalà kwà nwènù kuàlekela àkwàta mudimu ne bikwàbò, dyàmbedi...Umvwa bikucincimika mu mwoyi webè...Mpindyewu, mwena lukunà ùdi ne malambàkànyi a dikèma. Nwamònu anyi? Nènku aci ki citù ànu cìpandulula maèkèleeziyà musangu wònsò, ndipà dilelèlè dikwata naadi mudimu bibi. Nwamònu anyi? Cintu kampànda cidi Nzambi ùteeta bwà kwenza, kàdi cìkwàta mudimu bibi, neciikalè ànu—neciikalè ànu...Kaciyi ànu cìkwenzela wèwè bibi to, kadi necìpandululè èkèleeziyà yònsò nkòong. Nwamònu anyi? Cìkenkètaayi, nucìpicishila mu Bible misangu ne misangu, pashiishe nùcyèlè ku diteeta bwà kumòna ní n’Nzambi anyi to. Nùtungunukè ànu ne kuciteeta ne kucìpima, bwà kumòna ní ncipwàngàne misangu yònsò ne cikùmbànàngàne ne Dìyi. Díbà adi nudi mu bulelèlè, nwamònu’s.

¹¹ Pàdi ànu Dìyi dyambè ne neciikalè kaaba aka, cìkwàta mudimu mu mùshindù kampànda ewu, shàálaayi ànu naaci. Kanùseesukukù to, cidi ní nganyi ní nganyi wènza, nànsha cimwèka cilelèlè bìshi. Cyôci kaciyi cidìleeja mu Mifundu kuumukila ku Genèsè too ne ku Bwàkabuulwibwà, cilekèlaayi. Kanùnàyikù ne mudilu to, tudi mu matùkù a ndekeelu mùdi Sàtaanà mwikalè ànu ùseeswishangana ne mwèndè mwònsò.

¹² Mfwilaayikù luse pìikalàbi ne ndi nteeta kwangata kaaba kàà sheefù; mèmè ncyènàku sheefù to. Kàdi ndi ndyùmvwa bwènù nwènù ànu bu mwàkambà Pòlò kale wàwa bwà dyèndè disangisha musangu kampànda ne: “Nudi mitootò ku cifulu cyànyi cyà butùmbi.” Pàngiikalà musabùke muyè mu buloba

bwà luseke lukwàbò lwàlwa mwàmwa, ne mukatwilàngàne neenù mu ngiikàdilu mutùmbishiiibwe awu, ndi muswè bwà nwikalè biimàne mwab'awu bwà kukenka bu mitootò ku cifulu cyànyì cyà butùmbi. Nwamònu anyì? Ne ndi—ndi muswè bwà nwikalèmu, ndi muswè ngiikalèmu.

13 Ne ndi mvùluka mu cikèènà-kumònà cyànyì pàngààkamònà Bwikadi bwà Mukalenge, anyì bantu Bèndè mu Buloba bwà butùmbi mwàmwa, mèmè kukènzakana, kubàmbila... Ki kungambilabò ne Yèyè neàndumbùlwishè mèmè dyàmbedi ku Èvànjeeliyò ùndi nyiisha awu. Mèmè kwamba ne: “Ànu menemene mwàkaMuyiishà Pólò amu!”

14 Ki miliyò yà bantu ayi kwelabò lubilà lukolè ne: “Pa cyòci aci mpatùdi biimànyine!” Nwamònu anyì? Nwamònu's. Mpindyewu, ndi muswè bwà biikalè nàнку. Nènku netùkatwilàngànèmu dîngà ditùkù.

15 Nènku Nzambi kàtukù mutùtùme mèmè ne Mwanèètù Neville bwà kwikala baasheefù to, nànsha kakesè. Tudi ànu bânà bèenù cyanàànà, nudi numòna's, bafidi bàà malongesha mu Èvànjeeliyò. Pa nàнку tùkwatàayi bônso mudimu pàmwè.

16 Ne musangu kampànda bu—bu cintu kampànda cidi cikwàta mudimu cyòci—cyòci cikonkolojiibwa anyì—anyì bambà cintu kampànda bwàci, bacitàndishe anyì cintu kampànda cyà mùshindù awu, kàdi muntu udi ne dipà adi ùcibènga, vùlukàayi ànu ne... ùcibènga, vùlukàayi ne, dipà adi kî ndijaalàme to. Kacivwa Nzambi to ànu kwònsò aku. Nyumà wa Nzambi ùtu misangu yònsò ànu muswè bwà kulongolodiibwa, wa kalolo ne mudipwekèshe, ne budiswile. Nwamònu's. Cyòci cijuukila kuulu cyàmba ne: “Nèncyènzè nànsha bishi,” nudi bamanyè mùtù misangu mikwàbò... Vùlukàayi ànu ne, nyumà yà dyambu kayìtu yà kùdi Nzambi to. Nwamònu anyì? Pa nàнку bwà cinyì kwangata mupinganyi pàdi bintu byònsò, buloba bujimà, bùle tètè ne Butùmbi bwà Nzambi, nudi numòna's, bukolè bwà cyà bushùwà bwà Nzambi. Tudi baswè kwangata cipinganyi bwà cinyì? Dìbà dikaadi dipite bikolè mu ditùkù mpindyewu; kàdi, vùlukàayi ne, Bible mmwambè ne yèyè nealwe bu... ànu ne budimù ne mwèndè mwònsò, ne mufwànyine kuseeswisha ne Basungula mene bu byòbì mwà kwenzeka. Nwamònu anyì?

17 Nènku, mpindyewu, mîngà misangu tutu tudyàmbidila mutùdi Basungula, ne ndi ntèkemena ne ki citùdi, kàdi tùshaalàayi ànu buludì ne Bible. Ne dìbà adi maalu ónsò ówò miikàle makùmbànàngàne ne Mifùndu, mu bulongàmè mu Mifùndu, biikàle bifila butùmbi kùdi Nzambi ne luumù lwà èkèleeziyà, ne bikwàbò, dìbà adi tudi tumanya ne mbyà kùdi Nzambi bwalu Bible ùdi ùbitwa nyama ku mikòlò. Kàdi kî ng' ànu dilongesha dyètù dikwàtakaja dyàcitwà nyama ku mikòlò to, kadyàkwikala ne dikwàcisha to, cidi cikatuuta kwà cyanàànà.

18 Pa nàнку díbà adi cintu kampànda cyôci citùlengè, nànsha cyôci cimwèka cilelèlè bishi, cyôci kaciyi cijaalàme, kaciyi cyà mu Mifùndu to, ùcyùmùshè ànu mpindyewu mene; bwalu kùdi—kùdi Cyà cilelèlè cindile, nudi numòna's.

19 Pa nàнку, sambilaayi mpindyewu. Ne misangu yònsò, ne cyònsò cinùkènji, nsambidilaayi. Nùnsambidilaayikù bwalu tuyàaya mpindyewu mu madimi a bwambi bwà misangu yà ndekeelu, bwà ku wanyì mmwènenu. Tukàadi mpindyewu tuya . . .

20 Nènku, vùlukàayi ne, bintu binènè bìdi munkaci mwà kwenzeka, kî mbimanya munkaci mwà bàà pa buloba to. Yesù wàkalwa, kwikala ne mwoyi, kufwà, kufidiibwa bu mulàmbù, kwalukila mu Butùmbi, kàdi miliyò yà bantu kabàakamanya bwalu nànsha bùmwè to. Nwamònu anyi? Kî ncyà tuyaayi tükamòne, cinène, cyà ciyè ne mwà nàka to; cidi ne “Yèyè wàkalwa kùdi bàà Kwàbò Sungasunga,” nwamònu's. Nènku . . . “Ewu udi ne maci, ùmwè cidi Nyumà wàmbila maèkèleeziyà.” Kî nkùdi bàà pambèlu to, “nkùdi Èkèleeziyà.” Èkèleeziyà ngudi upeta dinyùkushiibwa Dyèndè.

21 Kale wàwa mvwa ngeela meeji bishiilàngàne ne aci too ne pàakalwàYe kwakula naanyi dīngà ditùkù; kungambilayè bwà mèmè kwalukila mu Dīyì ne kwela meeji mùvwà baprófètà bònsò bambè bwà pàakalwà Yone, ne: “Myaba mitùmbùke neyìpwekeshiibwè, ne myaba mipwekéle neyìbandishiibwè.” Ne mùvwà bukòlè bwà Nzambi mwà kukwàta mudimu! Nènku kùdi—kùdi . . . “Mikùnà yònsò neyitupikè bu twànà twà mikòòkò, ne mabèji à micì neàtuutè bikàshì.” Èè, aci's cìwva cyùmvwika ànu bu ne bushùwà cintu kampànda necyènzekè's. Nwamònu anyi? Kàdi pààkenzekàci, cyàkenzekà ncinyi? Mulùmyànà mukùlumpè kupàtukayè mu cipèèlà, pàmwàpa ne mwedi mutòlòke ku cibàngà kwònsò ne mudijìngìle cipese cyà cisèbà cyà mùkòòkò. Kakùvwakù nsòmbelu wa dicyankama nànsha dikèsè ne cipèèlà amu to. Ùwva ùsanganyiibwamù kacya pàcìvwàye ne bidimu citèemà, ne ùkaavwa ne bidimu makùmi àsatù díbà adi. Kupàtukayè mu cipèèlà amu, wènda útwa mikùma, ùyiisha kanyinganyinga, mwimàne mu bitoci bimufikè too ne mu binù, pàmwàpa, ku mwelelu wà Yadènè aku. Nènku ki pàakapwekeshiibwà myaba mitùmbùke ne myaba mipwekéle kubàndishiibwayi mpòpò apu. Nwamònu anyi? Bìdi . . .

22 Bìkèngela wikalè ne ngumvwilù wa nyumà. Vùlukàayi ne, kacya Nzambi kàtukù mwanjì kusòmbela ne kàadyàkusòmbelakù, pa buloba apa, mu dibàlakana to. Yèyè ùtu ùbèngangana naaci. Yèyè kàadyàkucyènzakù to . . . Mayiisha manène kàadyàkwikalakù a “kwenza *cikampànda* ne *cikansan-* . . . cyà cinènaanènàalè” to. Kacyèna cyèna mùshindù awu nànsha. Basadidi Bèndè kabàtu bàkwata mudimu mu

mùshindù awu to. Dyèndè dibàlakana ne butùmbì bìdi byà kuulu.

²³ Makèèlèlè awu, anyi kùkaadi matùkù àbìdi, biikàle tuya ku Kentucky, mu Kentucky ne mulundà wanyì mwimpè, Mwanèètù Banks Wood, kùvwa mpùlushì mukàji mwimàne mwaba awu, ki mwanèètù kwambayè ne: “Mulùmýànà, mbìmpè tùtekeshe lubilu,” yèyè ne, “mukàji wàwa’s mmushilè wa biyooyi.”

²⁴ Ki mémè ne: “Èyo, ncyà bushùwà.” Mémè ne: “Pàdi ditùngà dikafika mu mùshindù wà miliyô yà bantu kayìyi ku mudimu kàdi bikèngela bwà bóbò kwangata bantu bakàji, kubàvwija bampùlushì ne kubàtùma mwaba wàwa, ne bendeshi bàà tàksí ne bintu byà mùshindù awu, s’ndimwè dyà makeji a bukooyà manène pa ditùngà dyètù’s.” Mukàji kènàku ne cyà dyenza mwaba awu to ànu mùdi—mùdi kàlulù kakàyi ne cyà dyenza mu mbidikà, wa màfutà. Nwamònu anyi? Awu kawènaku—kawènaku—mwaba wèndè to. Ki mémè kwamba ne: “Kale wàwa cìvwa cìntácisha bikolè mu lungènyi, kàdi bwà mpindyewu ndi mubangè kuvùluka ne: ‘Mòna’s, kabyèna bikèmesha to, ebu kí—ebu kí mbukalenge bwètù twètù to, katwèna bàà pa buloba ebu to.’” Bàdi ne. . . nwènù. . .

²⁵ Bwà cinyì bakàji (bakàji bèètù twètù) kabèèna—kabèèna ne nsukì mípi, ne bàlaaba bilaabu, ne bàja maja a bidùndadùnda, ne bintu byònsò ebi? Mòna’s, bantu bàtu bàya ku èkèleeziyà yà ciibidilu eyi ne bikwàbò, beela meeji ne: “Bìdi ànu bìmpè.” Mbwà cinyi? Cìdi. . . bóbò—bóbò mbeena Àmèrikè; bóbò kweena Àmèrikè, bàdi ne nyumà wa cyena Àmèrikè. Twètù katwèna beena Àmèrikè to, tudi beena Kilistò. Tudi basòmbele. . . nyumà wetù ngwa ku Bukalenge bukwàbò. Bu ne nyumà wetù ùvwa wa mu bukalenge ebu díbà adi’s nùнку tudi tukuukwila ne bintu ebi, díbà adi nùнку tudi tukuukwila misambu yònsò yà ciipanshì ne tukuukwila bìdùndadùnda byònsò ebi. “Mwaba wùdi mwoyi wèbè, ngùdì mabanji èbè.” Kàdi ètù mabanji àdi kuulu. Pa nàнку ki bwà cinyì twètù tuyàaya ku Bukalenge kampànda.

²⁶ Apa kí nkwtètù to, tudi ànu banji kusòmbelapù pèètù cyanààna tuteeta bwà kupàtula beena—mwàbò bakwàbò mu midimà. Nèнку ndi mbwela mu cimenga kampànda pàmwàpa ngenza kàmpanyè kàà cimenga cijimà, ntàpangana ànu ne cisuku munda mwà lumingu lujimà ànyì matùkù dikùmì, bwà kupàtulamù musùùkà wùmwèpelè wà musinga mukolè; wùmwèpelè, ànu wùmwèpelè wùdi wùsanganyiibwàmù awu.

²⁷ Wèwè udi mufwànyine kwamba ne: “Masangisha awu àvwa matuutè dyàkalenga dinène be, binunu bitaanu bìvwa bilwè ku cyoshelu”; nkufwànyine kwikala kakùyì muntu musùngidìibwe nànsha umwe to, nànsha umwe wa kùdìbo aku. Nwamònu anyi? Ne nkufwànyine kwikala. . . Udi mufwànyine kwela meeji mwaba awu ne: “Ànu bantu bàbìdi mbààkalwà ku cyoshelu”; kàdi umwe wa kùdìbo guvwa mufwànyine kwikala dibwe

dyà mushinga mukolè. Tudi ànu twela cyanàànà bukòndò mu kasulù. Nzambi ngudi ukwàta mishipa, Yèyè ngudi mumanyè ne mushipa ngwèpì ne cìdì kacìyi mushipa ncyèpì.

²⁸ Pa nàнку, nwamònu's, twétù tudi ànu tuyiisha cyanàànà. Nènku vùlukàayi ne cintu cimwècimwè aci ncinùdì nwenza mu tabernacle emu. Kàdì vùlukàayi eci misangu yònsò ne: “Mikòòkò Yànyì mmimanyè Dìyi Dyànyì.” Ne Dìyi dyà mukana dyà Nzambi ki Dìyi Dyèndè.

²⁹ Mvwà ngeela meeji ditùkù adi mùdì bantu bàdi bàmba ne kacya kakùtukù...Dìngumba kampànda dyà èkèleeziyà dyàmba ne: “Dyondopa dyà kùdì Nzambi kí ndyà cyà bushùwà to. Kacya muntu nànsha umwe kàtukù mupèeshiibwe dipà dyà dyondopa dyà kùdì Nzambi to pa kuumusha Pòlò Munsantu anyi bàpostòlo, dikùmi ne bàbìdì mu cibambalu cyà kuulu. Bòbò abu mbàakapèeshiibwà dipà dyà dyondopa dyà kùdì Nzambi, kwàjiki. Aci's ncyàkakòsà bwalu.”

³⁰ Kàdì, nudi numòna's, ku dizòla dilenga didì Mwanèètù Willie, ewu, mutwènzèle mu mùshindù wà dikèma edi, kanshinga kakesè aku nkapìcìle mu maèkèleeziyà mwònsò too ne leelù. Ndi ndìkonka cìdì dìngumba dìmwèdìmwè adi dyàmba bwà bwalu-bulonda bwà èkèleeziyà, bwà Irénée, bwà Martin Munsantu? Ne bafwile diitabuuja bònsò abu munda mwà bikondò mwònsò, bwalu nkàmà yà bidimu paanyimà pàà lufù lwà bàpostòlo, bàakaakula mu myakulu ne bàakondopa babèèdì ne kubìisha bafwè ne kwenza bishimà, èkèleeziyà mujimà awu. Ndi ndìkonka ne kàdì bishi bwà bòbò abu, piikalàbi ne cìvwa ànu bwà bàpostòlo nkààyaabò?

³¹ Nudi numòna mùdìcì mmwènenu mubùmbàkàne amu anyi? Kabèèna ne luumvu lwà nyumà to, ki cyònsò cidiku ncyòci aci. Nwamònu's: “Mpofo! Bafwè mu mpèkaatù ne matomboka!” *Mpèkaatù* mbwena kwamba ne “bupidyà.” Cyònsò cìdì mu bupidyà mmpèkaatù. Muntu yèyè ne mwà—mwànzù bule *ebu* (wà D.D., L. yìbìdì, Ph.D., L.L.D.) kadi wàmba ne “cintu pàacì ne ndyondopa dyà kùdì Nzambi anyi dibàtiiza dyà Nyumà Mwìmpè kacìtukù to,” muntu awu mmufwè mu mpèkaatù. Mmufwànyine kwikala mwà kuumvwija maalu-masokoka a mishindù yònsò mu Bible, kàdì nsòmbelu wendè mwinè (bujaadiki bwèndè) ùdì ùjaadika ne yèyè mmufwè. Mmufwè mu mpèkaatù ne matomboka bwalu yèyè nngènzàmpèkaatù.

³² Mpèkaatù mbupidyà. S'bivwakù bikèngela bwà muntu kanà yònsò ewu...Mpèkaatù, kí nkwenda kwà masandi ne kunwà kwà mfwankà ne kujà kwà maja ne—ne kwenza kwà bintu byà lukutukutu byà mùshindù awu to. Abi kí mmpèkaatù to, abi mbyambiibwà byà bupidyà. Kàdì mwena—mwena kwitabuuja...Nànsha muntu kàyi ùnwa maala, kàyi ùnwa mfwankà, kàyi wènza bintu ebi, kacya kàyikù mwambè diyì dibì to, ùlama Mikenji yònsò Dikùmi, ùdì ànu mwà kwikala

ngènzàmpèkààtù mufiike wa fitùtù ewu, nwamònu's, mubolè ne mwèndè mwònsò. Yéyè ùvila ní ncinyi ní ncinyi cyònsò cyà bukolè bwà Nzambì, yéyè nngènzàmpèkààtù! Mwakù *mpèkaatu* mbwena kwamba ne “bupidyà.” Mpindyewu, jandùlàbi, umòna ní ncyà bushùwà anyi kí ncyà bushùwà. Mwena bupidyà mu Díyì dyà Nzambì, nngènzàmpèkààtù ne kèna mwà kubwela mu Bukalenge bwà mu Dyulu to.

³³ Mpindyewu, kaa, mvwa mwelè meeji díbà adi mu dindà emu, mwikàle ndyàngacilaci ku diswa dyà Mukalenge, ku díyì ditùmà dyà Nyumà Mwímpè, bwà kulwa cyàkàbìdì ku tabernacle ne pàmwàpa kunùlama mèbà àbìdì anyi àsàtù. Kàdì ndi muswè njikijèku mukàndà wà nshapìtá wà mwi4 wà Bwàkabuulwibwà kumpàlà kwà mèmè kuya. Nènku mpindyewu ndi ntèkemena ne kabyèna binùcyòkesha to, ndi ntèkemena ne cidi—cidi butùmbi kunùdì. Ndi ntèkemena ne ncintu ciikalà mwà kunwènzèlakù bímipè ne kunùkwàcisha mu matùkù àcìvwavwà kumpàlà.

³⁴ Nènku mpindyewu pàmwàpa...Ndi mwambìle Billy bwà kulwayè mwaba ewu mu dindà emu bwà kwabanya twartà twà disambila kwòkò kwikàle beenyi munkacì mwètù, bwalu netùùmukè, ne...mpindyewu, ne ncyèna mumanyè ne netwàlukilè díbà kaayi to. Ànu Nzambì ngudi mumanyè aci. Nènku mvwa muswè...mwelè pàmwàpa meeji ne disangisha dyà ndekeelu bu...ne pàmbiikidiyè ku tèlefonè díbà adi lwà—lwà pa díbà citèemà wàmba ne: “Papa, kùdì ndambù wa bantu mwaba ewu bàà kusambidila. Ndi mubàkonkè, kàdì” yéyè ne, “mbantu bàtù—mbantu bàtù bàlwa mu èkèleeziyà díbà dyònsò.”

³⁵ Mèmè ne: “Nànku kwàbanyi twartà twà disambila to, wamònu's.” Mèmè ne: “Bwalu abu mbantu...Twètù basambidile babèèdì mu dindà emu, netùbiikilè bantu ne kubàsambidila.” Kàdì mèmè kwamba ne: “Piikalàbi—piikalàbi ne mbantu bàtù bàlwa mu tabernacle batùdì bamanyè...To, mèmè ndi nkèbakù beenyi.”

³⁶ Ki kwambayè díbà adi ne, mmupàtùkemù kùdì ndambù wa tusunsa pàtwìdyanganyiyè naanyi pàmvwà mwimàne mwaba awu apu, kwambayè ne: “Èè, ndi mwabànye ndambù wa twartà twà disambila.” Yéyè ne: “Kùvwà bantu ànu bakesè menemene mwòmò amu, ndi mwabànye twartà twà disambila.” Yéyè ne: “Wèwè udi mwà kwenza cyònsò cyùdì muswè kwenza aci.”

³⁷ Mèmè ne: “Èè, netwànjì kumòna mwàyà diyiisha amu, kumòna mwaba wutwìkalà, ne díbà adi netùye. Mèmè...”

³⁸ Yéyè ne: “Èè, bantu bààbúngì bàvwa bàjìnga twartà twà disambila, mu bushùwà bwà bwalu, kàdì” yéyè ne “bàvwa mbantu bàà mu èkèleeziya.” Nwamònu anyi?

³⁹ Èè, tudi bamanyè ne Nzambì ùtu ànu Nzambì. Nènku, èkèlekèle, ànu bintu biinè bìdìYe wènza's wè! Mòna's, tè—tèlefonè ùdì ùdila díbà dyònsò, mabiikila a kùdì bantu bwà maalu mashiilèshiilàngàne, bwà tuntu ànu twà tukesè

menemene etu míngà misangu, ne mùshindù mwinè wùdì Nzambi wàndamuna ku disambila's!

40 Ndi ndikonka inábànzà mutekètè wa mu New Albany awu anyi bàyendè ní ùdì kaaba aka, bàvwà balwè dilòòlò adi ne mwànà wa mu dibòko uvwa mufùdisha mupùùyà wà munda dilòòlò adi, mwikàle ne disaamà dyà bisùlùsùlù, mu nzùbù mwànyì lwà pa díbà dikùmi ne ibidì, anyi díbà ùmwè awu? Nyéyè wàwa, mbímpè. Mwànà awu ùdì bishi? [Mwanèètù wa balùme kampàndà ùdì wàmba ne: “Bímpè.”—Muf.] Bímpè, mbímpè, èyo.

41 Ngǎnjì ànu nnùleejè, nwamònu's, bwà ne ncintu kampànda cyùdì kùyikù mufwànyìne kumanya to, cidì kaciyi citùngunuka to pàdì Nyumà Mwímpè wàkula. Fred Sothmann, mwanèètù wa mushinga mukolè, Fred, ngààmuumvù wàmba ne: “Amen,” katanci aka, kàdì ncivwa mumànyè mwaba wùvwàye to. Ùdì penyi? Ùdipù anyi? Nyéyè ewu, apa mene, Mwanèètù Fred Sothmann. Ne bwà kuleeja mùdìci cipeepèle. . . Kùvwa balundà kampàndà bàvwà bàmulwila, ùvwa m'Mwanèètù Welch Evans, mùndì ndicinkila, ncyèna mumanyè to. Bàvwà ne nzùbu wa bàtentemuna kuntwaku; bàvwà bakàngè biibi kàdì Fred mujimìje nsapì, ne mukèbe myaba yònsò kàdì kàyikù mwà kuyimòna mwaba nànsha wùmwe to. Kàdì Mwanèètù Welch ùvwa wènda ùlwa kùneeku. Ki ditùkù kulwadi divwàye ne cyà kufika ne bikwàbò, kabàyi mwà kupeta nsapì ayi mwaba nànsha wùmwe to, ki yéyè kubiikila ànu ku tèlefòne kwànyì kumbèlu, wàmba ne: “Mwanèètù Branham, nsapì ayi yìdì penyi? Tudikù bafwànyìne kuyipeta penyi?”

42 Mpindyewu, aci's ncifwànyìne kupìta bàmwè bàà kunùdì aku mutù, bwà muntu wetù ewu wèla lukonko lwà mùshindù awu. Kàdì anjì indìlaayi kakesè, nudikù bavùlùke bàna bàà Isàayi pàvwàbo bènda bàkèbangana ne tumpundu apu anyi? “Pa nànkù bu ne mèmè mvwàkù ne màtàpishì kampànda mu cyaanza cyànyì, nùnkù's ndi muyè naawù ne muleejè. . . mukonkè, kuàpèèsha mupròfetà, ne pàmwàpa yéyè mufwànyìne kutùleeja kùdì tumpundu atu túsanganyìbwa.” Nudikù bavùlùke aci anyi?

43 Kàdì pàvwàye wènda wèndakana mu mùsèèsù apu ki kutwilanganabò ne mupròfetà. Kwambayè ne: “Nudi nwenda nukèba tumpundu atu.” Yéyè ne: “Mónaayi, alùkilaayi kumbèlu,” yéyè ne, “tùkaadi tumanè kwalukila.” Ncyà bushùwà anyi?

44 Mèmè kusambila. Fred kuyayè tàmakàtàmakà e kwambulayè nsapì ayi. Ki cyòcì aci. Nwamònu anyi?

45 Mwanèètù Ed Daulton, udi lwà penyi? Ed Daulton ùdì penyi? Ndi mumanyè ne ùdì kaaba aka mwaba kampànda, mvwa mumumòne kùkaadi katanci. Kaa, paanyimà mu. . . nyéyè wàwa. Ùvwa muntèèlèjìle ku ndongolwelu wa maatèlefonè anyi ku ndongolwelu wa kufikisha mèyi kùdì batèèleji. Dilòòlò

adi dibiikila kulwadi ne Mwanèètù Ed ùvwa ùsanganyiibwa mu lutàtù lukolè. Mvwa muswè kumukwàcisha. “Bwàlà,” mwàkambàye, “ndi muswè ànu bwà wèwè kulòmba Nzambì.” Mémè kulòmba Mukalenge bwà àmukwàcishè. Ki ditùkù dya pàakacyàbu mukàjèndè kubiikilayè, muntu kampànda kulwayè bwà kumusùngila. Èyo. Ncyà bushùwà anyi, Mwanèètù Ed?

⁴⁶ Nwamònu’s, Yèyè ùdi ànu Nzambì. Ki cyònsò cidiku, Yèyè ùdi ànu Nzambì. Nwamònu’s, Yèyè ùdi ànu... Cidi ànu díbà dyònsò ku musangu ne ku musangu ku mwaba ne ku mukwàbò, ku mwaba ne ku mukwàbò. Lutàtù nànsha lwikàle lwà bishi, Yèyè ùdi Nzambì. Katwèna tutwà eku ne eku, tuditwa makùmbù bwà bintu abi to, katwèna ne cyà kwenza nàнку nànsha. Kùlekedikù bwà cyanza cyà balùme anyi cyanza cyà bakàjì cimanyè cidi cyanza cyà balùme cyènta to. Tudi tubyàmbilangana munkaci mwètù kàdi katwèna tucikòbwela mu mwaba kampànda nànsha. Bwalu aci’s mmaditàmishi, bu ne: “Nzambì ùvwa mwà kucyènta bwà muntu ànu umwèpelè.” Yèyè mmufwànyine kucyènta bwà muntu kanà yònsò udi muswè—udi muswè kuMwitabuuja awu. Ndiitabuuja, diitabuuja! Cyònsò—cyònsò cyùdi muswè kwenza, cyònsò cidi meeji èbè aci, ndà naaci kùdi Nzambì. Yèyè—Yèyè—Yèyè—Yèyè ùtu ùfila bintu byònsò. Kí mmwómò anyi? Pa nàнку Yèyè ùtu wàndamuna ku disambila. Yèyè ùdi . . . Nzambì n’Taatu mwandamunyi wa ku masambila.

⁴⁷ Mpindyewu, ki bwà cinyi mu...mvwa ndyàmbidila ne, nkàadi njikija mu masangisha a ndekeelu aa ne bikwàbò, bu mutùvwà...mutùdi twenza emu, tudi bafwànyine—tudi pàmwàpa bafwànyine kwenza dijingulula kampànda ku ndekeelu kwà masangisha, bu Mukalenge mwà kwanyisha, ne pàmwàpa mu díbà dya disangisha adi. Katwèna ànu bamanyè ciikalàYe mwà kwenza to. Mémè ntu mucinangè mùshindù awu. Nciyi ndongolola cintu kampànda to, ànu kuMushiila Yèyè wènta cidiYe muswè kwenza aci.

⁴⁸ Mpindyewu, angàtaayi nshapità mwi4 wa Mukànda wà Bwàkabuulwibwà, ne nwimanyikè ntankù.

⁴⁹ [Mwanèètù wa balùme kampànda ùdi wàkula ne Mwanèètù Branham—Muf.] Èyowà. Èyowà’s, mwanèètù. [Mwanèètù awu ùdi ùtùngunuka ne kwakula. Katùpà kàà mukàbà wà méyi munda mutupù.] Cyà bushùwà, mémè ndi ngiitabuuja aci. Kakùyi mpatà to, ndi ngiitabuuja aci.

⁵⁰ Mwab’ewu, Mwanèètù Welch Evans, ngeela meeji ne nyéyè udi musòmbe paanyimà pààpa mene wàwa. Ngànji. . . Patùcidi tubuulula mu Bwàkabuulwibwà 4 apa.

⁵¹ Àbidì àdi panshi aa, nwènu bònsò nuvwa bumvwè ne babalè mu bibèjibeji bwà musùmbà wa bìvi ewu mu Louisville bàdi bìiba tùshinyi, bàya naatù ku Kentucky kwàka mu mwaba kampànda, ne lukàsà lwònsò. Nènku mu Kentucky amu

kabyèna nànsha bikèngela bwà wèwè kwikala ne mukàndà wà bwena-cintu to, bàdi bàkwenzelawù mu Kentucky amu. Pa nàнку udi ànu. . .cintu cimwèpelè cidi cikèngelà wèwè kwenza bwà wèwè kuya naakù kuntwaku ne kukàsùmbisha. Pa nàнку bàdi bàngata tùshinyi atu bàya naatù ne bàtùlaabulula mùkubù, ne bàpàtuka ne tùshinyi atu bàtùsùmbisha. Cyònsò cidi cikukèngela kwikala naaci nnombà wa kumbèlu nènku bóbò—bóbò bàkwenzela mukàndà wà bwena-cintu. Nènku bàdi bùumusha kàshinyi mu njila bàya naakù ne lùkàsà lwònsò ne bàkàbweja mu cyapù kampànda, bàkàshintulula kònsò nkòong, nwamònu's, ne—ne bàkàlaabulula mùkubù ne bikwàbò byònsò, bàkàpàtula bàya kakàsùmbisha. Bàdi bìiba tùshinyi bikolè, kàbìdi nangàngà mu États-Unis mujimà, ne citùpà cinènè—cinènè mmu Kentucky. Mvwa mubalè kaabwalu mu cibèjibeji ànu àbìdi àdi panshì aa pa bwalu abu.

⁵² Èè, Mwanèètù Evans wa mushinga mukolè wa mwoyi munène, mulenga, ne dîkù dyèndè, bèndesha kàshinyi kuumukila ànu ku Macon, mu Géorgie, bàlwa kaaba aka dyàlumingu dyònsò bwà kutèèleja Èvànjeeliyò. Kaa, mùshindù mwinè wùdibo ne lulamatu's wè, ne balundà bàà bushùwà! Pashiishe ùdi ùya ku Cafétéria kàà Miller kùdì. . .

⁵³ Ncyèna ngenzela Miller kàmpanyè to, kàdi ncyà bushùwà ne ndi ngeela meeji ne bàdi ne cyàkudyà cyà citàmbe bwímpè bwà mu Kentucky; Nànsha twanji kwamba ànu bwà Louisville, mu Kentucky. Pàdìbi ànu ne. . . Mpindyewu, ncyèna nswà kwamba nwènu beena mèkù mùnkaadiku mudyadyàdye kuntwaku to, ndi nswà kwamba (nudi bamanyè) bwà bidìilù byà pambèlu. Nènku, ntu ndyà kàbìdi kwòkò aku. Ndi mwà kudiisha dîkù dyànyì muntwamu ku mushinga mushààdìle ku mùndi mwà kubàdisha kumbèlu. Ncyà bushùwà.

⁵⁴ Pa nàнку díbà adi ntu mbwela mwómò amu, nènku Mwanèètù Evans ùdi ùbwelamù ne ùpetakù cintu kampànda cyà kudyà ne ùtèèka kàshinyi kèndè mwab'awu. Pàdiye ùpàtukamù (ne bilàmbà byèndè byònsò) ne dîkù dyèndè ne bònsò abu, kàcivwa kàbìdi ne kàshinyi anyì ne kantu nànsha kàmwè to. Byònsò bìvwa biyè. Èè, mukwàcikwètù, Mwanèètù Evans ùdi ànu muntu mutùdi twètù bònsò aba emu, ùtu ne kaamudimu kakesè kàà dyenza kuntwaku, ùtu ùkwàta midimu wà tùshinyi, ùsùmba bìbalakata ne ùbìlongolola. Mmuntu mupèlè, ne ùtùùla mfrangà yèndè bwà kulwa kaaba aka bwalu ùdi wìtabuuja Èvànjeeliyò wa mùshindù ewu. Ndi ndòmba bwà Nzambi àbàtùminèku mùsanjeelà kampànda kuntwaku, bwà kubàkwàcishayè mu ditùnga adi.

⁵⁵ Mpindyewu, Mwanèètù Evans kulwayè, pa nàнку kàvwa mumanyè cyà dyenza to. Ùkaavwa mumanyishe bampùlushì kàdi kabàvwa mwà kukàpeta to. Ki kulwayè kwànyì kumbèlu, yèyè ne Mwanèètù Fred ne bakwàbò, twètù kusòmba mu cibambalu amu e kwakulapù. Mèmè ne: “Mpindyewu. . .”

Ki mùshindù wutùtù twenza, tudi tusòmba mu cibambalu, tujandula cìdì cyènzekà, ne pashìishe tuya kùdì Nzambi. Nènku, patwàlòmbu Mukalenge bwà “kukùdimuna muntu uvwa ne kàshinyi aku awu, kumukùdimuna ne kumwaluja,” kwònsò kùvwàye ùsanganyiiibwa aku.

⁵⁶ Pa ciibidilu bàtu bàya naatù bànyùnguluka Bowling Green anyi mwaba kampànda, bàtùpàtula mu mpwilàmàmbù emu, nudi numòna’s, pa nàнку bàvwà mwà. . . too ne pàdìbo bàkakàlaabulwisha mùkubù ne kukààkaja. Kàvwa nkàshinyi kalenga be, ngeela meeji kàà mukokakoka. Cìvwa cyà bushùwà anyi, Mwanèètù Evans? Kàvwa nkàshinyi kàà—kàà mukokakoka.

⁵⁷ Pa nàнку, nènku cyàkenzekà, twàkatwà binù e kusambila. Ki—ki Mukalenge kutùpèesha bujaadiki, byònsò bìvwà bìmpè, byònsò ànu bilenga. Ki dìbà adi bukolè bwà Mukalenge kubwelabù mutùvwà amu. Mwanèètù Evans kupàtukayè ne kwasayè lwendu, mulombòdìibwe bwà kupwekayè ùlonda njila kampànda.

⁵⁸ Kwalukilayè buludì muneemu mu Jeffersonville. Kàshinyi aku kàvwa kiibila mu Louisville; ki kàshinyi kèndè nkòkò aka katèeka mwaba awu kiikàle ànu ne ndambù mukùmbàne wa kàsòloonyi bwà kuya naakù. . . kaa, kuumuka mwòmò amu, bwà kwikalabò bayè naakù pabwìpì menemene ne Bowling Green ne kwalukila. Kupàtukabò mu kàshinyi aku, biimànyike kàshinyi, bashiyemù nsapì, baasè ànu lwendu bayè bakàshiyè kasòmbe mwaba awu, ànu muneemu mu Jeffersonville emu mùvwàye ne mùshindù wà kukàpeta; kì mmu Louisville to, muneemu mu Jeff., balwè naakù too ne muneemu bakàlùje.

⁵⁹ Nudi bamanyè’s, Mukalenge ùdì mwà kwenzeja nyuunyi bwà kuMutùmikilayi, Ùdì mwà kwenzeja bantu bwà kuMutùmikilabò, Ùdì mwà kwenzeja mwena lukunà Wendè bwà kuMutùmikilayè. Yèyè. . . Èyowà’s, mukalenge, Yèyè’s ùdì Nzambi. Ki kàshinyi kèndè nkòkò aka kasòmbe kamùyi kantu nànsha kàmwè bayè naakù to, ànu ne cyàbibidì cimwè cyà ntanki wa kàsòloonyi uvwayè mwambè kafika nendè mu Bowling Green awu, ne Nyumà Mwìmpè nguvwa ne cyà kwikala mwambè ne: “Kùdimukà! Alùkilà kwòkò aku ùye ne kàshinyi aku ku Jeffersonville. Kàshiyè mu mùsèsù emu mene, ne kimànyikilè *apa* nùнку, (bwalu Mémè nèmmutùmè bwà àlondè buludì lwà *kùneeku* eku ne àlwilè lwà *kùneeku* bwà kukàpetayè).” Ncyà bushùwà anyi, Mwanèètù Welch? Ncyà bushùwà. Nwamònu’s.

⁶⁰ Yèyè’s ùdì Nzambi! Ùtu wàndamuna ku disambila’s, Mwanèètù Roy. Ùdì ànu. . . Cìdì, Mwanèètù Slaughter, cìdì ànu cintu cimwècimwè aci’s, Yèyè nguvwa mwondòpe kabwà kèèbè kakesè aku. Ne mèmè ndi mumanyè ne Yèyè ùtu wòndopa, Yèyè ùtu wàndamuna ku masambila, Ucidì ànu wènza bishimà,

Yèyè ùcìdì ànu Nzambì, Ùvwa misangu yònsò ànu Nzambì, Yèyè neikalè misangu yònsò ànu Nzambì!

Yèyè—Yèyè ùdì Nzambì ku musongà wà nzùbu,
 (Ncinyi aci, citù mwanèètù wa balùme awu
 wimba mu èkèleeziyà emu aci?)
 Nzambì mu cikukù, Nzambì mu ferme,
 Nzambì mu màshinyi a kàdyèndelandelà, Yèyè
 ùdì Nzambì myaba yònsò,
 Yèyè ùdì Nzambì kuumukila ku—ku ntwàdijilu
 too ne ku ndekeelu, Nzambì.

61 Kaa, bilenga kaayi's wè! Tudi bafwànyine kuditwa mu diyishi paanyimà pàà katanci kàdi katuyikù tubwela mu dilesònà edi to.

Èyo, twinyikààyaaku mitù yètù bwà katanci kakesè cyanàànà bwà disambila.

62 Taatù wa mu Dyulu wa musàngeelu, tudi banangèpu Dìyi Dyèbè dyà Cijila mu mùshindù wà ne myoyi yètù yidi yilàkuka kapyà munda mwètù, patùdi tumanya ne Nyumà Webè ùdì ùtùuluka munkaci mwètù ne wàkula neetù, ne myoyi yètù yiya yiDikwàta. Ne tudi tumwèka ànu bu ne tudi tudyùmvwà bilenga byà dikèma bwàDì, Mukalenge.

63 Ne pa kumanya ne mu dībà dyà mīdimà mùdì cibwejàkàjì búngì cyanàànà emu... Bu mwàkambà mupròfeta ne: “Mu matùkù a ndekeelu nekùlwe ciyòdòlè cyà nzala,” cintu kampàndà cyà mùshindù ewu, “kaciyi cyà dyàmpà ne cyà màyi to, kàdi cyà ditèeleja dyà Dìyi dilelèlè dyà Nzambì; ne bantu bàvwà mwà kwenza ngendu buumukila ku esètè bàya ku wesètè, ku nord ne ku sud, bènda bàkèba bwà kupeta Dìyi dilelèlè dyà Nzambì.” Dìyi! Dìyi ncinyi? Yesù ngudi Dìyi: “Dìyi dyàkavwijibwa mubidi ne dyàkasòmbela munkaci mwètù.” Pa kumòna dimwèneshiibwa dyà Dìyi dilelèlè dyà Nzambì dimwèneshiibwe bilondèshile Mifundù ne mifikisha ku dyenzeka, ne, mùvwà bantu mwà kwenza ngendu bènda bàkèba ne bàpangila bwà kuDipeta. Èyi Nzambì, tudi ne disànkà be, ne disànkà dyà diyiila ne pànshì dyà mutùdiku twètù baMupetè kùkaadi bidimu, wa mushinga mukolè bwà myoyi yètù, ne kumòna ne katwèna mu cibwejàkàjì nànsha cikesè to.

64 Èyi Nzambì, Wèwè's wàkamba ne: “Aba bàdi bamanyè Nzambì wabò nebènzè byenzedi byà bulòbò mu ditùkù adi.” Kàdi's ki twètù aba mu matùkù a ndekeelu, munkaci mwà kumòna bintu byònsò byàkambà Yesù ne nebyènzekè, biikàle bimwèneshiibwa munkaci mwètù mene. Bimanyinu mene abi, maalù a kukèma, bishimà byènjiibwa, tubyènza ànu menemene mwàkabyènzàYe Yèyè amu. Bu mwàkambàYe ne: “Ànu mwàkadibi mu matùkù a Sodomà, ki mwikalàbi kàbìdì ku dilwa dyà Mwànà wa muntu.”

⁶⁵ Nènku, Mukalenge, Ûtùlekèlèku, ku Nyumà Mwímpè, twòlòlè cyanza mu Díyì adi twàngatè bintu bilelèlà abi ne túbítwàngájè ne Kàlvaryò, ku Díyì, ne tùmònèku ne mu Yéyè mmutùdì ne kaabujimà. Ne mabanji ne mabènesha ne butùmbì ne byònsò biyaaya kùdì Yéyè Udi mukùmbànyìne awu, wàkalwa kwàngata Mukàndà mu cyanza dyà dyàbalùmè cyà Yéyè uvwa musòmbe pa Nkwasa wa butùmbì, ne kusòmbePù Yéyè mwinè, bwalu Yéyè ngwàkashipiibwa kacya ku difúkà dyà dyulu ne buloba.

⁶⁶ Tudi twakula bwà bwalu Bwèndè mu dindà emu, Taatù. Tudi tulòmba bwà Wabèneshakù myoyi yètù. Nyumà Wendè àkwatèku mudimu munkaci mwètù ne àtùbèneshèku, ne àfilèku bubanji ku dilabula dyètù, ne òndopèku mabèèdì munkaci mwètù, ne àtùpèèshèku ngàsà wa kucìmuna nendè.

⁶⁷ Nènku, Nzambi, pàndì mpàtuka nya kuntu kwàka mu budimi bwà bwambi bwà kakùngamangana ne mulwishì apa, swàku bwà mmanyè ne ndi ku dībà ne ku dībà munyùngulukila kùdì disambila. Kaa, mùshindù mwinè wùndì ngeeyemena dinnyùngulukila adi's wè, mwena lukunà ùseemena, kàdì mèmè mmanyè ne dinnyùngulukila adi nkacya dyàkwàta bwalu baamaamù ne baataatù, ne bânà bàà balùme ne bàà bakàjì, beena Kilistò, balediibwe cyàkàbìdì biikàle benzè dilabula, bantu bàdì mu njila batàngile mu Dyulu biikàle ku binù bàsambila ne: “Èyì Nzambi, filakù disùngidiibwa!” Nènku, Taatù, tudi tulòmba bwà Wènzèku bwà tükabwelè mu milongo yà mwena lukunà awu mwàmwa ne kukwàta ku bukòòkeshi musùùkà wònsò wà mushinga mukolè wùdì mwindile. Enzàku, Mukalenge, ne kuyipàtùla mu mídima kuyibweja mu Bukènkè. Bwalu tudi tulòmba nùnkù mu Dìnà dyà Yesù. Amen.

⁶⁸ Mpindyewu, mu nshapità mwi4 wa Mukàndà wà Bwàkabuulwibwà. Twàjikijì nshapità mwi3, nènku twikalààyikù ne kaneemu nènku nénditácishè bwà kubènga kunùlama mukùngùlù mupitèpìte bule. Kàdì mu nshapità mwi3 ewu, Èkèleeziyà wàkabànda bu cifwànyikijilu, pààkangaciibwà Yone muulu. Èkèleeziyà wàkabànda, ne kubangila dībà adi bàdì batàngila bwalu bwà Izàlèlèlà, too ne pàdìYe ùlwa cyàkàbìdì. Kanwènaayikù numòna mùdìbi anyi? Bantu leelù ewu, mùdìbo ne: “Cintu kampàndà cyà cinène necinyukushè buloba bujimà ne bikwàbò byònsò.” Aci kì ncyà mu Mifundu to! To, mukalenge. Cintu cidì cilondà mu dilondangana adi ndiya dyà Èkèleeziyà. Balàayi mu bikondo byà èkèleeziyà, nudi numòna cidì. . .

⁶⁹ Mpindyewu, bintu bikwàbò bìdì ne cyà kwenzeka ebi, mmu cikondo cyà Mushingà wà Dibàkà pìikalà Èkèleeziyà ùkaadi mu Butùmbì. Nzambi udi wàlukila ne maalu manènè a kukèma a dyenza, bishimà byà buloba bujimà ne bikwàbò, kùdì beena Yudà, kabiyikù bitàngila Èkèleeziyà to nànsha kakesè.

70 Mu nshapità mwi3 mmùdì mùjikilà cikondo cyà Èkèleeziyà. Ncyà bushùwà. Nènku cikondo cyà Èkèleeziyà cidi cijika ne banyààbanyà bàà menemene batùdì tusangana...Tèelejàayi ànu kaaba aka. Ndi—ndi mubalè cyàkàbidì cyòcì eci mu dindà emu, ncyambè kunsùsulula's, mwaba ne lwidì lwà Kilistò ku ndekeelu kwà cikondo cyà Èkèleeziyà, ùsanganyiibwa kuumukila ku mvensà wa 20 too ne ku wa 22 wa Bwàbuulwibwà 3. Elàayi meeji pa bwalu abu ne Kilistò, ku ndekeelu, mwaba wùdiYe ùsanganyiibwa! Yèyè ùdi penyi ku ndekeelu kwà cikondo cyà Èkèleeziyà? Pambèlù pàà èkèleeziyà Wendè, musàka pambèlù kùdì màngumba ne twitabàayi. Lwidì Lwendè lùdì bìshi? Ûteeta bwà kwalukilamù. Awu's ngiikàdilù wa wènza luse's!

71 Pashiishe tudi tusangana kaaba aka ne, “paanyimà pàà maalu aa,” yèyè kuumvwa Dìyi dyàkula nendè ne...Kaa, cìvwa ncinyi? Nyumà wàkuumuka pa buloba. “Paanyimà pàà maalu aa,” mùdì nshapità wa kumpàlà ùbanga, anyi—anyi mvensà wa kumpàla ne:

Paanyimà pàà cyòcì eci mèmè kutàngila, ne, mònaayi, ciibi cyunzulula mu dyulu: . . .

72 Bwàkabuulwibwà 4.1, paanyimà pàà Èkèleeziyà mumanè kuya, dìbà adi ci—Ciibi cìvwa cyunzulula. Ne tudi balongè byònsò abi ne basangàne ne ùvwa n’Kilistò, uvwa Ciibi aci. Ne Dìyi dimwèdimwè divwà dyènda munkaci mwà bitèekedi byà myèndù byà ngòlò mwandamutekète adi divwà kàbidì Dìyi dimwèdimwè divwàye muumvwè mu Dyulu, dyàmba ne: “Bànda kùneeku” adi. Yone kubàndayè. Cìvwa cileeja Èkèleeziyà ùya mu Dyambwibwa.

73 Yone wàkabànda mu Nyumà, wàkangaciibwa mu Dyulu ne wàkadyànjila kumòna bintu byònsò bivwà Nzambi mulayè ne mwambile bayiidi ne: “Bwalu bwèbè wèwè bùdi penyi bu yèyè mwà kushààla too ne pàNgààlwà?” Yèyè wàkamòna dilwa dyà Mukalenge ne bivwà mwà kwenzeka. Wàkamòna pa buloba bivwà mwà kwenzeka pa buloba too ne ku Dyambwibwa dyà Èkèleeziyà, ne wàkangaciibwa muulu ne bàakamuleeja too ne paanyimà pàà Bukalenge bwà bidimu cinunu. Kaa, abi kí mbilenga bilaya anyi?

74 Mpindyewu, tudi bamushiye mu dyàlumingu dishààle mu nshapità mwi4 ku mvensà mwi4.

Ne mu nyùngulukilu wa nkwàsa wà butùmbi mùvwa nkwasà makùmi àbidì ne yinaayi: ne pa nkwasà ayi ngàkamòna bakùlù makùmi àbidì ne bànaayi basòmbe, bavwàle bivwàlù bitòòke; ne bàvwa ku mitù yàbò bavwàle bifulu byà butùmbi byà ngòlò.

75 Mpindyewu, tudi basangàne ne bôbò aba bàvwa mbakùlù. Kacya mukùlù kacitukù cyàngaciibwa bwà Mwanjèlo anyi Kampànda mukwàbò to. Mmuntu mupikula, bakùlù! Bwalu

bàdi . . . Nkwasa yà butùmbi, bifulu byà butùmbi, ne bukòòkeshi kacya kabitukù byangàciìbwe bwà, bwà Banjèlo nànsha. Kàdi bifulu byà butùmbi ne nkwasa yà butùmbi, ne bikwàbò, bìdi bitàngila bantu. Ne bakùlù aba bàvwa baashiìbwe bifulu byà butùmbi ne bavwàdikùibwe bivwàlu ne basòmbe pa nkwasa yà butùmbi. Ne tudi tubàsangana mu bitùpà bikwàbò byà Mifùndu ne bàvwa mbàpostòlò dikùmi ne bàbìdi ne bàwà bankambwà dikùmi ne babìdi. Bòbò abu *makùmi àbìdi ne bànaayi*, byùmvwija “makùmi àbìdi ne bànaayi”: bàpostòlò dikùmi ne bàbìdi, bankambwà dikùmi ne bàbìdi.

⁷⁶ Nènku, tudi tusangana ne, nànsha mene cimenga cidi cìpwekà cìfùmina kùdi Nzambi mu Dyulu aci . . . Paanyimà pàa bulòba bumanè kutaayika ne byònsò bishààle tusùnsukilà ne kakùciyi kushààle kantu nànsha kàmwè pa buloba to ànu butù bwà volcan (ki cyònsò ciikalà cishààle), kakwàkwikala kàbìdi mbù to. Mbù neàkamè.

⁷⁷ Mùmvwà ngaakula makèèlèlè dilòlò awu ne muntu kampànda, anyi makèèlèlè, mu mwaba kampànda, musangu kampànda buloba bùvwa bwimàne mùshindù *ewu*, bululàme, bùnyùngulukila ku dîbà, luuyà lwikàle lwà mwomùmwe muulu mwònsò too ne panshi. Mu madimi a mabwe a mashikà a mu Grande Bretagne mwàmwa, udi mwà kutaayisha buloba kuya too ne mu mètres lukàmà ne makùmi àtaanu usanganamù mabwè a ngaji. Mbilwè dyàkàmwe, kubìvwija mabwè a mashikà ànu bu mu cyamù cyà mashikà mpindyewu. Byenzè mùdi *dyumisha dyà màyi* dyènù adi, ne bikwàbò, ne *dyumisha dyà ne mashikà* divwija mabwe didi dilamà mbèèlèbeele adi ne bikwàbò munda mwà bidimu ne bidimu bicìvwàvwà. Nwamònu anyi? Mùshindù wùmweùmwe awu ngùvwàbi mu cikondo aci. Ne lùkàsà lwònsò kulwakù kabùtù kàa mvulà yà Noà ne kubwikilayi buloba bujimà. Ne pààkenzekàbi nànu, makolè a bòmbè bwà mùshindà àkabùtènkakaja e kubùùmusha mu mpoko wabù, e kukwàtabù dibwe dyà mashikà ne kushààlabù nànu awu. Nwamònu anyi? Umbulà mu buloba neubisangàne, mu bitùpà byà mu nyùngulukilu wa Pole Nord byàbya ne bikwàbò, mabwè a ngaji ne bikwàbò. Bìvwa bileeja ne kale wàwa yìvwa mmyaba milenga misòmba kùdi bantu, milongolola. Kàdi mpindyewu buloba mbunyùkusha butùma paanyimà.

⁷⁸ Mpindyewu, kùndi ngeela meeji ne Nzambi wàkapeta màyi awu, pàdi Genèsè ùbanga apu, Genèsè 1: “Buloba bùvwa kabùyi ne mbùngakeenu, ne munda mutupù, ne màyi àvwa pamutù pàa ndòndò. Nyumà wa Nzambi ùvwa wèndakana pamutù pàa màyi wàmba ne: ‘Bukènkè bwikalèku.’” Nzambi wàkatàpulula dîbà adi buloba bùme ne màyi, ki cyàkenzà buloba. Kàdi buloba bujimà bùvwa bubwikidija. Mpindyewu, cyàkenzàYe, Ùvwa ànu . . . mu bibwàshibwàshì mwònsò amu, Ùvwa ànu . . . cibwàshibwàshì cidi . . . Bibwàshibwàshì mbyùle tètè ne hydrogène ne oxygène, ne bikwàbò. Pashiishe kubibàndishaYè

ànu kuulu kwà buloba ne kubitàpululaYè. Kakùvwa mbû pa buloba musangu awu to. Nzambi ùvwa ùmyamina buloba mâyi, kakùyi nànsha mvulà yilòka to. Ùvwa ùbùmyamina ne mâyi a tusulù ne bikwàbò, dyela dyà mâyi ku bikùnyìibwà's. Pashiishe pàvwàYe. . . Cintu cimwèpelè cyàkenzàYe díbà adi. . .

⁷⁹ Pààkuumushà muntu buloba mu mpoko wabù, kubùtùma ku luseke lùmwè, cyàkenzekà ncinyi? Cyàkabùkùpa paanyimà mu. . .luuyà lukolè panshi *apa*, ne mashikà muulu *mwànwa*. Nènku luuyà ne mashikà, cidi cyungwilà ncinyi? Cyùmvwàyi pa màdidiishi awu mpindyewu mene, luuyà lukolè munda emu ne mashikà pambèlù. Nudi numòna cisùlùlù anyi? Ne mvulà yidi ànu cisùlùlù cyanààna, cikòpàkànyì. Ne mâyi mbutù. Nènku pashiishe pàvwàbi. . .

⁸⁰ Ntu munangè musambu awu wà ne:

Wàkatèeka cyanza Cyèbè, Mukalenge wa mushinga mukolè, pa mpàtà,
 Wàkatèeka cyanza Cyèbè cyà cikemesha aci pa mulongo wà mikùnà;
 Mukalenge, Wàkiicikija mpokolo,
 Kujuula mukùnà,
 Èyi Mukalenge, lamàku cyanza Cyèbè cyà mushinga mukolè aci pambidi pàànyì.
 Wàkenza mavuba, kwenza mavuba àkenzà mvùla awu,
 Ku mvulà e kwenza mbû,
 Ku mbû kutwàla mavuba,
 Bwà kutùpèesha mwoyi wà wùyiila ne panshi;
 Wèwè udi mukwàte buloba ne mauulu mu díyi Dyèbè ditùma, Mukalenge,
 Kaa, swàku ùlamè cyanza Cyèbè cyà mushinga mukolè aci pambidi pàànyì. (Kaa, mùshindù mwinè wùdibi bilenga's wè! Èyowà's, Nzambi wa mu Dyulu.)

⁸¹ Pashiishe mu cikondo cinène eci, mbwalùkìlè bwèyemenè nùнку ewu mpindyewu, ne Yèyè mmutwènzèle mulayi ne: “Kabyàkwikala kabidi ku mâyi to, kàdi nkapyà bwà ewu musangu.” Pamutù pàa kubùkùpa. . .Bòbò mbakùpe buloba kule ne díbà, mu bushùwà bwà bwalu, ki kukwàtabù mashika. Wèwè mubwèlè mu díbà, nebwòshikè. Nènku ànu mwàkabùbùtulàYe ku mâyi ne kutèeka mwanzankòngòlò mu dyulu amu, Yèyè “kì mmufwànyine kucyènza kabidi to,” mpindyewu, Yèyè mmufile mulayi ne neìkalè mwà “kubwòsha!” Pa nàнку ki nwènù bààfiki mwaba wùdì mpèkaatù ne dibàlakana dyònsò ne bukooyà bwònsò. . .

⁸² Nènku ànu àbidi àdi panshi aa mvwa ngendela pa kabalù mu mpàtà. Pàmvwà mwànà mukesè mvwa ngenza kwela meeji, ngangata mikàndà yànyì yà maalu-malonda ne maalu a buloba

ngeela meeji bwà mpàtà minènè yà ku wesètè ayi. “Dìngà ditùkù,” mungàakambà, “ngaadyàkusòmbelamù mu ditalala ne cinyàànyà mwaba wùdì kawùyi mpèkaatù to, ne nengìikalè ngendakana mu madimi ne nêngènzè bulembi bu Indien. Nènku nè—nènsombelèmu, nsòmbelu wa ditalala, matùkù àànyì ònsò a mwoyi.” Kàdi mpindyewu bìdi . . . mutòòke’s mmuyèmu. Mwaba wùdì mutòòke ùya, mpèkaatù ùdi nendè. Yèyè ki mushebeyanganyi mutàmbe bunènè ne mushebeyi ku bantu bònsò pa buloba, mmutòòke awu. Yèyè ki mupidyè diitabuuja ku makòbà ònsò!

⁸³ Mwab’ewu ànu àbìdì àdì pànshì aa mu cibèjibeji (Mwanèètù Thom ewu, wa ku Àfrikè), mvwa mumòne katùpà kàà bwalu mu cibèjibeji kùkaadi mbingu yìbìdì, ngeela meeji ne mmùvwàbi, ki kwambayè . . . bàmba ne: “Bòbò ànu batùngùnùke ne kwanyishila beena Àmèrikè bwà kuya ku Àfrikè, mu bidimu dikùmi kuumukila ku mpindyewu nyama munènè wa ntambwe wa mu Àfrikè awu kààkwikalakù kàbìdì to, ne nzevu ayi.” Bantu bapidyè diitabuuja abu bààsa bingoma mwaba kanà wònsò wùdìbò mwà kwasa awu. Kùdi fòtò wa nyama milùme yìbìdì yiteeta bwà kwimanyika mulùme mukwàbò uvwa mutàpiìbwe mpùtá awu kuulu. Bìvwa bìmwèka ànu bu ne binsònji bìvwa bìyipweka mu mèsù. Kayìvwa miswè . . . milùme kayìvwa miswè bwà mukàjì awu àfwe to. Ne yònsò wa kùdiyi ùmukwàcila ku luseke lwèndè, nùnkù *ewu*, ùmulama bwà kàdìshìndi ku . . . pànshì to. Bàyààsa bàyisùnsula. Muntu uvwa wasa cintu kanà cyònsò mùshindù awu awu kì mmukùmbànyine kwikala ne cingoma mu cyanza cyèndè to. Ncyà bushùwà. Kwènàku ne meeji makùmbàne bwà kumanya mwà kupìta naaci to.

⁸⁴ Mpindyewu, kùkaadi ndambù wa bidimu, mvwà nteeta kusàka cisùmbù kampàndà cyà nyama, cyà mbudi, nyitùma kùdì mulundà wanyì mwímpè, Mwanèètù Roy Roberson ne bakwàbò kuntwaku, pàmvwà mulombodi mu Colorado; mvwa mumanyè ne tuvwa ne cisùmbù cilenga cyà bimunà. Mémè ne Jeff tuvwa naayi kuntwaku bidimu ne bidimu, nyama mitwè ku makùmi mwandamukùlù yà mbudi mu cisùmbù aci. Bàdi bàlekela bàmwè bàà ku bantu bàà bìrò bàà ku Denver bàlwa kuntwaku bavwàlè tùpanù twà ne cyà kuulu bilamakaja, ne bimbuma-mootò byà nshinga abi. Abu mbaabilembi’s. Hmm! Ki bòbò aba bàlwa kuntwaku, musùmbà mujimà, mu tùshinyì twà jeeps ne bintu byà mùshindù awu, kubwelabò mu citùpà cyètù cyà buloba amu.

⁸⁵ Ne mémè mvwa nsàka mbudi eyi luseke lukwàbò lwa mukùnà paanyimà pààbò, mu ntàntà wa wìpacila kilòmèètà umwe ne citùpà anyì yisàtù, ne yòyì yìvwa midikùngwìjilekù. Bikèngela ùyilamè mishiilàngàne ntàntà, minènè yà mpànga ayi ne bikwàbò; kùyi mwenzè nànkù to, wànyangàkàjì cisùmbù cyèbè cyà bimunà. Yìdi ànu mùdì kumuna kwà ngombe anyì nì ncinyì cyònsò eci amu. Bìvwa bìkèngela bwà nyama yà cisuku kwikalayi mùshindù wùmwèwùmwè awu bwètù twètù. Kì nyà

diludikila mikete nànsha. Wêwè muswè kulonga kwasa nànkú's bàtu ne mwaba wà diteetela bingoma mwaba ewu wà kulongela. Ncyà bushùwà. Mbundù be bwà kushebeya bintu mùshindù awu. Mbubi, ndipanga kaneemu bwà Nzambi!

⁸⁶ Mémè kubala mazàji lukàmà ne makùmi àbìdì ne àsàtù maashila ku bingoma byà mwambùùyi, mùshindù awu, bàasa ne cingoma citèekela pa makaaya. Kì pàakacyàbu mu dindà, Mwanèètù Banks Wood ewu pámwè naanyi, twètù kubànda ku mukùnà aku, mémè kubala myaba dikùmi ne citèemà yà lubòlèlèlà lwà mashi. Kabàvwa bamanyè kantu pa bìdì bitàngilà dilemba dyà nyama to; udi mwà kwasa nyama munènè mùshindù awu, udi mufwànyine kumulenga byà bibi bikùmbàne byà umushebeya. Kàdi bàvwa bóbò bàlekelela ànu, “mpân, mpân, mpân,” bàasa ewu pashiishe bàasa mukwàbò. Mòna's, s'neyifwe. Kàdi ciikalà mwà... Paanyimà pàà mubidi kapyà mumanè kuyikwàta, wèwè muyisangàne kayicyèna milenga mukana to, yìdì yinyanguka dyàkámwè; kì bidyàbibolè, mibwàbwà ne bikwàbò, yìdì yiyìdya. Dikùmi ne citèemà milàale mu mashi, mpàngà minène, yà bikònò mòna bunènè myaba yònsò ayi, ne mashi bisòmpoka too ne mu ntàntà wa centimètres makùmi àsambòmbò myaba yìvwàbo batùbùle mùshindù awu ne bingoma abi ayi. Kabìvwa bìkèngela kwanyishilabò muntu mupidyè diitabuuja wa nànkú awu bwà kwikalayè ne cingoma mu cyanza cyèndè nànsha. Ncyà bushùwà. Yèyè kènàku ne meeji ètù aa bwà kumanya cyà dyenza ne cingoma to. Kaa, s'mbwalu bunène, bubì be bwà kwenza mùshindù awu.

⁸⁷ Aci's ncibi be, kàdi's ki mwena Àmèrikè nyèyè awu. Canada, nwènù bantu bàà musinga mukolè bàà ku Canada! Àmèrikè yèyè ànu mutungùnùke, Canada neikalè wa ciipanshì ànu mùdì Àmèrikè amu, paanyimà pàà cikondo kampànda. Ndà myaba yònsò yà ku mikàlù ne Canada ayi mwaba kanà wònsò, udi usangana cyuyüya cyà cyena-Àmèrikè aci. Àmèrikè ewu ki ndumbà wa matunga. S'ki cidìye menemene, ne neàtambè kubìpa byà kacya mpindyewu. Úkaadi mutàngile ku ndekeelu wendè! Bible ùdì wàkula bwà kabùtù kèndè, wamba mwikalàye. Àmèrikè: wa ciipanshì, mubolè, wa bukooya, kàyikù mwìmpè to. Ncyà bushùwà menemene. Úvwakù ditungà dinène. Úvwakù mwendè ne mukenji wa Èvànjeeliyò. Ncinyì cidì cimuvwija mùdiye emu? Mbwalu mmudyombòle Mukenji wà Èvànjeeliyò, ne mubènge Malelèlà. Úkaadi úkwàcisha bwòwà. Cikaadi cimuvwila, kanùtàcishi meeji to. Mvwa mucimòne mu cikèènà-kumòna bu EMU MMÙDÌ MUKALENGE WÀMBA! Cìdì munkaci mwà kulwa. Yèyè's neàyoobè bwà mpèkaatù wendè.

⁸⁸ Kale wàwa pàvwà Àmèrikè mwikàle Àmèrikè, s'úvwa ditungà dinène. Ditàmbe bunène dyà kacya buloba bwikalakù kacya ku Izalèlèlà, s'dìvwa ng'Àmèrikè, kàdi patùdì twakulangana apa wàdikooyishì ànu yèyè mwinè bushuwa. Wàbengi Mukenji. Wàngàci ànu... Patùdì twakulangana

apa mmudìvwijè...S'nudi mwà kumòna mwaba wùkaadiye mpindyewu. Bwà aci kaayi muntu yònsò mmumanyè, mu masungulangana a ndekeelu aa yêyè's mmuleejè mwaba wùdi cipidi cyèndè cyà nyumà. Uh-huh. Kí mmumanyè to.

⁸⁹ Mpindyewu, bakùlù bàdi basòmbe pa nkwasa yà butùmbi ne bifulu byàbò byà butùmbi aba. Mpindyewu, mvensà mwi5, netùbangè:

Ne ku nkwasa wa butùmbi kùvwa kùpàtuka mikenyi...mikungulu...mèyi: ne kùvwa myèndù mwandamutekète yiteemà mudilu kumpàlà kwà nkwasa wa butùmbi aku, yìvwa miikàle Nyumà mwandamutekète yà Nzambi.

⁹⁰ Kaa, mèmè ndi munangèpu eci's wè! Kàdi nwènù? Kaa, ndi ndyùmvwa ànu bu ne kàzakù kàanyi nkankùmbàne, nudi bamanyè's. Ndi ànu...pàdì...Kaa, ndi muswè kwamba ne mmu kàzakù kàanyi kàà nyumà, mu bushùwà bwà bwalu, nudi bamanyè's. Èyo.

⁹¹ “Ku Nkwasa wa butùmbi.” Twánjì twàkulààyikù bwà Nkwasa wa butùmbi ewu mpindyewu bwà katanci kakesè. Ewu kàvwa Nkwasa wa ngàsà nànsha. Bwà Nkwasa wa ngàsà mbujikè; kakùcyèna kàbidì luse to, kùkaadi kakùciyi luse to. Mmuni mutwikalà mwà...Mmuni mwikalà nkwasa wa cilumbulwidi ne cyà kwikala nkwasa wa cilumbulwidi wa Kilstò, nkwasa wa cilumbulwidi, Nkwasa Mutòoke wa Cilumbulwidi? Mwòmò amu nemwikalè luse dìbà adi anyi? Kakwèna kandambù nànsha kakesè kàà luse kààfidiibwà to. Ku Nkwasa wa cilumbulwidi aku wèwè udi mufwànyine kwela mbilà yà “luse” too ne pawikalà kùciyi kabidì mwà kuyèèla to, ne cidi, ànu bu ne udi wela mbilà mikolè mu lupeepèlè mwaba kampànda, bwalu kakùcyèna kàbidì luse to.

⁹² *Mpindyewu* ki ditùkù dyà luse! Mpindyewu, twàlukilàayi mu Dipungila Dikùlukulu emu bwà katanci kakesè cyanààna bwà tùjandulè ne luse ncinyi. Twàlukilàayimù bwà tùmone cìvwà cyènzekà ku mwinè Nkwasa wa butùmbi ewu. Nkwasa wa butùmbi ewu, mu bushùwà bwà bwalu, ùdi nkwasa wa—wa cilumbulwidi. Ne kwikala...cidi cyèna ne leelù ewu kwikalè luse, mbwalu nkwasa wa ngàsà mmumyamina ne difuta dyà cibawu. Mashi! Ne pàcidi ànu Mashi pa nkwasa wa cilumbulwidi dìbà adi kacìcyèna kàbidì nkwasa wa cilumbulwidi to, nduse, bwalu Cintu kampànda ncifwè bwà kupangisha cilumbulwidi. Nwènù bacimòne, ambàayi ne “Amen.” [Disangisha didi dyamba ne: “Amen.”—Muf.] Bu mùcidi ànu Mashi pa nkwasa wa ngàsà, mbileejè ne Cintu kampànda ncifwè bwà kupangisha cilumbulwidi. Kàdi pìikalà Èkèleeziyà mwambwibwe, nkwasa wa ngàsà ùdi ùlwa nkwasa wa cilumbulwidi!

⁹³ Mwàmwa, nudi bamanyè's, mu Dipungila Dipyadìpyà emu, kàbidì: “Ne mu mwaba wà cijila.” Kí mùvwà beena kasùmbù

kàà—kàà bangaci bà mapàngadika...mu mwaba wà cijila, mulumbulwishi pa nkwasu mu mwaba wà cijila. Mpindyewu, nkwasu wa cilumbulwidi awu mu mwaba wà cijila wàkalwa mùle tètè ne mwìshì. Cìvwa ncinyì? Bu Mukùnà wà Sinaayi, cilumbulwidi! Luse lùkaavwa luumùke ku—ku Nkwasa wa butùmbi wa Nzambi. Nzambi neàlumbulwishè bàà pa buloba kakùyì luse to. Mbanganyì bàdi bamanyè nànkù?

94 Kùdi cintu ànu cìmwèpelè cìtabàYe mu ditùkù adi, Cìdi ncinyì? Mashì. Ki cintu cìmwèpelè cìvwa cìtuuyishà cìjì cyà Nzambi ncyòci aci.

95 Adàmà ne Eva bàakenza kaalubondyà kìmpè ànu mùdì kàdi Méthodiste, Baptiste, Presbytérien kanà yònsò ewu, anyì mwena Mpenta mufwànyine kwenza aku, kàvwa kàjìka butakà bwàbò. Kàdi Nzambi ùvwa mwà kumòna too ne dyàmwàmwà dyà kòkò aku, pa nànkù Yèyè kushebeya cintu kampànda ne kwangata bisèbà bifwè byà—bisèbà byà nyama mufwè ne wàkabùbwikila. Mashì ngàvwa ne cyà kwangata kaaba kàaci. Aci cyàkapangisha cìjì Cyèndè cìkolè aci, Wàkamòna Mashì ne wàkaalukila cyànyimà, bwalu cintu kampànda cìvwa cipòngòlòle mwoyi wàci. Èyì Nzambi wa yààya!

96 Anjì elàayi meeji ku cyòci aci! Cintu cìmwèpelè cyàpingajà Nzambi paanyimà m'Mashì. Ne kùdi Mashì ànu àmwèpelè ikalàYe mwà kwalukidila paanyimà, ngàa Mwan'Èndè Sungasunga awu. PàdiYe ùmona ne m'Mashì a Mwan'Èndè Sungasunga, Yèyè neàalukilè cyànyimà. Bwalu ki dipà didì...Nzambi mmupèeshe Mwan'Èndè, bwà kupikula aba bàakadyànjilàYe kumanya abu, ne ki cìdì cyàluja Nzambi paanyimà kumpàlà kwà cilumbulwidi Cyèndè. Kàdi pùumushiibwà Mashì awu, ne pààbìikidiibwà bònsò bàvwa badyànjila kumanya abu bwà kubwelabò mu Mubidi wà mushinga mukolè awu, Èkèleeziyà Wendè mumana kulongolola ne mwambwìbwe, dìbà adi cìjì cìkolè cyà Nzambi cìdi pa bantu.

97 Kaa, mwanèètù, kùjingikù bwà kwimana kuntwaku to! Lekèlè ngiìmanè kumpàlà kwà cingoma cyà mwambùuyi, lekèlè bànkòsòlòlè tutùpà tutùpà, lekèlè bànkòsè ne scie kaacentimètre ku kaacentimètre, lekèlè cintu kanà cyònsò cyènzekè (bu mu mucipù wà Babàndi bàà pa tubalù bàà Colomb), lekèlè bàmpandè difu ne bòshè ne soufre byòsò bidì munda mwànyì, ne mabòkò ne mikòlò yànyì bikoshiibwè, cyònsò cìdì mwà kwikalakù aci, kàdi kùndekèdiku nkiìmana ku Cilumbulwidi cyà Nkwasa Mutòoke aci kumpàlà kwà Nzambi nànsa.

98 Kaa, lekèlè ngàngatè nkwasu mukesè wa butùmbi ewu kumpàlà kwà nkwasu wa Kilistò ne ngiìtabè Mashì Èndè. Ncyèna ne cìdì ntwàla mu mabòkò àanyì emu to, Mukalenge.

Kakwèna mpokolo mukwàbo úndì mumanyè
to,

Ànu Mashi a Yesù. (Ki cyònsò cîndì mumanyè
ncyòci aci.)

Ki dyànyi ditèkemena dyònsò ne ciikishilu,

Ànu Mashi a Yesù.

⁹⁹ Kabyèna bikèmesha to pàvwà Eddie Perronet... badyombòle misambu yèndè. Pàvwàye mwena Kilistò, mwena Kilistò wa lulamatu lwà menemene, kabàvwa baswè kusùmba misambu yèndè to. Dîngà ditùkù kwambayè ne: “Nèmfùndè mukwàbò, ne dîngà ditùkù . . . nebàwítàbè.” (Bwalu bantu bàvwa bàjînga cintu citàmbe kwikala cyà bwena leelù mu misambu yà Nzambi.) Dîngà ditùkù kuntwaku Nyumà Mwîmpè kumupyà, ki yèyè kwambula kasàlà ne kufùndayè ne:

Bònsò bàsekelelè bukolè bwà Dîna dyà Yesù!

Banjèlò bàponè mikookwela;

Lwàyi ne cifulu cyà butùmbi cyà bumfùmù,

Ne nùMwasè cifulu cyà butùmbi bu Mukalenge
wa bakalenge.

Bwalu pa Kilistò, Lubwebwe lushindàme,
mpàndì mwimàne;

Myaba mikwàbò yònsò nduntekà,

Myaba mikwàbò yònsò nduntekà.

¹⁰⁰ Nànsha ciikàle èkèleeziyà, nànsha ciikàle mulundà, nànsha ciikàle mulwishi, nànsha ciikàle ditùnga, nànsha ciikàle mabanji, nànsha ciikàle bupèlè, nànsha ciikàle cîmpè, anyi nànsha ciikàle cinyi, myaba mikwàbò yònsò nduntekà! Ki cintu cîmwèpelè ncyòci aci, ndekeelu wa byònsò nebiye. Kàdi:

. . .Kilistò, Lubwebwe lushindàme, mpàndì
mwimàne;

Myaba mikwàbò yònsò nduntekà. (Kanùpu aci
mwoyi to.)

¹⁰¹ Mònaayi! Tùyaayi mu Lewitiki 16, bwà tùbalè paanyimà apu, lwà paanyimà menemene mu Bible amu mpindyewu, mu mikenji ya beena Lewi, bwà tùmònè kaaba aka mu Lewitiki—Lewitiki nshapità wa 16. Nènku kubangila ku mvensà wa 14 wa nshapità wa 16. Kaa, mèmè ntu—ntu munangè kwangata dîbà dyàbùngì pa bintu ebi, bwà kubìpàtula. Lewitiki mwinây-. . . anyi Lewitiki 16.14.

Ne yèyè neàngatè ndambù wa mashi a cimpàngà cyà ngombe, ne ààmýaminè ne munu wèndè pa nkwasà wa ngàsà (Pa nkwasà wa ngàsà! Tàngilàayi, netùbwelè mu cyòci eci paanyimà pàà katanci.) . . . lwà ku esètè; . . .

¹⁰² Kanùpu mwoyi mwakù awu “Lwà ku esètè” to! Yesù neáfuminè penyi? Ku esètè, mu ditutu dyà Butùmbi. D-î-b-à ditu dipàtukila penyi? Ku esètè. M-w-à-n-à neàpatukilè penyi?

Ku esètè. Nkwasa wa ngàsà ùvwa musòmbèlè lwà penyì? Lwà ku esètè. Ndi munùsòmbèshe bònsò mùshindù ewu batàngile ku esètè bwà cinyì? Bwà cinyì? Cyoshelu cìdi lwà ku esètè. Netùcìmònè paanyimà pàà katanci, mùshindù wùdìbi bilenga bilayà, nèncizòlè. Ndi mulòmbè bàabùngì bàmvwàku mwà kulòmba abu bwà kulwabò ne mabèji ne bikwabò, bwà nwènu kupeta twartà etu mu katanci kakesè emu. Èyo:

... ààmyaminè... lwà ku esètè; ne kumpàlà kwà nkwasà wa ngàsà neàmyaminè... mashi ne munu wèndè misangu mwandamutekete.

¹⁰³ Kaa, aci kí ncilenga anyi? “Misangu mwandamutekètè lwà ku esètè.” Ncinyì ciinè aci? Bikondo Mwandamutekètè byà Èkèleeziyà nebìikalè bibwikila kùdi Mashi. Àlèluuyàh! Mashi a Yesù Kilistò miikàlè ànu makùmbàne mu wòwò, makèlèlèlè, leelù, too ne kashidi, ne ku cikondo cyònsò, bwà kusùngila ngènzàmpèkàatù yònsò, kwondopa mubèèdi yònsò, kufikisha cishimà cyònsò, cimanyinu cyònsò ku dyenzeke. “Misangu mwandamutekètè,” kale wàwa mu Dipungila Dikùlukulu, bidimu cinunu ne nkàmà yìnaayi ne makùmi citèemà kumpàlà kwà Kilistò kulwaYè. Anjì elàayi meeji pa bwalu abu! Cimfwànyì, “misangu mwandamutekètè neyìikalè...”

Pashìshe neàshebeyè mbùji... mulàmbù wà mpèkaatù, wùdì bwà bantu awu, ne neàlwe ne mashi èndè pàmwè ne... mu cilàmbà cikùdika, bwà kwenza ne mashi awu mwàkenzàye ne mashi a cimpàngà cyà ngombe amu, ... kuàmyamina pa nkwasà wa ngàsà, ne kumpàlà kwà nkwasà wa ngàsà:

Ne neènzè difuta dyà cibawu bwà mwaba wà cijila, bwalu... bwà... bwà bukooyà bwà bânà bàà Izàlèlèlè, ne bwà matomboka àbò mu mpèkaatù yàbò yònsò: ne mùshindù awu ngwènzàye ne ntentà wa kusambakeena wa disangisha, udi musòmbèlè munkaci mwàbò udi munkaci mwà—mwà bukooyà bwàbò awu.

¹⁰⁴ Aci civwà ncinyì? “Nkwasa wa ngàsà.” Bìdi penyì mpindyewu? Nèku munda mwà mushèète wà cipungidi amu mùvwa cinyì? Mikenji. Nèku mikenji, kushipa dîyì ditùma òmwèpelè kùvwa nkufwà kakùyi luse to. Kàdi bu mùvwàbi ne wèwè uvwa mwà kupeta luse, bivwa bikèngela bwà mashi kwikalawù pa cyoshelu. Bàvwa bàmyamina nkwasà wa ngàsà. Nèku nkwasà wa ngàsà ki cyoshelu kùdi utwà binù ulòmba luse. Nzambi kanyishikù bwà twètù kucyùmusha mu èkèleeziyà yètù to, cyoshelu cyà cyena kale kùdi bantu mwà kutwà binù ne kusòka Nzambi bwà kulòmba luse aku. Ne kùdi luse lubanjìke, ne lùpòngoloka ludilekèlèlè lùumukila mu Mashi a Mukalenge Yesù. Mpindyewu, kàbìdi, ki luse ndwòlò alu. Ki nkwasà wa ngàsà nyèye awu.

¹⁰⁵ Kàdi nudi numòna mwómò emu ne, kàvwa nkwasà wa ngàsà to, bwalu kùvwa “mikenyi ne mikungulu ne méyi.” Kakwénakù mikenyi ne mikungulu ku luse to. Aci ncilumbulwidi.

¹⁰⁶ Tùbuululààyaaku mu Ekèsòòdè, nshapità wa 19 wa Ekèsòòdè ku mvensà wa 16. Ekèsòòdè, nshapità wa 19 wa Ekèsòòdè, nènku túbangilààyi ku mvensà wa 16 aku:

Nènku byàkenzeka . . .

Tèèlejààyi cidi . . . pààkabàndà Nzambi pa Mukùnà wà Sinaayi:

Nènku byàkenzeka mu ditùkù diisátù mu dindà ne, kùvwa mikungulu . . . mikenyi, ne divuba dyà mupumbu pa mukùnà apu, ne díyi dyà mpungi dikolè dyà menemene; (Díyi dyà mpungi ncinyi? Mmwarkanjèlo.) mu mùshindù wà ne bantu bònsò . . . (Tèèlejààyi!) . . . bantu bònsò . . . bàvwà mu citùùdilu amu bààkazakala.

¹⁰⁷ “Cilumbulwidi’s!” Yoyöyò! Bàvwa bendè baye kuntwaku ne Nzambi mubàpèèshe ngàsà bwà kwenzabò lwendu, kàdi bóbò bàvwa balòmbe mikenji. Bóbò . . . Nzambi ùvwa muswè bwà kwikalabò kabàyi bàsungulujangana bilondèshìle mangùmba to; bóbò bàvwa baswè kwenzelapù dngumba, cintu kampànda cìvwàbò bafwànyìnèkù kukòkelanganapù, pamutù pàà kulonda ànu Nzambi cyanàànà ne kwikala ne mwoyi mu bukòòkeshi Bwendè, mu bukòlè Bwendè. Ngàsà ùvwa mubàpetèshe mupròfetà, ngàsà ùvwa mufile difuta dyà cibawu (mwànà wa mùkòòkò), ngàsà ùvwa mubàpetèle bintu byònsò ebi, kàdi nànsha nànku bóbò bààkajinga cilumbulwidi. Bàvwa bàkèbakù cintu kampànda cìvwàbò bóbò mwà kwenza.

¹⁰⁸ Nzambi kwambaYè ne: “Bàkùngwìjè bònsò, Nèmbàmanyishè cidi bwalu. Nèmbàleejè cidi bwalu.” Balààyi! Tèèlejààyi! Kì díyi dyà mpungi kwikaladi dyènda dikola dyènda dikola mu mùshindù wà ne dyàkanyùkusha buloba. Nudi numòna cidi cilumbulwidi’s. Mémè ncyèna muswè aci to. Mpèèshè mémè luse!

¹⁰⁹ [Mwanèètù Fred Sothmann udi wàmba ne: “Mwanèètù Branham?—Muf.] Nènku . . . [Mwanèètù Branham?”] Yé? [“Mufùndù wà ndekeelu wuwàbadì awu—awu ngwèpi?”] Cìvwa ng’Ekèsòòdè, nshapità wa—wa—wa 19 ku mvensà wa 16, Mwanèètù Fred. Ekèsòòdè 19.16.

¹¹⁰ Mpindyewu, mònaayaaku mvensà wa 17:

Nènku Mòsà wàkapàtula bantu mu citùùdilu bwà kutwìlanganabò ne . . . Nzambi; (Kaa, ekèlekèle! Mémè ndi muswè katwìlangana Nendè mu ditalala, kabiyi byà mùshindù awu to.) ne bààkiimana ku luseke lwà kwìnshì kwà mukùnà. (Kule menemene.)

¹¹¹ Vùlukààyi ne, mukùnà awu wùvwa ne mikàlù myela mu nyùngulukilu wawù amu. Nànsha ngombe yèyè ànu mudìdinge mukalengè ku mukùnà awu, bìvwa bikèngela kufwàye ànu

mwaba awu, kèna mwà kubwela mu Bwikadi bwà Nzambi to. Nènku Nzambi. . . “Ki Mòsà kulwayè ne bantu abu.”

112 Mpindyewu, mvensà wa 18, mvensà udi ulonda awu:

Ne mukùnà wà Sinaayi mujimà wùwwa mu . . . mwìshì, bwalu MUKALENGE wàkatùùlukapù mu kapyà: . . . (Mwikàle ànu wùtùuka mìshì ne wùteema kapyà bu cikùtù cyà kapyà.)

113 Wàkatùùluka mu cinyi? Kí mmu Butùmbi Bwèndè bwà Shekinàh to, kàdi mu ciji cicolè cyà dilumbulwisha Dyèndè.

. . . ne mwìshì wàwù wàkabànda byenzè bu mwìshì wà cikùtù cyà kapyà, ne mukùnà mujimà wàkakanka bikolè. (Mwanèètù, mèmè ncyèna muswè kwikala mwaba awu to!)

Ne pààkadilà dīyī dyà mpungi ntàntà mule, ne kwikaladi dyènda dinànguka dyènda dinànguka bikolè, Mòsà ùwwa wàkula, ne Nzambi ùmwandamwina ku dīyī dyà mukana. (Mòsà nguwwa wakula; kī mbantu to, bōbō bāvwa bākanka cyākācyākā.)

Nènku—nènku MUKALENGE wàkatùùluka pa mukùnà wà Sinaayi, ku lusongo lwà mukùnà: ne MUKALENGE wàkabùkila Mòsà bwà kubàndayè ku lusongo lwà mukùnà; ne Mòsà wàkabànda.

Ne MUKALENGE wàkambila Mòsà ne: Tùùlukà, ne ùdimwijè bantu, bwà kabùkadi bàalwa kuseemena pabwìpì ne MUKALENGE bwà kutàngila, ne bààbùngi bàà kùdìbo kabùkadi bàalwa kubùtuka.

114 [Katùpà kàà mukàbà wà mèyi munda mutupù—Muf.] Bantu basòmbe mu ndekeelu mwà èkèleeziyà biikàle bàseka muntu kampànda udi wakula mu myakulu, anyi ùja maja mu Nyumà; bwàbò’s mbutùùke, bààpendi Nyumà Mwìmpè, batwìbwe citampì bwà kashidi! “Ewu yònsò udi wamba dīyī dibì bwà Nyumà Mwìmpè kààdyàkufwìdiiwbakù luse to mu eci cikondo, anyi mu cikondo cicilwalwà.” KùCitàngidikù to! Shààla kule naaCì anyi Citàbùùjè!

115 Mbìmpè tùshiyàayi Mufùndu awu. Nùtungunukàayi ne kucibala, citùpà cyàwù, nùmonè cidi Nzambi mwambè. Ki bantu kwambabò ne: “Kaa, Mòsà, akùlù wèwè. Nzambi kààkulukù kàbìdì to! Tudi tujinga mpindyewu ne katùvwakù ne cyà kwikala balòmbe ciinè eci to.” Nwamònu anyi? “Akùlàku wèwè neetù, Mòsà. Nzambi Yèyè mwakùle, twètù bònsò tufwàfwa.” Nwamònu’s, Nzambi ùwwa mwenzè difuta dyà cibawu.

116 Mpindyewu: “Dīyī dyà ku Nkwasa wa butùmbi.” Mònaayi mu Nkwasa wa butùmbi ewu, “kumpàlà kwà Nkwasa wa butùmbi kùwwa mitootò mwandamutekète,” Dīyī dyà mitootò. “Mèyi,” nudi numòna’s. Kùwwa àbùngi mu Bwàkabuulwibwà 4 emu, anyi 5, mutùdì tusangana ne: “Ne ku Nkwasa wa butùmbi

kùvwa kùpàtuka mikenyi, mikungulu, ne mēyi.” Kadiyi dīyi *dīmwepelè* to; “mēyi,” ku búngi. Cívwa ncinyi? Nzambi wàkula ne èkèleeziyà, ùDileejila mu Nyumà mwandamutekète ayi. Pàdi mulaaba mulelèlè wa Nzambi wàkula, n’Dīyi dyà mukana dyà Nzambi! KuDibènga nkuumusha kwà citèekedi cyà mwëndù. Nwamònu anyi? “Mēyi,” Dīyi dyà Bikondo Mwandamutekète byà Èkèleeziyà (lwà mu ditumba emu), mēyi àkula ne mikungulu ne mikenyi.

117 Leelù ewu ngukaadibo ne: “Èè, twètù katùtu twitabuuja bàmba ‘ifernò’ mu cyambilu to.” Kaa, luse wè! Kacyakacya! Hmm! Bidi bitùkèngela balùmè bàà Nzambi, balùmè bàdì kabàyi bàshàala balamè bwalu kabàyi bàbwàmbila bantu to!

118 Mpindyewu, muntu yònsò kēna mwà kwikala muyiishi to, kàdi wēwè udi ne dīyi dyà mukana’s. Ne pawikalà kùyi mwà kuyiisha bantu diyiisha to... Pawikalà muyiishi, udi mubiikidiibwe bwà kubànda mu cyambilu bwà kuyiisha. Wēwè kùyi mubiikidiibwe to, udi ànu muyiishi, kàdi yishà bantu diyiisha ku *nsòmbelu* webè. Diyiisha dyèbè diikalè dyà ku *nsòmbelu* webè, nènku ki cidì Dīyi dyà Nzambi dyàfwishà bundù aba bàdì bàDibènga. Bàdi bàmba ne: “Muntu nànsha umwe kēna mwà kutwà munu pa nsombelu wa mulùme awu anyi mukàjì awu to. Ùdi ne kalolo, mu nsòmbelu... Yèyè... Bu ne kùvwakù mulùme wa Nzambi, mmulùme awu anyi mmukàjì awu.” Nwamònu’s, yishà mayiisha ku nsòmbelu webè. Kùteeci bwà kuàyiisha pawikalà kùyi mubiikidiibwe bwà kwikala muyiishi to; neùbwejakajè byònsò’s, wēwè mwine, ubivwija cimbòndambònda, ne neùbwejè bantu mu bwalu bwà mwandanjinga, ne kwàkumanya... Èè, kàbidì, ne—neùbàbùtwishè pamwè ne wēwè mwine. Yishà diyiisha dyèbè ànu ku nsòmbelu webè!

119 Muyiishi mmubiikidiibwe bwà kuyiisha dyèndè, ne kudiyiishila kàbidì ku nsòmbelu wendè. Wēwè kùyi mwà kuCīyiishila ku nsòmbelu webè, dībà adi imànyika diCīyiisha. Kàdi udi ne cyà kuyiishila mayiisha èbè ku nsòmbelu webè.

120 Èyo, apa pàvwa “mēyi.” Kaa, mùshindù mwinè wùdibi bitùkèngela mu Jeffersonville binunu byà mēyi maleeja mu nsòmbelu’s wè, mukungulu wà Nzambi wùkungwila mu kalolo ne cijila, bukezùke, nsòmbelu yà kayi mikooyike to, yèndakana pa buloba leelù ewu, kàyi ne kalèma to. Èyowà’s, mukalenge, beena Kilistò balelèlè, aci mmukungulu wà dilwisha naawù mwena lukunà. Dyabùlù kēna ùcyùka mùdì mwà kutuuta mikòbolò mikolè amu to; dyabùlù kēna ùcyùka mùdì mwà kutùpika anyi mùdì mwà kwenza *bikampànda* anyi kwela mbilà mikolè amu to. Kàdi cidì citàpa dyabùlù ku mwoyi nkumòna nsòmbelu mujidila, wa cijila mudilàmbùle kùdì Nzambi awu; umwamba cintu kanà cyònsò eci, umutwà dīnà kanà dyònsò, yèyè ànu ne kalolo ne mwèndè mwònsò ne mutùngùnùke ànu

ne kuya. Kaa, ekèlekèlè! Aci's cidi cimwimansha ànu kwàka, ki mukungulu wùdi wùnyúkushà dyabùlù ngwòwò awu.

¹²¹ Mbyenzè ànu bu ne: “Èè,” mùdi wamba, “bu yèyè mwà kuyiishakù bu Billy Graham anyi Oral Roberts, anyi bu muntu kampànda, mwakudi munène wa bwenzeji, mmufwànyine kwikala . . .” Kaa, to! Míngà misangu dyabùlù's ùtu ànu ùseka abi. Yèyè kàtu ùtàmba kutùma ntèmà ku abi to mubìmòne bu kakùyi bwalu. Udi upeta tèdòlòjì—tèdòlji yònsò ùvwà ukèba ne dilongeshiibwa dyònsò dyà mu sèminèrè adi, kàdi dyabùlù ùdi ùshààla musòmbe ànu pòlàà mwikàle ùbìseka. Kàdi pàdiye ùmòna Mwoyi awu!

¹²² Tàngilàayi bayiidi abu kuntu kwàka, mwànà mubùlùke uvwa ditùkù adi ne disaamà dyà ciseki awu, bàmba ne: “Pàtukà munda mwèndè, démon! Pàtukà munda mwèndè, démon! Pàtukà munda mwèndè, démon!”

¹²³ Démon awu musòmbe mwab'awu, kwambayè ne: “Mpindyewu, kanwènàku munkacì mwà kudifwisha nwènu biinè bundù anyi? Mpindyewu, nudi numòna cinùdi nwenza aci anyi? Yesù mmunwàmbile, mMunùtùme ne mudimu, bwà kulwa kungiiyata. Nànsha umwe wa kunùdi kàyi mwà kucyènza to.”

¹²⁴ Kàdi, mwanèètù, pàdìbo bàMumòna ùlwa, Kampànda ùlwa wènda ne ditalala dyònsò. Uh-huh. Kaa, ekèlekèlè! Kabìvwa bìkèngela Àmbè cintu nànsha cimwè to. Démon awu ùkaavwa mumbè mukwàcike ne bwòwà ànu apu. Úvwa mumanyè ne bìvwa bìkèngela bwà kuumukayè, cyà bushùwà, bwalu ki Mwoyi wùlwalwà awu; kacìyi ànu diyiisha to, kàdi Mwoyi. Yèyè ne: “Pàtukà munda mwèndè.” Kaa, ekèlekèlè! Aci's cyàkenza bwalu! Ne ditalala dyònsò; Yèyè ùvwà mumanyè civwàYe wàmba, Úvwa mumanyè civwàYe wènza.

¹²⁵ Mpindyewu: “Mèyi,” mèyi a mpungi mwandamutekète awu, àvwa mmèyi a mìtootò mwandamutekète, baamìsànjeelà mwandamutekète. Kàdi mpindyewu tàngilàayi apa:

. . . ne . . . myèndù mwandamutekète . . . kumpàlà kwà nkwasà wa butùmbi, yìdi Nyumà mwandamutekète yà Nzambi.

¹²⁶ “Myèndù mwandamutekète.” Tùzòlèku ndambù kaaba aka, Nkwasa wa butùmbi, mwaba wà cijila, disangisha. Nènku ànu apa ki pàvwà (ùmwè, ibìdi, isàtù, inaayi, itaanu, isambòmbò, mwandamutekète) mìtootò mwandamutekète, myèndù mwandamutekète, baamìsànjeelà mwandamutekète, Nyumà mwandamutekète; kabiyi menemene byùmvwija ne Nzambi ùdi mu Nyumà mwandamutekète to, kàdi “mamwèneshiibwa mwandamutekète a Nyumà Mwìmpè umwèumwè awu.”

¹²⁷ Nyumà Mwìmpè ùdi penyì? Ku Nkwasa wa butùmbi eku, mwikàle ùkenkesha mu cikondo cyònsò cyà èkèleeziyà. Eci cikondo cyà èkèleeziyà cidi cidileejila mu mùshindù ewu, mèyi a Nzambi, Yesù Kìlistò umwèumwè awu makèlèlèlè,

leelù, too ne kashidi. Nwamònu's, mwandamutekète, kùvwa “mèyi.” “Ne myëndù mwandamutekète yiteema kapyà,” Nyumà mwandamutekète, “yidì Nyumà mwandamutekète yà Nzambi.”

128 Nudi bavùlùke ne kùkaadi maadyàlumingu ndambù àtùdi bafikèku, dibwe dinènè dyà mbongò adi anyi? Kàdi ndisonga mu mishindù yàbúngi mishilèshilàngàne bwà kuleeja kapyà ne makènkè byùmukila kudìdi. Ki mùshindù ngwòwò awu's: “Yesù Kilstò ùdi cibangidilu cyà bufùki bwà Nzambi,” Bwàkabuulwibwà 1. Ncyà bushùwà anyi? Nènku Nzambi wàkafùkiibwà dībà kaayi? Yèyè ùdi cibangidilu cyà bufùki bwà Nzambi. Ne Nzambi ngwa Cyendèlèlèlè. Ncyà bushùwà anyi? Kàdi pàakafùkiibwà Nzambi . . . mpààkiimiciibwà mwànà mukesè munda mwà maamù, virgò. Ne maamù awu wàkabanga kwibaka tubùlù twà mashi etu munda mwèndè bwà kulelayè mwànà mukesè ewu, mwine uvwa cibangidilu cyà bufùki bwà Nzambi awu, “Bwalu Nzambi wàkavwijiibwà mubidi ne wàkasombela munkaci mwètù, ne wàkalwa *Èmanùwèlè*: ‘Nzambi neetù,’ cibangidilu cyà bufùki bwà Nzambi.”

129 Pashiishe mu Cilengà cinène cyàkafùmà ku lupwishi aci . . . bwalu Yèyè ùvwa mwenza ne lupwishi. Ncyà bushùwà anyi? Yèyè ùvwa ùdya byàkudyà ànu mündi mèmè ndyà emu, Ùvwa ùdya byàkudyà ànu mùdi wèwè udyà amu. Mbwenza kwamba ne, lupwishi lwà mubidi, Yèyè kulwa kàlisyumù, binshidimba, mpiitùloolù, bukènkè bwà mu cibwàshìbwàshì, kàdi munda Mwèndè mùvwa musòmbèle Bukènkè bwà Cyendèlèlèlè. Kabyèna bìkèmesha to pàakambilà beena meeji abu Mùtootò awu ne: “Tùlombòlèku ku Bukènkè Bwèbè bupwàngàne.”

130 Bàvwa bàleeja ànu Bukènkè bwà Bukènkè bùmwèpelè bupwàngàne. Nènku ki Yèyè uvwa mwaba awu awu, Bukènkè bupwàngàne bwà Nzambi, cibangidilu cyà bufùki bwà Nzambi. Mpindyewu, mwômò amu Yèyè ùvwa . . .

131 Mmunyi mùvwàYe mwà kuDìleeja kùdi mìtootò Yèndè yà pa buloba, paanyimà pàà beena meeji abu bamanè kuMumòna mu Dyulu, ne balwè nyumà mikwàcishi pa buloba apa? “Wàkatàpiibwà mpùtà (Dibwe dinènè dyà mbongò adi, disonga) bwà dishipa dyètù dyà mikenji, muzaajìbwe bwà bubì bwètù, dinyooka dyà ditalala dyètù dyàkapòna pambidi Pèndè, ku mibùndàbùndà Yèndè twàkondopiibwà.” Divwa dyenza cinyi? Didìleeja!

132 Muntu kanà yònsò udi wàmba mùdiye musadidi wa Nzambi, mwikàle ùvila dyondopa dyà kùdi Nzambi ne bukolè Bwèndè, kèna ùpetela bukènkè bwèndè ku Dibwe dyà mbongò adi to, kèna ùpetela bukènkè bwèndè ku Nkwasa wa butùmbi awu to. Bwalu Dyòdi didi dìMuleejila Yèyè umwèumwè awu makèlèlèlè, leelù, too ne kashidi mu mìtootò mwandamutekète ayi ne mu Bikondo Mwandamutekète byà Èkèleeziyà.

133 Kaa, butumbi kùdi Nzambi's wè! Ndi ngeela meeji ne mbyàkàne bwà mwambi kukuukwilayè Nzambi mwikàle ku cyambilu, ne disàkidila ne ditumbisha ne luumù ne bukolè. Kaa, mùshindù mwinè wùdibi bilelèlà, wùdibi ànu bitùpisha musùùkà wànyì ne disànka mu mùshindù wà ne ndi ndyùmva ànu bu mufwànyine kwela mbilà mikolè, ne kunyeemakana ne kutùpika kuya muulu ne mwànyì mwònsò, bwalu kùdi Cintu kampànda munda mwànyì cidì cinshintùlùle cinguumùshe ku cìmvwà. Ncyèna cìvwa cìkèngelà bwà mèmè kwikala to, ne ncyèna cìndì muswè kwikala to, kàdi ndi mumanyè ne ndi mushintùlùke muumùke ku cìmvwà kale wàwa. Cintu kampànda ncyenzèke, cintu kampànda ncyenzèke!

134 Nènku kwimana apa ne kumòna Dìyì dyà Cyendèlèlè didi dicimùne cipeepèlè cyònsò cyà mvùla edi! Pàakateetàbo bwà kwosha Bibles ne bikwàbò, Yèyè's wàkatungunuka ne kupeepa ànu bu ne kakùvwa bwalu, bwalu mMwambè ne: "Maulu ne buloba nebijiminè, kàdi Dìyì Dyànyì kadyàkujiminakù to."

135 Mwab'ewu pabwìpì ne mu Chicago emu mpindyewu, ne Bible kampànda—kampànda ùdi ùsanganyibwa pa cyambilu cyà èkèleeziyà. Kale menemene kumpàlà kwà Mvità yà Kumpàlà yà Buloba bujimà, mpandanjila kampànda wàkamupeta ne muntu kampànda mukùdimùne mucìma, ne ùvwa muswè kupèèsha mpandanjila awu Bible wendè, kwambayè ne: "Ncyèna mwà kukupèèsha ewu nùnkù to, mààmù nguvwa mumpèèshe ewu nùnkù." Yèyè ne: "Mèmè, pàngìikalà mwalùkile kwànyì, nènkutùminè wa cyanààna."

136 Kwalukilayè dyàmwàmwà dyà mbù kàdi màzùwà kampànda a mwinshì mwà màyì a beena Àlèmanyè kutaayishayè màzùwà a—a màyì awu. Kabàakapeta nànsha kasùnsukilà kààwù to. Kàdi bidimu bibìdì bimanè kupìta, kwìnshì menemene lwà ku mwelelu kwà mbù, kumònabò kashèètè kalèlème pa màyì. Bàmwè kwelabò meeji ne cìvwa cìfwànyine kwikala cintu kampànda cìvwa cidìnè mu màyì, ki kupàtulabò kashèètè aku ne kukàkàngulabò, bantu bàbìdì mbàvwà bènda bèndakana kuntwaku. Kàdi mwòmò amu, cintu cìmwèpelè cìvwa cipàndùkekù, mùvwa Bible awu uvwayè ùtùmina mpandanjila awu. Mmutèeka pa cyambilu pabwìpì ne Chicago apa leelù ewu, mu èkèleeziyà kampànda wa ba-Méthodistes. "Maulu ne buloba nebijiminè, kàdi Dìyì Dyànyì kadyàkujiminakù to."

137 Mu cikondo cyà dipaasalala dyà màyì mùneemu emu, mu cidimu cyà 1937, kaèkèleeziyà kakesè kàà kale aka, pàvwàku panshì bitoci ne bikwàbò bìvwàmu abi, tuvwa twendela kumutù kwàkù mwaba ewu mu—mu bwàtù bwà diita. Màyì àvwa mabànde. Nènku, èè, dilòòlò adi pàngàakamanà kuyiisha Èvànjeeliyò ne mushiye Bible wànyì mutèeka pa cyambilu apu pàngàakalukilà kumbèlu; mwikàle ndyànjlila kwamba ne dipaasalala dyà màyì adi òvwa mwà kulwa, mèmè kwamba ne:

“Ndi mumumòne ùpima mètres àsambòmbò ne citùpà kumutù kwà mùsèèsù wà Spring Street eku.”

138 Mwanèètù wa kale Jim Wiseheart ne bakwàbò kunsekabò. Udi uvùlùke aci anyi, Mwanèètù George? Mémè ne . . . Yèyè—yèyè ne: “Kaa, Billy, mu cidimu cyà ’84’s bivwa ànu bu ne centimètres dikùmi ne yìnaayi mu mùsèèsù wà Spring Street.”

139 Mémè ne: “Mémè ndi mumòne muntu ùpweka ùfùmina mu maulu, ne wàngata mucì wà dipima naawù ne ùwàsa mu mùsèèsù wà Spring Steet mwàmwa, wàmba ne mmètres àsambòmbò ne citùpà.”

Yèyè ne: “Cyùdi udi ànu musalùke cyanààna.”

Mémè ne: “Ncyèna musalùke to! Cidi ng’EMU MMÙDÌ MUKALENGE WÀMBA!”

140 Nùbàkonkàayi ne mmètres bùngì kaayi kumutù kwà mùsèèsù wà Spring Street aku. Mètres àsambòmbò ne citùpà jaa—jaaaja! Menemene.

141 Kàdi Bible wa kale mwaba wùvwàye muyiishìbwe dilòdòlò adi awu. . . Mvùla kubangayè kulòka, dipaasalala dyà mâyi kubweladi myaba yònsò ne bikwàbò, ne èkèleeziyà wa kale ewu. . . Nkwasa kubàndayi muulu e kukatwàyi too ne mu pàlàfò, Bible kubàndayè buludì too ne mu pàlàfò amu, dipaasalala diyè mu myaba yònsò ne mâyi mamubàndishe. Cyambilu kubàndaci buludì. Kupwekabi; ne nkwasa ne nkwasa kwalukila e kusòmbayi mu kaaba ànu kàmwèkàmwè aku, ne Bible kwalukila e kusòmba pa kaaba ànu kàmwèkàmwè aku, ne mâyi ònsò awu, ne mucikàle ànu mubuulula, nshapità umwèumwè awu pa kaaba ànu kàmwèkàmwè aku.

142 “Maulu ne buloba nebìjiminè, kàdi Dìyì Dyànyì kadyàdyàkujìminakù to.”

143 Mùshindù mwinè wàkalèlemà Bible awu mu mâyi a mukèlè awu munda mwà bidimu bìbìdì kabìyikù nànsha bìnyanga myakù yìvwà mifùndaMù ayi’s wè! Mèyi a Nzambì mmalelèlè. Amen.

144 Ndi muvùlùke paanyimà pàà cyòci aci, Mwanèètù mukùlumpè Jim Wiseheart wàkasànkishiibwa bikolè bwà cyòci aci, musangu wònsò wùvwàye ùpeta dikùyila pa dibòkò dyèndè. . . Wàkapeta disaamà dyà mùshindù kampànda pààkaavwàye ne bidimu bu makùmi mwandamutekètè ne bitaanu, kupetayè binyòka. Dikùyila adi òvwà òvwà dimusaamisha *apa*, ùvwà ùnyeema ùkangata Bible awu, ùmubuulula, ùmutèèka mwaba awu, dikùyila dikwàbò lwà kwìnshì *eku*. Mémè kufika kuntwaku dínghà ditùkù ne yèyè ùvwà ne Bibles bùngì cyanààna pambidi mu mùshindù wà ncìyikù mwà kumòna Mwanèètù Jim mwinè to, ùvwà ne Bibles bùngì cyanààna pambidi pajimà! Yèyè ne: “Mmulayi wà Nzambì!” Ki cyòci aci’s.

145 “Maulu ne buloba nebìjiminè, kàdi Díyì Dyànyì kadyàdyàkujìminaku to.”

146 Ndi mvùluka ne mukùlumpè awu uvwa ne ciibidilu cyà kulwa mwaba ewu bwà kummòna. Ncyèna ngeela meeji ne muntu nànsha umwe wa mu fàmiyè wèndè ùdi kaaba aka to. Nènku mvwà ne ciibidilu cyà kumukwàcishakù ndambù, nudi bamanyè’s, ku musangu ne ku musangu, bwalu ùkaavwa mukùlàkaji ne ùvwa ne dijinga dyà mfrangà ne ùvwa ùlwa. Kwambayè... Dìngà ditùkù mvwà mwasè lwendu nya ku Canada, dyà nkùdimuka anyì, mpàtuka ànu mu ciibi cyà lupangu nùnkù, ki yèyè ne: “Billy, mwanàanyì wa balùme, òmwè dyà ku matùkù aa newàlukilè ne Tatwèbè-mukwàbò Jim kààkwikala kàbìdì wa ùbànda ùpweka mu njila ewu to.” Ki wùvwà musangu wà ndekeelu’s. Pàmvwà mu Canada apu, mèmè kupeta mukenji wa ku nshinga; wàkafwà ànu mwaba awu mene mu mabòkò a Mwanèètù wa bakàjì Morgan. Wàkapeta disaamà dyà mwoyi mwimàne, ne bààkaya nendè lubilu ku lùpitaadi, kubàndulukayè e kumutàngila kàdi ki kutùulayè nkìnda’s.

147 Mwanèètù wa bakàjì Margie, udi kaaba aka mu dindà emu anyì? Pa ciibidilu yèyè ùtu ùlwa mwab’ewu. Nwènù bònsò nudi bamanyè. Dimwè dyà ku màsaamà manènè a kànsèrè mu Lùpitaadi lwà ba-Baptistes mwàmwa mwàkamubalàbo bu mufwè kùkaavwa bidimu dikùmi ne mwandamutekète, mu Clinique Médicale pa mikàndà yà bibùcìlu ayi ne, yèyè “mmufwè disaamà dyà kànsèrè,” kùkaavwa bidimu dikùmi ne mwandamutekète. Mmusòmbèle mu Mùsèèsù wà Knobloch ku nombà 412, ùkwàta mudimu wà buumungàngà mu lùpitaadi alu mùneemu emu. Kaa, ngàsà udi ukèmesha, mùshindù mwine wùdì díyì adi dyà kalolo’s wè!

148 Jim Tom Roberson, mwakwidyanganyi mu Louisville, ne twètù bònsò tudi bamanyè Jim Tom awu. Ki cyàkamufikishà ku diitabuuja Mukenji ewu, wàkaya kuntwaku. Ne tatwèndè ngumwe wa ku bamfùmù bàà cisùmbù aci mu lùpitaadi alu. Wàkaya e kukenketayè bwalu abu, bwà kujandula ní ncyà bushùwà ne mukàjì awu ùvwa ùpùnga ne lufù lwà kànsèrè, bamulekèle ne bamupingàje kumbèlu, ne beelè meeji ku dyàbò dimanya ne ùkaavwa mumanè kufwà. Ki tatwèndè kucikenketayè munda ne paanyimà, kàdi mbulelèlè. Ki Jim Tom kwambayè ne: “Mmafi; mmusòmbè ànu mùneemu emu patùdì twakulangana apa, mèmè ndi mwà kuya neebè kùdiye.”

149 Kaa, kaa, Yèyè—Yèyè’s n’Nzambì mulelèlè, kí mmwòmò anyì? Mèmè ndi ne disànka dyàbùngì mùdiYe mwà kutàngila bilèmà byètù kàyi ùbimòna, kàdi wèwè? Ki cìdì citùfikisha ku diMunanga ne mwoyi wètù wònsò.

150 Nkwasa yà butùmbi, mikenyi... Cinyì? “Myèndù mwandamutekète,” anyì myèndù, anyì mìtootò mwandamutekète, yibìkidiibwa ne “Nyumà

mwandamutekète,” yùmvwija mamwèneshiibw-... mamwèneshiibwa mwandamutekète a Nyumà Mwimpè a Bikondo Mwandamutekète byà Èkèleeziyà mu nkwasà yà ngàsà mwandamutekète bwà bantu. S’ki yôyi eyi: nkwasà yà ngàsà mwandamutekète, nkwasà mwandamutekète, èkèleeziyà mwandamutekète, mìtootò mwandamutekète, mamwèneshiibwa mwandamutekète, Nyumà mwandamutekète, myëndù mwandamutekète. Kaa, ekèlekèle, mùshindù mwinè wùdi Nzambì mupwàngàne menemene’s wè! Yònsò . . .

151 Bitèèka muntwamu mu bulondyanganyi bwà nombà yà Bible; bulondyanganyi bwà nombà yà Bible ki cintu cidi citàmbe kwikala cipwàngàne cidiku pa buloba. Kwèna mwà kupeta cilèmà nànsha cimwè kuumukila ànu ku Genèsè too ne ku Bwàkabuulwibwà to, mu bulondyanganyi bwà nombà yà Bible. Kakwènakù mukàndà mukwàbò wà mifùndù yà kubala mùdi kùyi mwà kupeta cilèma kumpàlà kwà kubala mvensà yisàtù to; kàdi kî mmu Bi- . . .

152 Mbateetè munda mwà bidimu bipite pa nkàmà yìbìdì bwà kusàkidila katùpà nànsha kàmwè kàà cyambilu ku Disambila dyà Mukalenge, anyi kuumushilaKù kàmwepelè. Ndipwàngàne! Kwèna kàbìdì mwà kusàkidila anyi kuKùùmushila to. Bàvwa bèèla meeji ne mbafwanyine kulengejakù disambila adi ndambù. Nebàteetè kufunyikaMù *cikampànda*, ne kwelaMù *cikansanga*, anyi kuumushaMù *cikankènga*; kabyèna ànu bìmpè to. Nwamònu’s, nDipwàngàne! Njila yònsò yà Nzambì mmipwàngàne.

153 Ki bwà cinyi twètù katwèna bapwàngàne to, kàdi Yèyè mmwambè ne: “Ikàlaayi bapwàngàne mùdi Taatù wenù mu Dyulu mupwàngàne.” Tudi mwà kuciikala munyi? Ku Mashì a mushinga mukolè a Yesù Kilistò, bwà kudìpwà twètù biinè mwoyi ne kwikala ne mwoyi ànu munda Mwèndè. Ki bwalu mbwòbù abu. Mùshindù mwinè wùdi Wu à mushinga’s wè!

154 Èyo, mvensà mwi6 mpindiyewu bu twètù mwà kubwelamù. “Myëndù mwandamutekète.”

Ne kumpàlà kwà nkwasà wa butùmbi . . . kùvwa mbù wa lumwènù mufwàngàne ne ntàlatalà: ne munkaci mwà nkwasà wa butùmbi, ne mu nyùngulukilu wa nkwasà wa butùmbi, mùvwa nyama yinaayi myùle tètè ne mèsù kumpàlà ne paanyimà. (Kaa, ekèlekèle! Tàngilàayi eci!) . . . nyama myùle tètè ne mèsù—myùle tètè ne mèsù kumpàlà ne paanyim- . . . (Mpindiyewu, indilaayi.) . . . kumpàlà kwà nkwasà wa butumbi . . . kùvwa mbù wa lumwènù mufwàngàne ne ntàlatalà: ne munkaci mwà nkwasà wa butùmbi, mùvwa yinaayi . . . ne mu nyùngulukilu . . . nkwasà wa butùmbi, mùvwa nyama yinaayi myùle tètè ne mèsù kumpàlà ne paanyimà.

155 Mpindyewu, “mbû wa lumwènu.” Nwènu bìikalà mwà... Ndi... Eci kaciyèna citàmbe kwikala cimfwànyi kaaba aka to, kàdi ndi muswè kukùpula eci bwà katanci kakesè. Mpindyewu, mpindyewu tudi baswè ànu kulongakù mwab’ewu kakesè cyanààna. Mbû wa lumwènu awu mmufwànyikija mu ntempèlù wa kale, bwalu Mòsà ùvwa mupetè diyì dimutùmina kùdi Nzambi bwà kwibaka ntempèlù pa buloba mùvwàye muMumòne mu maulu amu. Bantu bònso mbamanyè aci. Èyo.

156 Nènku ngànji ànu nzolè ndambù kaaba aka mpindyewu, ngamba ne, eci ncivwà mushèètè wà cipungidi wà Dipungila Dikùlukulu, èyo, cintu cidì cilondà, cívwa cibìikidiibwà ne “Mwaba mutàmbe cijila.” Ne mwaba wùvwà wùlondà wùvwa ncyoshelu, wùvwà wùbìikidiibwà ne “mmwaba wà cijila.” Ne kumpàlà mene kwà *apa* kùvwa “mbû wa cyamù cyà kabanda,” mùdiye ubìikidiibwa. Mu ngaakwilù mukwàbò, wùvwa mmwaba wùvwà mulàmbù...milàmbù yívwa yìsukudiibwa—yívwa yìsukudiibwa *apa* kumpàlà kwà kwitabuujiibwayì...ku cyoshelu; ku cyoshelu cyà cyamù cyà kabanda, anyì cyoshelu cyà cyamù cyà mitakù kùvwàbo bòoshila mulàmbù aku.

157 Mpindyewu, tudi baswè kutàngila eci mpindyewu mwaba wùvwà...mwaba wùvwàci awu. Nènku, mpindyewu—mpindyewu, mu mbû wa lumwènu ewu...ùvwa kumpàlà kwà Nkwasa wa butùmbi ne kumpàlà kwà mwaba wa cijila. Ànu...Mpindyewu vùlukàayi ne, bitèèkedi byà myèndù mwandamutekète abi bìvwa bitèèkiibwe *apa* mùshindù ewu, ne kulwa dilòngò kampànda dyà cyowelu. Nwamònu anyì? Mpindyewu, ki wùdi wùfidilà bukènkè mwaba wà cijila too ne *apa*. Mpindyewu, pawìkalà...to, kabyèna bikèngela bwà wèwè kufùnda eci to ànu pèbè muswè kucifùnda, kàdi aci cidì...Ndi ne cintu kampànda cikwàbò mwab’ewu cìmvwà mudizòlèle, cìndi njinga kunùtwàdila. Kàdi mpindyewu, nudi numòna’s, eci cívwa cibìikidiibwa ne mbû wa cyamù cyà kabanda; kacívwa ànu bunène abu menemene to, cívwa citèèkiibwe mu mùshindù kampànda bilondèshile mwaba mu ntempèlù. Cívwa citèèkiibwe bu mu mùshindù ewu *apa* nùnkù, cívwa mmbû wa cyamù cyà kabanda, cívwa ndilòngò dyà cyowelu dyanza ne cyamù cyà kabanda mùvwàbo bàsukwila milàmbù. Kumpàlà kwà milàmbù kwoshiibwayì anyì kwitabuujiibwayì, bìvwa bìkèngela kusukudiibwayì.

158 Kaa, aci kí ncifwànyìnekù kwenza diyìisha mpindyewu mene anyì, wèwè Ngàngàbukà? Kaa, ekèlekèle! Aci kí ncifwànyìnekù—aci kí ncifwànyìnekù ànu...Cidì ànu cìndenga’s, “bàyìsukula.” Kumpàlà kwà mulàmbù kanà wònsò kwitabuujiibwawù kùdi Nzambi, bìdi bìkèngela kwanji kusukudiibwawù. Bishi? Kí mmu disaluka nànsha, kàdi musukula ku Dìyì. Mpindyewu, tudi bafwànyine kwalukila cyànyimà bwà kafika mwaba wùdi laabi wa beena Yudà ewu...pàmvwà nyiisha diyìisha dyà màyi a ditàpulula adi, ngombe mukùnze wa lukùngùlù, màyi

àvwà malama awu, àvwàbò bènza mâyi a ditàpulula. Nèngu kumpàlà kwà twètù kufikakù kùdi Nzambi ne diitabuuja dilelèlà, bikèngela twǎnji kulwila ku mâyi a ditàpulula. Èyowà's, mukalenge. Bikèngela ùlwilè ku cinyi? Ku Díyi!

¹⁵⁹ Kaa, ngǎnji mmonèbi ní ndi mwà kwakula ànu mu mùshindù wà ne newikalè. . . muntu yònsò neàcìpetè. Mpindyewu, vwàla ngeelèlù webè wa meeji wa nyumà awu. Umùshà kafulu kàà cijèngù kàà mvità aku kàdi ùwalè ngeelèlù webè wa meeji wa nyumà mpindyewu, bwalu ki cintu kampàndà cìlwalwà eci. “Ùsukudiibwa kumpàlà kwà kwitabiibwawù ku cyoshelu,” wùdi ne cyà kwanji kusukudiibwa mu mâyi a ditàpulula.

¹⁶⁰ Mpindyewu, buulùlaayi pamwè naanyi ne lùkàsà lwònsò mu Efèsò 5, lamà ànu kaaba kèèbe aku kàdi wàlukilè cyànyimà, mabèji makesè cyanàànà paanyimà, mu Efèsò nshapità mwi5 ku mvnsà wa 26:

*Bwà wàmòna mwà kumujidila ne kumukezula. . .
(Èkèleeziyà, ngudiyè wàmba awu.)*

¹⁶¹ Nwamònu's, mpindyewu, ngǎnji ngàalukilèbi cyànyimà ndambù kupità apu. Alùkilaayi lwà ku mvnsà wa 21, panùcidi nukèba apu:

*Nùkookelanganè muntu kùdi mukwèndè mu diciina
dyà Nzambi.*

¹⁶² “Nùkookelanganè.” Disangisha, kòòkelàayi mpaasàtà wenù. Mpaasàtà, kòòkelà disangisha dyèbè. Kaadingumba kakesè kòkò kajuukè, kwikadi anyi ku elu luseke anyi ku lukwàbò to, kòòkelà disangisha dijimà. Disangisha, nwènù babangè kaadingumba kampànda, kòòkelàayi mpaasàtà wenù mu diciinà dyà Nzambi. Nwamònu anyi? Kaa, mwanèètù! Hmm!

*Bakàji, kòòkelà bàyeebè sungasunga, bu udi ukòòkelà
Mukalenge, (Bwalu yéyè mmukalenge webè.)*

¹⁶³ Mbanganyi bàdi bamanyè nàngu, nwènù bakàji? Ncyà bushùwà menemene. Bible ngudi mwambè nàngu ku cibangidilu. Cìcidi ànu mùshindù wùm wèwùm wè awu.

*Bakàji, kòòkelà bàyeebè sungasunga, bu udi ukòòkelà
Mukalenge.*

*Bwalu mulùme ùdi mutù wà mukàji, ànu mùdi Kilistò
mwikàle mutù wà èkèleeziyà; ne yéyè mmusùngidi wa
mubidi awu.*

¹⁶⁴ Ki mùdi kàbìdi mulùme. Nwènù bònsò nudi bamanyè aci, nwènù bàdi mu dibàkà ne bakùlumpè, anyi bàna bàkaadiku bakolè bwà kumanya mùshindù wà nsòmbelu abu. Èyo.

. . . bu udi ukòòkelà Mukalenge.

*Bwalu mulùme ùdi mutù wà mukàji, ànu mùdi Kilistò
mwikàle mutù wà èkèleeziyà; ne yéyè mmusùngidi wa
mubidi awu.*

Ki bwà cinyi bu mùdì èkèleeziyà ùkòòkela Kilistò, pa nàнку bakàji bàkookelè baabàyaabò mu kantu ne kantu kònsò.

Balùme, nùnanngàayi bakàji bèèni, ànu mùdì Kilistò munangè èkèleeziyà, ne mudifile yèyè muwinè bwà bwalu bwèndè; (Kùmudyatàkàji ku makàsà to! Wèwè wenza nàнку, kwèna mukùmbànyine kwikala mulùme to. Ncyà bushùwà!)

Bwà wàmòna mwà . . .

Tèelejàayi, ncyòci eci! Cyùmvwàayi mpindyewu:

Bwà wàmòna mwà kumujidila ne kumukezula ku disukula dyà màyi awu ku . . . [Disangisha didi dyàmba ne: “Diyi.”—Muf.] Hmm!

¹⁶⁵ Dìbà adi, mukuukwidi yònsò udikù ùpeta mwà kubwela mu *Eci* bìkèngela àlwilè ku Dìyi. Kùdi bààbùngì menemene bàdì bàlwa mu mùngà mùshindù. Ntu ngiitabuuja tuumaalu-tulonda twà tukesè twà ne “maamù wàkafwà kùkaadi bidimu byàbùngì ne mmukwindile mu Dyulu” atu, aci cidi cimpè *paanyimà pàà* Dìyi dimanè kwangaciibwa. Bantu bààbùngì bàtu bàlwa ku cyoshelu bwalu mbaswè katwilangana ne mamwàbò mu Dyulu. Abi bidì ànu bìmpè, bìvwa bìkèngela wèwè kwenza nàнку, kàdi kì mbwà aci bùdì uvwila ku cyoshelu nànsha. Udi ulwa ku cyoshelu mwikàle utonda mpèkaatù yèbè bwalu Kilistò wàkafwà pa kaaba kèèbè, ku Dìyi!

¹⁶⁶ Pashiishe, mulàmbù kanà wònsò wùdì kawùyi wùlwa bilondèshile Dìyi kawèna wìtabiibwa dìbà adi to. Ncyà bushùwà anyi? (Kaa, mwanèètù, ntu ngumvwa bibì bwà kwamba eci. Kaa, ntu ngumvwa bibì bwà kucyàmba’s. Nùmfwilèku luse bwà dicyàmba.) Ki bwà cinyi Byenzedi 19 mmwimàne mu Bible ne: “Nukàadi bapetè Nyumà Mwimpè kacya nwìtabuuja anyi?”

Bòbò kwamba ne: “Twètù . . . to ne kùtukù . . .”

Yèyè ne: “Dìbà adi, nwàkabàtijiibwa mùshindù kaayi? Bwà cinyi kanwèna babwelè Mwòmò emu?”

¹⁶⁷ Bàvwa balwilè njila wa cyanàànà kàyi wa Dìyi to! Bòbò ne: “Kaa, s’tudi bapicile ku mèyi àdì àkèngediibwà kwamba’s, twàkabàtijiibwa . . . Yone.”

Yèyè ne: “Aci kacyakukùmbanakù to. Yone wàkabàtiiza ànu bwà kanyinganyinga cyanàànà, kacivwa bwà dilekelediibwa dyà mpèkaatù to.”

¹⁶⁸ Nènku pààkumvwàbo Cyòci eci, bààkabàtijiibwa cyàkàbìdì. Bwà cinyi? Ku Dìyi! “Basukula ne màyi a Dìyi.” Dìyi ndyambè ne: “Dìnà dyà Yesù Kilistò!” Cyònsò cidi cilamika ní ncinyi cyònsò cikwàbò ku Cyòci aci ncyà mafi!

¹⁶⁹ Mpindyewu, mwanèètù wanyì wa mushinga mukolè, ndi mumanyè ne eci cidi kàbidì mukàbà wà mèyi. Mpindyewu,

kusalukukù to. Lekèlà ngàmbèku eci ne dinanga dyà cijila, dîbà dyàseemènyì dyà nciyikù kàbìdì mwà kushààla mupùwe nciyi ngamba maalu aa to, twatàmbi kuseemena pabwìpì ne Dilwa. Nwamònu anyi? “Ci-Trinitaire ncyà dyabùlù!” Ndi ngamba ne EMU MMÜDÌ MUKALENGE WAMBÀ! Tàngilààyi kùdici cifùmine. Ncifùmine ku Concile de Nicée pààkangatà èkèleeziyà wa Kàtòlikè bukòokeshi. Mwakù “bùsàtù” kî mmutèèdiibwekù nànsha mu Mukàndà mujimà wà Bible to. Kàdi bwà Nzambì *yisàtù* kaayi, aci ncyà mu ifernò. Kùdi Nzambì umwèpelè. Aci ncyà bushùwà menemene.

¹⁷⁰ Mpindyewu, dîbà adi udi wamba ne: “Udi witabuuja ne bantu bônso bàdì—bàdì ba-Trinitaires aba mbàà mu ifernò anyi?” To, mukalenge. Mémè ndi ngiitabuuja ne mbeena Kilistò. Kàdi dîbà dikaadi diseemena, mwanèètù, diikalàbo bapiile pààbò ne meeji matòòke.

¹⁷¹ Muntu kanà yònsò, mwaba kanà wònsò, dîbà kanà dyònsò, udi muswè kwakula pa cyena-bwalu aci, àlwe kùndì mémè; mwambi kanà yònsò, mwèpiskòpò, mwèpiskòpò mutàmbidile, cyònsò cyùdi mufwànyine kwikala aci. Ne eci cidi cikwàciibwa pa mikàbà yà mèyi, neciye pa buloba bujimà. Ndi ndòmba mu dinanga dyà bwànà bwètù, bwà muntu kanà yònsò udi untèeleja pa mukaba wa mèyi ewu pa buloba bujimà, wìkala mwà kulwa kùndì kundeejakù kantù kàmwè kàà mu Mifùndu anyi kasaka kàmwè mu bwalu-bulonda kanà bwònsò (bwikàle bwalu-bulonda bujaadiikiibwe) mùvwàku muntu nànsha umwe mubàtùjiibwe mu dîna dyà “Taàtù, Mwànà, ne Nyumà Mwìmpè” too ne pààkalwàbo kudyenza bulongolodi pàmwè ne èkèleeziyà wa Kàtòlikè, nènshintululè dilongesha dyànyì. Muntu yònsò wàkabàtùjiibwa mu Dîna dyà Yesù Kilistò! Nènku bânà bèètù bàà mushinga mukolè, mèsù ènù mmafofomija ku bintu abi. Sambilaayikù bwà Nzambì ànùpèèshè Bukènkè!

¹⁷² Mpindyewu, wèwè ne Mufùndù bwà kucitwa nyama ku mikòlò, mémè nènshaalè mukwindile anyi ntèeleja bwà kupeta dibìikila dyèbè. Wèwè udi...udi...Paanyimà pàà mumanè kuumvwa mukàbà wà mèyi ewu, udi wendela ne budiswìle bwònsò mu dipanga dyà mu nyumà pawikalà kùyi ungeela kadyòmbò pa bwalu abu. Nwènù baswè kumanya cidi Bukènkè ne cidi mîdimà, twèbejàayi Nzambì. Vùlukàayi ne, ndi ngamba EMU MMÜDÌ MUKALENGE WAMBÀ! Nwènù biitabùuje ne mémè ndi musadidi Wendè...Ne piikalàbi ne aci kacivwa bilondèshile Dìyi to, ncifwànyine kwikala cyà mashimi. Dîbà adi cyòci kaciyi bilondèshile Dìyi to, bùdì naabù mbwà kulwa kundongolola, uh-huh, ùmonà cidi cyènzekà. Uh-huh. S’nantùpàkànyì!

¹⁷³ Mémè ndi ngiitabuuja ne binunu ne binunu byà ba-Trinitaires bàdì biitabùuje Nzambì yisàtù abu mbasungidiibwe, bwalu kî mbamanyè dishiilangana to. Netùkafikè ku cyòci aci mu diyiiisha edi kumpàla eku.

174 Mpindyewu, kanwìmanyikikù mukàbà wènù wà mèyi nupàtuka mu nzubu amu to, nwènù bàna bèètù ba-Trinitaires; tèèlejàayi Eci. Kàdi sòmbaayi ànu talàlà ndambù wa tusunsa. Nudi beena dibànzà kunùdi nwènù biinè. Nudi beena dibànzà kùdi disangisha dyènù. Nwamònu anyi? Kanùlekedì kwikala kwangata mikàbà yà mèyi to, shààlaayi ànu naaCì. Cìkenkètaayi ne Dìyi kàdi nùmonè nì nCilelèlà. Bible mmwambè ne: “Nùkenketè bintu byònsò.”

175 Ndi mumanyè ne kí nCyà mwasàkànaayi to, ki mùvwà pèndè Yesù, ki mùvwà Mukenji pààwù, misangu yònsò. Nuvwa bannangè pàmvwà ndwa ngondopa babèèdi ne beena ntàtù munkacì mwènù apu, nuvwa nudyàmbidila mùvwàci cinène, misùmbà minène yà bantu ne nudyundisha èkèleeziyà. Mpindyewu, Yesù wàkenza cintu cìmwècìmwè aci too ne ku ditùkù dyàkafikàYe ku Bulelèlà. Kàdi dyà Wènza nànkù, ne makùmi mwandamutekète mene kuMushiyabò. Kì kukùdimukaYe kùdi bakwàbò abu, dikùmi ne bàbìdi abu, kwamba ne: “Nudi baswè pèènù kuya anyi?”

Ki Peetèlò kwambaye mèyi a mushinga mukolè awu ne: “Mukalenge, nkùdi nganyì kutùdi bafwànyine kuya, bwalu Mèyi Èbè Wèwè nkààyaawù ngàdi a Cyendèlèlè?”

176 Ne Dìyi dyà Nzambì nkààyaadi ndìdi dyà Cyendèlèlè! Nènku ndeejàayaaku mwaba nànsha wùmwe wùkaadìku Nzambì mwenzè ne muntu kampànda àbatiijibwè mu dìnà dyà “Taatù, Mwànà, Nyumà Mwìmpè.”

177 Nudi nuya mu Maatàayi 28.19 ne: “Taatù, Mwànà, ne Nyumà Mwìmpè,” mùdi Maatàayi mwambè ne: “Ndààyaaku, nùkalongèshè bàà matùngà ònsò, nubàbàtiiza mu Dìnà dyà Taatù, Mwànà, Nyumà Mwìmpè” amu anyi? Nènku muntu yònsò udi wela meeji ne “Taatù, Mwànà, Nyuma Mwìmpè” ndìnà, aci cìdi cìleeja ne kùdi cintu kampànda cipampàlámùke mu dilonga dyèndè dyà tùlaasà. (Mpindyewu, bwà mulongi wa kàlaasà kàà mwandamutekète wàmbila aci bèèpiskòpò bàdi munkacì mwà kutèèleja Eci abu.) Taatù kí ndìnà to, Mwànà kí ndìnà to, ne Nyumà Mwìmpè kí ndìnà to. Bìdi mmyànzu yìdi yitàngila Dìnà (dyà Taatù, Mwànà, Nyumà Mwìmpè), didi Yesù Kìlistò.

178 Vùlukàayi ne, aci kí mmu ciiji to, ncyamba mu dinanga ne kaneemu kàà cijila, ne dinanga ne ditwàngana dyà mushinga bwà Mubidi mu kaabujimà wà Kìlistò kùndi mubiikidibwe kùdi bàna bèètù bàà ba-Trinitaires (ne pa buloba bujimà) bwà kulwa kuyiisha mu disangisha dyàbò. Kàdi ncitu ncitèèlakù to pàndi munkacì mwènù apu. Mémè ntu muswè kwikala... Ambà ànu wèwè mwinè munkonkè, ne nènye neebè ku nzùbù wa mpaasàtà bwà kuyiikila neebè pa bwalu abu. Kàdi kumpàlà kwà disangisha dyèbè, s’mbifwànyine kubàbìndulula. Nkaaba kèèbè wèwè bwà kupeta Dibuuulula ne kuya kayiisha cisumbù cyèbè cyà mikòòkò, wèwè kí mulami wa cisumbù cyà mikòòkò aci. Bàndi

ngambila aba mbambi. Wêwè kùyi muumvwè to, lwàku, túsombè túnanè lungènyi pàmwè. Bible mmwambè ne: “Nùkenketè bintu byònsò, ne nùkwatè bikolè ku cidi cìmpè.”

¹⁷⁹ “Mbù wa lumwènu,” mùvwà mulàmbù wùsukudiibwa... Ne twètù twàkasukudiibwa... Kaa, kanùpukù aci mwoyi to, tudi twalukilakù paanyimà pàà katancì ne: “Basukula ku màyi a Dìyi.” Dìbà adi bikèngela ùteelejè Dìyi kumpàlà kwà wèwè kumòna mwà kubwela mwómò amu, bwalu kùdi mùshindù ànu wùmwèpelè wùdiku mwà kuseemena kùdi Nzambi, nku diitabuuja. Mmwómò anyi? “Diitabuuja didi difùma ku dyumvwa, dyumvwa dyà Dìyi,” disukula dyà kondò keètù kàà mwoyi. Kí mbwà kutwilangana ne muntu, kí mbwà kutwilangana ne taatù, kí mbwà kutwilangana ne maamù, kí mbwà kutwilangana ne mwànà wa mu dibòko (abi byònsò mbilelèlè, netwènzè byòbì abi), kàdi cintu cyà kumpàla kutùdi ne cyà kulwila mmùsèèsù wà Nzambi wà dikùseemenena; netùsukudiibwè patùdi tuumvwa Dìyi dyà Nzambi.

¹⁸⁰ Ku diitabuuja nkutùdi twenda. *Ngàsà*, “cidi Nzambi mukwenzèle.” Ncyà bushùwà. Udi witabuuja Nzambi, udi witabuuja mu Nzambi; pàdìbi ànu ne wànyingàlàdi, wàmanyi kufwidiibwa luse.

¹⁸¹ Mùmvwà ngaakula ne mwanèètù kampànda wa balùme makèèlèlè awu, mupele ndambù wa cibwejàkàji pa bwalu abu, kí mèmè kwamba ne: “Tàngilà, mwanèètù, pawikalà mwambè cintu kampànda bwà kutàpa mukàjèèbè ku mwoyi, dyàkàmwè udi unyingalala bwà bwalu bwèndè, udi unyingalala mùdi mucyènzè, ukààdi munyingàlàle munda mwà mwoyi wèbè. Ncyà bushùwà. Kàdi bikèngela ùye kamwambilaci. Bikèngela ùye wambè ne: ‘Munanga wanyi, ndi—ndi nyingalala mùndi mwambè nànkù.’ Dìbà adi udi munyingàlàle munyingàlèlèlemù.” Mpindyewu, kí mùshindù wudìbi ne Nzambi nànkù.

¹⁸² Muntu udi mufwànyine kuya ne kwamba ne: “Ndi mumutàpe ku mwoyi, kabyèna ne cìdìbi bìshintulula to, nèmwmwambilè mùndi munyingàlàle, kàdi ncyà bushùwà ne ncyèna munyingàlàle to,” wèwè udi mwena lubombo. Nwamònu anyi? Ncyà bushùwà. Aci kacýàkwakidiibwa kùdi Nzambi to.

¹⁸³ Bikèngela wikalè munyingàlàle ànu menemene bwà mpèkaatù yèbè. Dìbà adi paudi umanya ne wànyingàlàdi bwà mpèkaatù yèbè, ne pashìishe “Kanyinganyinga, ne nùbatiijiibwè mu Dìnà dyà Yesù Kilistò bwà dilekelediibwa dyà mpèkaatù yènu, nènkù neupètè difwidiibwa dyà luse, neupètè Nyumà Mwìmpè.” Nwamònu’s, bipeepèle ànu peepelee, Nzambi mmucìvwijè cipeepèle.

¹⁸⁴ Apa...tudi tumòna apa mu “mbù wa lumwènu,” ùvwa mufwànyikija ne ntàlatalà. Mpindyewu, mbù wa lumwènu ùdi cimfwànyì, ùvwa mufwànyikija ne mbù wa cyamù cyà kabanda. Ewu mbù ngwa lumwènu, mu Dyulu. Mòsà wàkamumòna bu

mbû wa lumwènu ne wàkenza cyàkabiikiidiibwà ne “mbû wa cyamù cyà kabanda,” cyoshelu cyà cyamù cyà mitakù, mulàmbù wà cyamù cyà mitakù . . . cyoshelu cyà cyamù cyà mitakù’s wè.

¹⁸⁵ Nudi bamanyè cidi cyamù cyà kabanda cyàmba mu Bible anyi? Cilumbulwidi. Yèyè wàkenza nyòka wa cyamù cyà kabanda. *Nyoka* ùdi ùmvwija cinyi? Cimfwànyì cyà *nyòka* cìvwa cyùmvwija “mpèkaatù mumana kulumbulwisha,” mu budimi bwà Edènà, pàvwàbi ne: “Cikànkanyà cyèbè necizaazè mutù wèndè; mutù wèndè newùzaazè cikànkanyà.”

¹⁸⁶ Ne *cyamù cyà kabanda* cidi cileeja “Cilumbulwidi cyà Nzambi,” cyoshelu cyà cyamù cyà kabanda, mwaba wùvwàbo bòòshila mulàmbù awu; dilòngò dyà cyowelu dyà cyamù cyà mitakù, mwaba wùvwàwu wùsukudiibwa ne màyi a Dìyi. Nwamònu anyi? Mòs- . . . Eliyà, mu matukù èndè, wàkapàtuka e kutàngila muulu, kwambayè ne: “Dyulu didi dimwèka bu dyà cyamù cyà kabanda.” (Cilumbulwidi cyà Nzambi pa ditùngà dibèngiibwe.) Kaa, ekèlekèle! Cyamù cyà kabanda, cyamù cyà mitakù!

¹⁸⁷ Mpindyewu tudi ku “dilòngò dyà cyowelu.” Ne nwamònu ne dilòngò dyà cyowelu edi divwa munda mutupù ne divwa ditòòke zee ànu bu ntàlatalà. Bwà cinyi? Èkèleeziyà ùkaavwa mumanè kupikudiibwa!

¹⁸⁸ Mpindyewu, mpindyewu, tudi tumòna pashiishe ndambù, nànsha nànu, pàdi bansantu bàà ku Dikènga dinène abu bàpàtuka, tudi tucisangana cyàkàbìdì cyùle tètè ne kapyà. Nuvwakù bamanyè. . . Nudikù baswè kubala aci anyi? Tùyaayi mu Bwàkabuulwibwà mpindyewu, nshapìtà wa 15, mvensà mwi2, tùbalàayi mwaba wutùdi tumòna cyàkàbìdì kapyà kàà cyamù cyà kabanda aka awu. Èyo:

Nènku ngàkamòna mwanjèlò mukwàbò . . . Ngàkamòna cimanyinu cìkwàbò mu dyulu, (Cyà bushùwà.) cinène ne cyà cikèmesha, banjèlò mwandamutekète biikàle ne . . . bipùpù byà ndekeelu mwandamutekète; bwalu mu byòbì abi mmùle tètè ne ciiji cìkolè cyà Nzambi.

Mpindyewu “ciiji cìkolè” cyà Nzambi. Tàngilàayi:

Nènku ngàkamòna bu ne cìvwa mbû wa lumwènu musambakaja ne kapyà: (Mpindyewu, tàngilàayi.) nènku aba bàakapetà bucìmunyi pa nyama wa lwonji, ne pa cimfwànyì cyèndè, ne pa cimanyinu aci, ne pa nombà wa dinà dyèndè abu, bàvwa biimàne pa mbû wa lumwènu awu, biikàle ne . . . nzènzè yà Nzambi.

Ne bàvwa bimba musambu wà Mòsà musadidi wa Nzambi, . . .

¹⁸⁹ Kaa, nudi nucimòna anyi? “Cikondo cyà Dikènga dinène.” Kaa! Nudi mu dilwijakaja anyi? [Disangisha didi dyàndamuna

ne: “To.”—Muf.] Èyo, tèèlejàayi, tumònàayibi cintu kampànda mwaba ewu.

¹⁹⁰ Tudi tulwa munyi? Bikèngela tülwe (Èkèleeziyà wa bàà Bisàmbà byà bendè ewu) ku Dìyi edi, mbù wa lumwènù, máyi, máyi a Dìyi (Ncyà bushùwà anyi?), kujingulula Dìyi mùshindù wùdiDi difùndiibwe awu. Dìbà adi mulàmbù wùdi wàkidiibwa ne wùjiibwa tètè ne Nyumà Mwîmpè kubangila munda, wùbàlakeena ku Bukènkè bwà cikondo aci. Kuumukila ku eci. . . Ki Bwòbù bùdi bùpàtukilà mu mwaba wà cijila ebu bùbwela *emu*, bùpàtuka mu mùtootò bùbwela *emu*. Nwacyùmùvù anyi?

¹⁹¹ Mònaayi, mpindyewu, ku ndekeelu kwà cikondo eci, Yone, pàakamònayè mbù wa cyamù cyà kabanda kwaka, ùvwa “mutòòke zee bu ntàlàtalà.” Cìvwa ncinyi? Dìyi òvwa dyumushìbwe pa buloba, dyambwìbwe mu Èkèleeziyà, ne òvwa “dìtòòke zee bu ntàlàtalà,” kakùciyi kàbidi Mashi to, cikondo cyà Èkèleeziyà civwa cijikè.

¹⁹² Mpindyewu, mu Bwàkabuulwibwà 15, bàshàadilè bàà ku Dimiinu dyà mukàji, bàvwà bantsu bàà mu Dikènga dinène bàakapìcilà mu Dikènga dinène abu, mbàakasanganyiibwà (Tàngilàayi!) biimàne pa mbù ewu. Ne mbù awu ùvwa mùle tètè ne kapyà, mashi, ndimì mikùnze yilàkuka, kapyà kàà Nzambi. Bàvwa bapetè bucimunyi pa nyama wa lwonji (Loomò), pa nombà wendè, pa dìletà dyà dìnà dyèndè, ne pa cimfwànyi cyèndè (Nsangilu wa Maèkèleeziyà), ne bàkaavwa bapàtùke. Ne ku diyiisha dyà Mòsà ne Eliyà, bapròfetà bàbidi bààmwenekà kùdi Izàlèelà abu bwà kupàtula. . . kasùmbù kàà bantu aka, bantsu bàà Cikondo cyà Dikènga dinène abu, bàabwejiibwà mu cikondo aci abu, cìvwa. . .

¹⁹³ Nwamònu’s, Èkèleeziyà mmumànè kwambwibwa mpindyewu, kàdi vùlukàayi ne Mukàji ùdi pa Nkwasa wa butùmbi. Cikondo cyà Dikènga dinène. . . Aba bàvwà ne mwoyi mu makalenge, pambèlu, ne bàlwa ne bamfùmù bààbò bònsò ne luumù lwàbò ne butùmbi bwàbò mu Cimenga aci. Patùdi tukabwela mu Bwàkabuulwibwà 22, nenùcimònè. Panwikalà nufùnda eci ne nucilama, patwàfikàku nenùmonè citùdi baswè kwamba aci. Katwèna ànu ne dìbà dyà kwangata kantu kakesè kònsò ne kutwà naakù kumpàla ne paanyimà to, kàdi tudi tulenga myaba yàcì minène. Pashìishe dīngà ditùkù, pàmwàpa, bu Mukalenge mwà kwanyisha, netùpetèku dìbà dyàbùngì dyà kwakulapù.

¹⁹⁴ Mpindyewu, bantsu bàà Cikondo cyà Dikènga dinène bàakajuukà aba, mbàakapìcilà mu makènga manène. (Èkèleeziyà kàakupìcila mu Dikènga dinène to! Nudi numòna ne bóbò bàkaavwa mu Butùmbi anyi?) Nènku ki bantsu bàà mu Dikènga dinène mbóbò aba, bajidiibwe bàvwà ne. . . bu mùdibi ne ncilèmà cyànyi mèmè ne cilèmà cyènu nwènù mùvwàbo kacya kabàyikù bumvwè Dìyi. Byòbi ne bàvwa baDìtèlèje kàdi

baDibenge, bàakaya mu ifernò; bàakeediibwa mu mĩdimà yà pambèlu bwalu bàakabenga Dìyi. Kàdi bu bòbò kacya kabàyikù baDyũmvwè to, Nzambi mmwakàne, Cikondo cyà Dikènga dinène cidi cibàvwila.

¹⁹⁵ Mpindyewu, mōnaayi katançi kakesè cyanàànà. Bansantu basukula ku Dìyi òimwèdimwè adi, bwalu ncyoshelu cimwècimwè aci, mmbũ umwèumwè wa lumwènù ne Dìyi òimwèdimwè adi. Bwàkabuulwibwà 2.5, Bwàkabuulwibwà 15: (anyi) :2 too ne ku :5. Mōnaayi, katançi kakesè cyanàànà. Mpindyewu, kacya twètù katùvwakù babàtwàdile Dìyi to, ki bwà cinyi bàvwa—bàvwa mùshindù awu. Kacya katùvwakù babàtwàdile Dìyi to, nebàtwèlè bujitu abu pambidi. Pa nàнку katwàkwikalakù mwà kubàkula bantu bōnsò to; Èkèleeziyà kàakucyènza to (mu eci cikondo) udi ne Bulelèlè awu. Bwalu bòbò nebàpicilè mu Dikènga dinène, kì m'Bansantu bàakafwà kale wàwa mu bikondo byà èkèleeziyà abi abu to, bwalu yèyè mmwambè ne: “Mbapàtùke mu Dikènga dinène,” ne Dikènga dinène pààdi dicide dilwa, paanyimà pàà Èkèleeziyà mumàne kwalukila Kumbèlu.

¹⁹⁶ Kaa, ki bwalu mbwòbù abu's! Kaa, mèmè ndi mucinangè! Tèelejàayi! Twànji tuyaayi kule ndambù, ndi muswè kumōna ne n'Dìyi dyà mùshindù kaayi dyàkumvwàbo adi. Mpindyewu, túbangilàayi cyàkàbidi ku mvensà mwi2 wa nshapità wa 15.

Nèngu ngàkamòna bu ne civwa mmbũ wa lumwènù musambakaja ne kapyà: nèngu aba bàakapetà bucimunyi pa nyama wa lwonji, . . . pa cimfwànyi cyèndè, . . . pa cimanyinu cyèndè aci, . . . pa nombà wa òinà dyèndè, bàvwa biimàne pa mbù wa lumwènù awu, biikàle ne . . . nzènzè yà Nzambi.

¹⁹⁷ Mpindyewu, nwamònu's, kacya kabàvwakù babwelè to, kàdi bàvwa bumvwè Dìyi. Bàvwa bumvwè Dìyi. Mpindyewu, tèelejàayi, mōnaayi ne n'Dilongesha dyà mùshindù kaayi dyàkumvwàbo, mōnaayi ní cidi cipetangana ne Èkèleeziyà leelù ewu.

Ne bàvwa bimba musambu wà Mòsà musadidi wa Nzambi, (Mbwena kwamba ne, mpaanyimà pàà Mòsà mumanè kuya dyàmwàmwa.) ne musambu wà Mwànà wa mùkòòkò, bamba ne: Byenedi byèbè mbinène ne bilenga byà dikèma, Mukalenge Nzambi wa Bukolè bwònsò; (Mwànà wa mùkòòkò awu Nganyi?) Mukalenge Nzambi wa Bukolè bwònsò; njila yèbè mmyakàne ne milelèlè, wèwè Mfùmù wa bansantu.

¹⁹⁸ Nudi numòna cyàkajingululàbo ne ncidiYe anyi? Kàyi mupersonà mwisàtù mu búsàtù to, kàdi “Mukalenge Nzambi wa Bukolè bwònsò, Mfùmù wa Bansantu!” Tèelejàayi! Nudi badìlongòlòle anyi? Mvensà mwi4:

Nganyì wabènga kukuciina, Éyì Mukalenge, (ne dileetà dinène M-u-k-a-l-e-n-g-e, Elohim) ne kutumbisha...Nganyì udi mushàale wabènga kukuciina, . . . ne kutumbisha dìnà dyèbè? . . .

199 Bávwa basukula kùdì mâyi àmwèàmwè anùdì basukùdiibwe nwènú aba naawù aa, bàtèeleja Díyì, ne diitabuuja ne bukolè byà ne Yesù Kilstò ngudi wa Bukolè bwònsò. N'Dibuulula mu kaabujimà dyà ku cibangidilu. Cintu cyònsò mu kaabujimà ncikùta mu Dibuulula dyà ne Yesù Kilstò Nganyì: “Nzambì muvwiijibwe mubidi munkaci mwètù!”

. . . Dìnà dyèbè ndinène ne dyà dikèmesha, . . .

Nganyì wabènga kukuciina . . . ne kutwà dìnà dyèbè mushinga? wèwè . . . udi . . . bwalu wèwè nkààyeèbè ngudi wa cijila: bwalu matùnga ónsò neàlwe kukuukwila kumpàlà kwèbè; bwalu dilumbulwisha dyèbè ndimwènèshùibwe.

200 Mu ngaakwilù mukwàbò: Tudi tumòna cìdì kubènga kuCyàkidila kwènza, dilumbulwisha Dyèbè dìdì munkaci mwà kumwèneshiibwa. Pa nàнку ki twètù aba biimàne, tudi basukùdiibwe mpindyewu, tudi munkaci mwà kusukudiibwa ne mâyi paanyimà pàà bapicile mu Cikondo cyà Dikènga dinène. Tudi baKutwè nyama ku mikòlò ne tudi baKwitàbùuje, ne mpindyewu tudi biimàne pa mbù wa lumwènú, ne tudi munkaci mwà kuKupà lumù ne butùmbi bu cimfwànyì cyà Nyumà Mwîmpè Webè. Ne tündeyì Twèbè ntulelèlè ne dilumbulwisha Dyèbè ndyakàne.

201 Kaa, ekèlekèlè! S'tudi bafwànyìne kushàala lumingu lujimà pa cyòci aci. “Dibàtiiza dyà Nyumà Mwîmpè,” twànji tüzolààyikù cintu kampànda apa mene mpindyewu, katanci kakesè cyanàànà, ndi ne cintu kampànda cìndì njinga kuzòla. Mpindyewu, twànji, bwà cinyi katwèna twangata ànu cyòci aci mwaba mene wutùdì tusanganyiibwa awu.

202 Mpindyewu, bu twètù mwà kumòna, cimfwànyì cinène ncyòci eci. Mpindyewu, Mwaba mutàmbe cijila ngwòwò ewu. Èyo. Mwaba wà cijila ngwòwò ewu. Ne wà kumpàlà ngwòwò ewu, kumpàlà kwà kufika kwàka, pàdi mbù awu—awu.

203 Èyo, mpindyewu mònaayi. Tudi tuseemena kùdì Nzambì munyi? “Diitabuuja didi difùma ku dyumvwa, dyumvwa dyà Díyì dyà Nzambì,” didi dileejùibwe kuumukila mu Mwaba mutàmbe cijila dibwela mu mùsànjeelà wa cikondo.

204 Kale mu, ne awu. . . Mu ntempèlù wa Solòmò, cìdì cìfla bukènkè, tündeyì atu tùvwa tùfla makènkè àtù mu dilòngò dyà cyowelu dyà cyamù cyà kabanda aci. Pa nàнку, apa, mwanjèlò wa cikondo cyà èkèleeziyà ùdi ùleeja mu mâyi amu ne Muntu udi emu awu Nganyì, mwikàle ùleeja luse Lwèndè, Méyi Èndè,

cilumbulwidi Cyèndè, Dìna Dyèndè. Byònsò mbileejiibwe emu mùdi wèwè mutàpulula mu kuCìitabuuja. Nwacyúmùvù anyi?

205 Mònaayi mùdi eci cilenga kaaba aka, tuvwa twakulapù ditùkù adi. Tàngilàayi apa, *apa*: “Ki bwà cinyi biikàle babingìshiiibwe, babingìshiiibwe ku diitabuuja.” Èyo, mwaba *mwibidì*, paanyimà pàa yèyè mumanè kusukudiibwa: “mujidiibwe.” Nènku, *pashiishe*, “muujiibwe tètè ne Nyumà Mwîmpè.” Dibingishiibwa, dijidiibwa, dibàtiiza dyà Nyumà Mwîmpè! Nwacyúmùvù anyi? Mukenji Wèndè wùvwa bìshi? Dibingishiibwa ku dyumvwa; dijidiibwa ncyùdi wèwè wenza; ne bwà kutwà mshinga ku cyùdi mwenzè bwà dyanyisha dyà cyòci aci, Nzambi mmukutwè citampì ku Nyumà Mwîmpè.

206 Mpindyewu, wèwè, mwanèètù wanyì wa ba-Baptistes, ndi njinga kukukonkakù cintu kampànda. Wèwè udi wamba ne: “Ncinyi cikwàbò cìvwàku Abraham mufwànyine kwenza pa kuumusha kwitabuuja Nzambi? Ne Nzambi’s wàkamubadilaci bu bwakàne.”

207 Ki cyònsò cìvwàye mwà kwenza, *apa* mene, Yèyè wàkiitabuuja Nzambi. Kàdi Nzambi, bwà kwitaba diitabuuja dyèndè adi, s’wàkamupèesha citampì cyà ditengudiibwa ne kumutwà citampì, bìleeja ne bìvwa bikèngela bwà Nzambi itab-...wàkiitaba diitabuuja dyèndè. Kàdi wèwè ujikula diitabuuja mu Nzambi, kàdi kacya kùyikù mwanji kutwibwa citampì kùdi Nyumà Mwîmpè...Efesò 4.30, nwènú baswè kucifùnda, Èfeso 4.30: “Kanùbungamiji Nyumà Mwîmpè wa Nzambi unùdi batwibwe nendè citampì!” Ne kwèna mutwibwe citampì to paùdi kùyì mupetè Nyumà Mwîmpè.

208 Cìdi cìshààla too ne ku dìbà kaayi? Too ne ku ditàbuluja didi dilondà anyi? “Too ne ku bupikudi bwètù, Ditùkù mene dyà bupikudi adi.” Kakwèna mùshindù wà kuumukaKù to. Kwèna mwà kuumukaKù to, bwalu Yèyè kàakukuumuka to. Nwamònu anyi? “Bwalu nudi batwibwe citampì too ne ku Ditùkù dyà bupikudi bwènù.” “Kakwèna cintu nànsha cìmwè cìcilwalwà, cintu nànsha cìmwè cìdiku mpindyewu, njìwù mikolè, nzala, nyòtòtà, lufù, anyi ní ncinyi cyònsò, cìdi mwà kutùpandulula ne dinanga dyà Nzambi didi mu Kilistò to.” Pòlò wàkamba ne: “Mèmè ndi mutwishiiibwe menemene bwà cyòci aci!” S’ki bwalu mbwòbù abu! Ki bwalu mbwòbù abu’s, udi mutwibwe citampì too ne ku Ditùkù dyà bupikudi bwèbè.

209 Mònaayi, aci’s necikatùfikishè cyàkàbìdi ku byà—byà dyàlumingu dishààle. Ndi ne dìbà anyi? Ndi ànu...Tàngilàayi, tàngilàayi eci nùnkù, nyumà...nyumà, musùukà, ne mubidi. Èyo, nwamònu’s: mubidi, musùukà, nyumà.

210 Mpindyewu, ngànji nkupulè aci bwà nnùlongolwèlè cintu kampànda kaaba aka. Mpindyewu, nèngiikalè mwà kuzòlakù cintu kampànda kaaba aka, ncìvwa mupetè mpùngà wa kucizòla mu dyàlumingu dishààle to nènku ndi mèmè mwinè mudizòlèlèci

kaaba aka pa dibèjì dyà kàlaabi edi. Ndi muswè nùcifundè bwà nùfikè ku dimòna cìndi muswè kwamba, mpindyewu, nwênù bàdì ne crayons yènù abu. Mpindyewu, *eci* mmubidi; ne *eci* mmusùùkà; ne *eci* cìdi (dileetà dinène N-y-u-m-à) Nyumà, Nyumà Mwímpè. Èyo. Mpindyewu, ki bitùdì benjìlbe naabi mbyòbì abi.

211 Bu nwênù mwà kumòna *apa* nùnkù, mwaba wà cijila, Mwaba mutàmbe cijila; *apa* ncyoshelu, mwaba wà cijila; ne *apa* mbù—mbù, ki mwaba wunùdì nuumvwila Díyì awu ne: “Dii tabuuja dìdì difùma ku dyumvwa, dyumvwa dyà Díyì,” ditàpulula, mbù wa ditàpulula, mbù wa ditàpulula. Mpindyewu, mònaayi *eci*. Mpindyewu, kùdì cibweledi ànu cìmwèpelè bwà kubwela *emu* nùnkù, ne mbwena kwamba ne bìdì bìkèngela wǎnjì kufika *apa* dyàmbedi. Mmwómò anyi?

212 Mpindyewu, mvw’a kujingakù ngíkala ne mwaba, nùnkù ndi mutèèke *apa* nùnkù ne, “baa—baavirgò.” Pàvwà. . . “Didyà dyà Dibanjì,” cikwàbò. Nudi numòna mwàkabwelà muntu ewu *apa* mu Didyà dyà Dibanjì, ne mubwelè mu mùshindù kampàndà wà cyanààna amu anyi? *Apa* mpàvwà Ciibi. Yesù wàkamba ne: “Mémè ki Ciibi.” Ne mèèsà a didyà dyà dibanjì àvwa matèeka *apa* ne bantu basòmbe bònsò mu nyùngulukilu amu, kàdì muntu kampànda nyèyè ewu mwaba ewu uvwa kàyi muvwàle Civwàlù cyà Dibanjì to. Nènku pààkabwelà Mfùmù, Yèyè kwamba ne: “Udi mufikè *apa* bishi, mulundà wanyi? Mmuni mùdiku mubwelè *apa*?” Bivwa bìleeja ne kàvwa mubwelèle ku *eci* Ciibi to. Úvwa mukabwelèle ku didìdiishì kampànda anyi mukabwelèle ku mushikù wà kumfundo, anyi ku twitabàayi anyi dǎngumba kampànda. Kàvwa mubwelèle ku Ciibi to!

213 Bwalu ku bantu bàà kale bàà kùdì dǎbà dǎpàtukila bàcìdì ànu ne cintu cìmwècìmwè aci, pàdì mubàki ùsèlangana, ùdì wàbanya tubèjì twà mabiikila ne ùpèèsha muntu ne muntu udiyè mubiikile awu mùzàbì.

214 Kaa, mùshindù mwinè wùdì mwoyi wànyì wùnyùnguluka pàndì nkwelela meeji’s wè! “Muntu nànsha umwe kèna mwà kulwa kùNdi pàdì Taatù Wanyi kàyi mwanjì kumupèèshe dibìikila to, ne bònsò bàdì Taatù muMpèèshe nebàlwe kùNdi.” Tuvwa babiikidiibwe munyi? Kumpàlà kwà difukà dyà dyulu ne buloba nkwaafundiibwà mènà ètù mu Mukàndà wà Mwoyi wà Mwànà wa mùkòòkò, bwà kumòna Bukènkè, bwà kupeta Nyumà Mwímpè, bwà kwendelàMù. Mènà ètù (pààkashebeyiibwà Mwànà wa mùkòòkò) àkafundiibwà mu Mukàndà musangu wùmwèwùmwè wàkafundiibwà Dìna dyà Mwànà wa mùkòòkò awu. Bible, netùkùfikè paanyimà pàà katanci, mmwambè ne: “yèyè wàkaseeswisha bònsò pa buloba beena mènà àdì kaayi mafùnda mu Mukàndà wa Mwoyi wà Mwànà wa mùkòòkò kacya ku difukà dyà dyulu ne buloba.”

215 Mònaayi, díbà adi píikalàbi ne yéyè. . . mubàki yéyè mwinè, pàvwàye mwimànyine ku ciibi apu. Nènku muntu ùvwa ùlwa ne dibìikila adi, wàmba ne: “Ndyòdi edi.”

216 “Twasàkidila.” Ùvwa wàngata dibìikila adi, ùditèeka apa, ne ùmuvwàdika mùzàbi bwà bònsò bìikalè ne mmwènèkelu wa mwomùmwè. Mémè ndi munangè aci! Nwamònu anyi? Mu bukolè bwà Nzambi, mu Èkèleeziyà wa Nzambi udi ne mwoyi, babanji, bapèlè, bapika, badishikàmìne, bafìlke, batòoke, bafìikùlùke, bàà kàlaabi, bònsò ne mmwènèkelu wa mwomùmwè bwalu mbavwàdika Bukolè bwà mwomùmwè bwà Nyumà Mwímpè. Nwamònu anyi?

Mpindyewu, byàkaleeja ne yéyè awu kààkalwila ku Ciibi to.

217 Mpindyewu, mònaayi apa. Kaa, pàvwà muntu ùteeta kubwela mu Mwaba mutàmbe cijila (muntu kampànda, mulongeshi kampànda wa Bible ùngambila), pàvwà muntu kampànda ùbanga kubwela mu Mwaba mutàmbe cijila kàyì ùpìcila *apa* to, ùvwa ùfwa. Mwànà wa balùme wa Aalònà wàkangata mudilu mwenyi ditùkù kampànda, mudilu kampànda wà cyena-màngumba (pààbi kaCìvwa ne cyà kwikala mudilu wà cyena-màngumba to), kàdi wàkafwila ku ciibi aku. Ncyà bushùwà anyi? Anyi bàvwa mbànà bàà balùmè bàà Eli, ngeela meeji. Bânà bàà Eli mbààkabàbwejà, pàvwàbi ne cìvwa cìleeja bânà bàà Aalònà uvwà mwakwidi.

218 Mpindyewu, mpindyewu, kùdi mùshindù wùmwèpelè wà kubwela mu mubidi. Mubidi ewu wùtu wùkòntononyiibwa munyi? Mpindyewu, tàngilàayi ne ntèmà yònsò mpindyewu ne nùlongololè crayons yènù. *Apa* mpàdi ciibi luseke elu cidi cìfila mu mubidi: ùmwè, ibidì, isàtù, inaayi, itaanu. Mpindyewu, nwazòlu aci anyi? Mpindyewu, ciibi cyà kumpàla *apa* cidi: lumònò, lununku, luumvu, ne lulabulu, ne dilenga anyi lulengu (eci anyi eci cidici ciswè kwikala, kí mbwalu to). Mpindyewu, ki byumvwilu byà mubidi mbyòbì abi. Mmwômò anyi? Mbanganyi bàdi bamanyè nàнку? Byumvwilu bisambòmbò mbidì bikòntononà mubidi. Mpindyewu, tudi ne musùukà paanyimà pàà wèwè mumanè kupìcila ku *eci*. Byumvwilu bidi pambèlu, ki ndongolwelu wa pambèlu nyéyè awu.

219 Mpindyewu, *emu* mùdi cimwè, bibìdi, bisàtù, binaayi, bitaanu, byambìlwbà bitaanu mu musùukà. Mpindyewu, nudi baswè kubifùnda anyi? Cyà kumpàla ncifwànyikijilu, ncifwànyikijilu. Ciibìdi nkondò kàà mwoyi. Ne ciisàtù ncivùlukilu. Ne ciinàyi ncilukakaji cyà lungènyi. Ne ciitànù mmeeji a dinanga.

220 Mpindyewu, nwabìkwàci byònsò anyi? Kanùyì babìkwàte to, díbà adi nùngambilè mmanyè mpindyewu. Nwabifùndu byònsò anyi? Lumònò, lulabulu, lulengu, lununku, ne luumvu; mubidi, abi ki bibweledi byà mu mubidi.

221 Musùùkà wùdi ne cifwànyikijilu, kondò kàà mwoyi, civùlukilu, cilukakaji cyà lungenyi, ne meeji a dinanga, ki byumvwilu anyi byambiibwà, bu byumvwilu byà musùùkà. Ne musùùkà nngiikàdilù wa nyumà udi munda, bwalu musùùkà wùdi ànu wùpàtula cyanàànà cyuyüya kampànda cyà cidì munda mwèbè aci. Wùdi wàngata kaaba kàà dijidiibwa, musùùkà awu, wùdi mu mùshindù musungùlùke wùmwèwùmwè awu muntwamu. Èyo, mpindyewu, bònsò . . . bònsò bǎfùndu byònsò abi anyi? Èyo.

222 Mpindyewu, ku *eci* ciibi kùdi ànu cìmwèpelè, ciibi cìmwèpelè, cibìikidiibwa ne “budìswìle.” Wèwè udi mfùmù wa bìdi bìbwelàmu. Nènku cidì cyènza cinyi? Eci ncinyi? *Mubidi* wùdi ne cyà kusukudiibwa, dilòngò dyà cyowelu; mujidiibwe, *apa* nùnkù; muujiibwè tètè ne Nyumà Mwìmpè, *apa*, nènku eci cidì cìlwa cyàkàbìdi nkwasà wa cìlumbulwidì wa Nzambì, mùdi Nzambì ùsòmba mu mwoyi wèbè, nènku wèwè mwenzè cintu kampànda cyà cibì, wamba ne: “Èyi, ekèlekèle, ndi mwenzè bibi.”

223 Bàmwè bantu bàtu bàmba ne: “Ncyèna ngumvwa dipiila bwà—bwà kwikala ne nsuki mîpì to,” bakàji abu’s. “Ncyèna ngumvwa dipiila bwà dilengeja dyà byanza anyi bilaabu byà kwìsù, anyi ní ncinyi cyònsò to. Ncyèna ngumvwa dipiila bwà kuya mu maja to. Ncyèna ngumvwa dipiila bwà kwambakù kaadishima kapeepèlè to. Ncyèna ngumvwa dipiila bwà kunàyakù kartà mu kasumbù kàànyì kàà banàyi bàà kartà to.” Udi mumanyè ne mbwà cinyi? Kwèna ne cintu nànsha cìmwè cyà kukupìisha to. “Kacyèna cyènza bibì ku kondò kàànyì kàà mwoyi to.” Wèwè mwìnè kùcyèna ne kondò kàà mwoyi to ànu mùdi nyòka kàyì ne cifùka amu. Pa nànkù udi ànu . . . Kwèna ne kondò kàà mwoyi to, kakwèna cintu nànsha cìmwè muntwamu bwà kukwenza bibi ku mwoyi to. Wèwè udi wa pa buloba!

224 Kàdi ndi nkwela kadyòmbò bwà ùlekelè Yesù Kilistò àbwelè munda *emu* kàdi ùteetè bwà kucyènza musangu wùmwè! Mwanèètù, wèwè’s neudyùmwè mupìishìbwe mu mùshindù wà ne newàlukilè cyànyimà umusha mpàlà ku cintu aci cyà bushùwà ànu mùndì mwimàne kaaba aka *emu*, bwalu Yèyè ngwa cijila. Tèelejààyi, ndi ntèela Mufùndù ewu ne: “Wèwè munangè bintu bìdi maalù a pa buloba abi, bintu byà pa buloba, mbwalu dinanga dyà Nzambì kadyèna nànsha mene munda mwèbè to.”

225 Ncyenzèke munyi? Budìswìle. Bwà cinyi udi muswè kubìikila aci ne ‘mbudìswìle,’ Mwanèètù Branham?” Bwalu cidì cìtèèka cyàkàbìdi mulùme anyi mukàji ànu mùvwà Adàmà ne Evà mu budimi bwà Edènà amu. Pa cinyi? Mici yìbìdì ayi! Budìswìle, *ewu* ndufù. *Ewu* m’Mwoyi, budìswìlè. Bùdi . . . Budìshikaminyi bwà disungula! Nzambì wàkatèèka muntu wa kumpàla, Adàmà ne Evà, anù pa budìshikaminyi bwà disungula apa. Udi ùkutèèka pa mwaba ànu wòwò wùmwèwùmwè awu. Ne mùshindù wùmwèpelè wùdìku mwà kulongolola cintu eci

apa nku budiswile bwèbè sungasunga. Àlèluuyàh! Budiswile bwèbè! Bikèngela ùjingè kwenza Diswa dyà Nzambi. Bikèngela ùmushè diswa dyèbè sungasunga bwà ùlekelè Diswa dyà Nzambi dibwelè, bwalu aka ki kajila kàmwèpelè kàdi kàfila ku mwoyi.

226 Kaa, nudi mwà kadivwija bàà mu èkèleeziyà, nwènù ba-Baptistes ne ba-Presbytériens. Ne nwènù ba-Méthodistes ne ba-Pèlerins de la Sainteté nudi mwà kufika ku dijidiibwa. Kàdi bidi bikèngela bwà nwènù kuswa bwà kwenza Diswa dyà Nzambi, budiswile, kulekela Nyumà Mwimpè ùbwela *emu* nùnkù, bwà kuvwija. “Bimanyinu ebi nebifilè aba bàdi biitabuujà. Mu Dîna Dyànyi bôbô nebiiipatè baadémons. *Nebààkulè* mu myakulu mipyamipya. Nebàtentekelè babèèdi byanza anyi bàkwatè bintu bidi bishebeyanganà, ne bikwàbò. Bimanyinu ebi nebifilè aba bàdi balekèle diswa dyàbò dilwa Diswa Dyànyi, ne byenzedi bîndi Mèmè ngenza nebàbyènzè pààbò.” Ndi ntèkemenà ne kaCyèna cìnùpita to. Ki diswa dyà kwenza Diswa dyà Nzambi ndyadi. Nudi bamòne cîndi muswè kwamba aci anyi?

227 Tàngilàayi kùneeku, ndi ngaakula bwà mwaba wà cijila, dilòngò dyà cyowelu. Makènkè awu *ngòwò aa*, bitèèkedi byà myèndù (cimwè, bibidi, bisàtù, binaayi, bitaanu, bisambòmbò, mwandamutekète), cyònsò cyà kùdibi cidi ne bukènkè kampànda. Bidi bipetela bukènkè bwàbi penyi? Bukènkè bwàbi bùdi bùleejiibwa penyi, Bùdi bùdileejila penyi? KaBwèna bùdileejila mu ditumba *emu* pa dîngumba kampànda to. Bùdi bùdileejila paanyimà apa ku Diyì! Mmàyi a ditàpulula. Yoyöyò!

228 “Bwalu kanyinganyinga ne dilekelediibwa dyà mpèkaatù” (Luukà 24.49) “bidi ne cyà kuyiishiibwa mu Dîna Dyèndè ku matungà ònsò, kubangila ku Yelusàlèrà.” Kanyinganyinga ne dilekelediibwa dyà mpèkaatù byàkayishiibwa munyi ku Yelusàlèrà? Too ne penyi? Bidi ne cyà kuya too ne pa buloba bujimà. “Nyingàlàlaayi,” mwàkambà Peetèlò, mu Byenzedi 2.38, “ne nùbatijiibwè mu Dîna dyà Yesù Kilistò bwà dilekelediibwa dyà mpèkaatù wenù.” Bikèngela bwà Mukenji awu wùye pa buloba bujimà, ne pashiishe ndekeelu neàlwe. Pashiishe ndekeelu neàlwe, paanyimà pàà Mukenji *ewu* mumanè kuya pa buloba bujimà.

229 Mmunyi, mùdi bitèèkedi byà myèndù ebi bileeja bukènkè lwà apa pa dîngumba kampànda dyà ba-Méthodistes, ba-Presbytériens, anyi beena Mpenta? Èè, ncyà bushùwà ne kî nnànkù to!

230 Bùdi bùdileejila *emu* nùnkù bu “NDI,” kàciyi “Mvwa” to. Ki mbantu bàsàtù anyi bànaayi bashiilàngàne to, kàdi Nzambi musòmbemù uDileeja kùdi yònsò wa ku èkèleeziyà ayi. Tàngilàayi kale wàwa nùmonè cyàkenzàbo (tudi bafùme ku dilonga dyà maalu-malonda), bàvwa bàMuleeja Yèyè mùvwàYe, mùdiYe, ne mwikalàYe misangu yònsò.

231 “Ewu uvwakù. . .” Yone mmwenzè ànu ùCìt wishila mèsù anyì, kwambayè ne: “Ewu uvwakù, Udikù, ne Wàlwa Awu, Nzambì wa Bukolè bwónsò, bufùki bwà Nzambì, Alpha, Omega, Cibangidilu ne Ndekeelu.” Ki Bukènkè bulelèlà mbwòbù abu bwà kuleeja. Nudi nuCimòna anyì? Amen! Yoyòyò!

232 Paanyimà pàà díbà dikùmi ne ibìdì, ne ndi—ndi ne. . . Tèèlejààyi, twánjààyi kulwìjakaja bwà nwamòna mwà kucitentula. Ndi ànu ngumvwa bibì bwà kunùlama ntàntà mupitèpìte bule, kàdi ncyèna mumanyè ne ndíbà kaayi dngàànùmònà kàbìdì to. Nwamònu anyì? Nènku ndi muswè bwà nùpetè eci, balundà bàanyi, eci kì Mwoyi. Mpindyewu, tàngilààyi, ncyèna nswà kwamba ne mbwalu mémè ngudi uCyamba to. Mémè—mémè ndeeja cyà mùshindù awu wà. . . díbà adi ndi. . . nudi—nudi nuumvwa mwoyi wànyì bibì. Ncyèna nteeta bwà kuleeja byà ne: “Kaa, eci cidi ànu. . . Wèwè udi cintu cyanàànà” to. Ncyèna nteeta kwenza nàнку to. Pawikalà kùyi mupetè Bukènkè to, mémè ndi nteeta bwà kukufunkwina Bùdì apa ebu. Kì mbùdì ku cyambilu eci ebu to, m’Bùdì ku Nkwasa wa butùmbi kwàka abu. Ne Nkwasa wa butùmbi awu ùdi ne cyà kwikala mu mwoyi wèbè, díbà adi neùmònè cintu ànu cimwècimwè aci menemene mùdìci cileejìbwe kaaba aka emu.

233 Cìdì apa eci ncinyì? Cìdì cileeja *Eci*. Ne *eci* ng’Eci, Dìyì. Basukula ne màyi a Dìyì, ku Dìyì; basukula (ku màyi a ditàpulula) ku bintu byà pa buloba—pa buloba, ku Dìyì. Dìyì dìdì dyàmba ne Yèyè ùdi umwèumwè awu makèlèlèlè too ne kashidì. KaDyèna dyàmba ne: “Yèyè ùdi umwèumwè awu mu cikondo cyà beena Mpenta, kale wàwa mu bayiidi, ne pashiishe cikondo cyàkalondà Yèyè wàkashintuluka” to. To, Yèyè ùdi umwèumwè awu! Nwamònu anyì? Kwèna mwà kuDìfikisha ku dyàmba cingà cintu to. Tudi bafwànyine kushààla ànu pa cimwè cyà ku bintu abi munda mwà mèbà, kàdi ndi ntèkemena ne nudi munkaci mwà kuCìpeta mpindyewu. Nzambì Yèyè mukubiikile, neùCìpetè. Ki cìndì mémè ngiitabuuja ncyòci aci. Èyo, mukalenge.

234 Mpindyewu, ncinyì ciinè aci? Dibingishiibwa, dijidiibwa, dibàtiiza dyà Nyumà Mwimpè; musùkà, mubidi, nyumà; byónsò byà mwomùmwè. Mpindyewu, mwèndù awu wùdi wùleeja Dìyì. Dìyì dilelèlè didi dileeja cinyì? Ncinyì cìvwà mwèndù ewu mufwànyine kuleeja, bu ne wùvwa wùpetela bukènkè bwàwù kùdì Butùmbi bwà Shekinàh ebu? Bùvwa bufwànyine kuleeja Butùmbi bwà Shekinàh. Mmwòmò anyì?

235 Pìikalàbi ne wèwè uvwa mubwelè mu sèminèrè, bwèbè bukènkè, neùleejè sèminèrè. Wèwè mubùpetèle mu sèminèrè wa ba-Méthodistes, neùleejè ci-Méthodiste. Ki ciwàleejà! Wèwè mubùpetèle mu sèminèrè wa beena Mpenta, s’udi uleeja cyena Mpenta. Kàdi wèwè muBùpetèle mu Butùmbi bwà Nzambì, ku cipuka cidi cilàkuka kapyà aci. . .

236 Mona's, pàakapàtukà Mòsà mu Bwikadi Bwèndè, byàkakèngela bwà kutèekayè cintu kampànda pa mpàla pèndè, pa nànkù, bantu kabàvwakù nànsha mwà kumutàngila to. Mmwômò anyi? Ûvwa mùle tètè ne bukolè bwà Nzambi.

237 Stèfanò, muntu mùle tètè ne Nyumà Mwímpè. Kuteeta bwà kumwimanyika, mòna's, bìvwa ànu bu kuteeta bwà kujìma mudilu ku nzùbu mu ditùkù dyà lupeepà, mukwàte mudilu; kujìmakù mudilu...ne nzùbu mukwàte mudilu mu ditùkù dyà lupeepà. Kaa, pàvwàbo bàtàmba—bàtàmba kuwùpwidila, mpàvwàwu wùtàmba kutomboka. Mòna's, kùvwakù mufwànyine kumwimanyika to. Dyàkàmwè, pàakamutèekàbo kumpàlà kwà Tubàdi twà beena Yùdà, Bible mmwambè ne: “Wàkashààla mwimàne mwaba awu, ùmwèka bu mwanjèlo.”

238 Mpindyewu, ncyèna ngeela meeji ne “mwanjèlo” mbwena kwamba ànu ne yèyè ùvwa m'Muntu kampànda mwimàne mwaba awu to; kadi, mwanjèlo mmumanyè menemene cidiye wàmba. Ki mùdi kàbidì mwanjèlo kanà yònsò ewu, mùsànjeelà wa cikondo cyà Ekèleeziyà, kabyèna bikèngela àalukilè bwà kamòna cidi sèminèrè wèla meeji to. Yèyè mmumanyè cidi Nzambi mwambè mu Bible Wèndè, ne bukolè bùdi bùdileejà bwà kujaadika ne Yèyè ùdi umwèumwè awu makèlèlèlè, leelù, too ne kashidi. Kèna ùcina nànsha, ùdi wàmba ànu menemene cidiye mumanyè ne ki Bulelèlèlè aci. Ne Nzambi mwimàne mwaba awu ùBùtwa nyama ku mikòlò ne bimanyinu ne maalu a kukèma byà mùshindù wùmwèwùmwè awu, ne Dìyi dimwèdimwè adi. Ki mwanjèlò nyèyè awu!

239 Stèfanò wàkiimana mwaba awu, kwambayè: “Ndi mumanyè cìndi ngamba aci.” Yèyè ne: “Nwènu beena nshìngù mitàndàbàle ne kabàyi batengula mu myoyi ne mu maci aba, nudi misangu yènu yònsò ànu nukàndameena Nyumà Mwímpè. Mwàkenzà baatatwènu, s'ki munùdi nwenza pèènu emu!” Yèyè ne: “Nganyì wa ku baatatwènu udikù kàyi mushebèye bapròfetà ne pashìishe mubibàkìle nkità?”

240 Nwènu màngumba, nganyì wa kunùdi udi kàyi mwenzè cintu cimwècimwè aci? Nwamònu anyi? Nwibaka nzùbù minènè yà bimanu bilaaba lupèmbà ne nzùbù yà bitàlù ne bikwàbò myaba yònsò eyi, kàdi pashìishe nwakula bwà Nzambi! Wèwè awu's ki mwinè udi muMwèlè mu nzùbù wa bitàlù amu, wèwè awu's ki mwinè udi muMwèlè mu majambu. Cyòci aci's ki cintu cimwècimwè cyàkaMwèlè mu majambu kale wàwa, s'cìvwa ng'èkèleeziyà mwenzà wa nzùbù munèna wa bimanu bilaaba lupèmbà, dìngumba, Bafaalèsà ne Basadokà bààkaMwèlèmu abu kadi pashìishe kuteeta bwà kuCiibakila civùlukilu.

241 Lekèlaayi nnwàmbilè ne Kilistò n'Kampànda udi ne mwoyi. Yèyè kì ncintu kampànda cifwilè to, Yèyè n'Cintu kampànda “cìjuukilè ku bafwè ne ciikàle ne mwoyi bwà kashidi.” Kaa,

mwanèètù! Bushùwà's! Cidi cyènza cinyi? Cidi cileeya cinyi? Cidi cidileejila *apa*, ncifwànyine kwikala cinyi? Kí ncifwànyine kuleej- . . . Cimfwànyì cilelèlà Cyèndè Yèyè ncinyi? Dìbà adi cintu cyà kumpàlà cidìci cifwànyine kuleeja, cìvwa mwà kwikala Dìnà Dyèndè. Mmwómò anyi? Cìvwa mwà kuleeja Dìnà Dyèndè. Cintu cidì cilondà cidì cidileejà, cìvwa mwà kwikala bukole Bwèndè. Nudi bumvwè cìndi muswè kwamba aci anyi? Cìvwa mwà kuleeja byònsò bìdìYe.

242 Pa nàнку pìikalàbi ne *eci* cidì cidileeja kùdì *eci* cikondo, byònsò bivwàYe abi, dìbà adi's Yèyè ùdi umwèumwè awu! Yoyòyò, butùmbi's wè! Butùmbi's wè! Ncinyi aci? Cidi cìMuleeja mùvwàYe, mùdìYe, mwikalàYe misangu yònsò, bwalu cidì cìfùmina buludì ku Nkwasa wa butùmbi wa Nzambi; Yesù Kilistò umwèumwè awu makèèlèlà, leelù, too ne kashidi; Nzambi umwèumwè awu, Bukolè bùmwebùmwe abu, Butùmbi bùmwebùmwe abu, bintu byònsò bìmwebìmwe abi. Yèyè ùdi umwèumwè awu makèèlèlà, leelù, too ne kashidi. Kaa, mwanèètù!

243 Twǎnjì tùyaayibi ànu kumpàla ndambù. Mpindyewu, twàngatàayi bikwàbò byà ku mvensà mwi6 ewu kaaba aka, wa nshapità mwi4 awu. Ndi ne ndambù wa méyì a dyela nsèka mafùnda kaaba aka pa cyòci aci, nènku ndi muswè kulwijakaja bwà kukùfika bu mèmè mwà kupeta mùshindù. Mpindyewu, bi—bikwàbò abi, paanyimà pàà wèwè muumùke mu ewu nshapit- . . . paanyimà pàà twètù buumùke mu ewu mvensà, cidì ànu cinyùnguluka cyanàànà, cyàmba byàkenzàbo. Twǎnjàayibi kumòna ní tudi mwà kujikijila mwaba awu.

. . . *lumwènù* . . . *mbù wa lumwènù* . . . (Mpindyewu, tudi bamanyè ne cìvwa ncinyi.) *munkaci mwà nkwasa wa butùmbi*, . . . Bifùkùbwà *bìnaayi* bìdì ne mwoyi, *nyama* . . .

244 Mpindyewu, mpindyewu, mbanganyì bàdìku ne nkùdimwinu mwenzulula wa Bible? Mu nkùdimwinu wenù mwenzulula amu, wùdi wàmba ne “Bifùkùbwà bìdì ne mwoyi.” Èè, mwà ndìkonka mùvwà Roi Jacques ewu, kaaba aka, mwambè bìdì ne mwoyi, anyi ne yìvwa “*nyama*” yìnaayi's? Èè, mèmè kupeta nkòngamyakù wa cyena-Ngelikà—wa cyena-Ngelikà, ne kwalukila mu nkòngamyakù wa Bible bwà kujandula cìvwa cyòci aci cyùmvwija. Mpindyewu, cidìci ncyòci eci. Mpindyewu, mònaayi ne ntèmà. Mwakù wùdìbo bakùdimùne kaaba aka, mpindyewu nùcìfùndaayi, bwà nwamòna mwà kucitàngila pèènù, bwà kwikala batwishìbwe. Nwamònu's, ndi muswè nùfundè cìndi ngamba aci, ne . . . bu nwènù ne mùshindù ne baswè kucifùnda. Èyo, nkùdimwinu mwenzulula ùdi wàmba ne: “Bifùkùbwà bìdì ne mwoyi,” mwómò amu. Mpindyewu, tàngilàayaaku:

Ne . . . kùw̄wa . . . nyama ȳinaayi mȳùle t̄èntè ne m̄èsù kumpàlà ne paanyimà.

245 Ne ùdi ùtùngunuka ne ùmvwija mùdì “nyama” ayi, kwòkò kwìnè netùkùfikè mu katancì emu. Mpindyewu, *nyama* kaaba aka mmifwànyikija. Udi ne m̄èyì a kumpengà kwà dibèji mu Bible webè amu, pa—pa *nyama* anyi? W̄èw̄è nendè, pita ndà mu m̄èyì a kumpengà kwà dibèji awu. Ndi mmòna ne Docteur Scofield kaaba aka mmucifunde mu wendè. *Nyama* ayi yidi yùmvwija, ȳèyè kaaba aka, wàmba ne “Bifùkùibwà bìdì ne mwoyi.” Kaa, ekelekele! Mpindyewu, t̄àngilààyi. Mwakù wà cyena-Ngelikà mwaba awu wùdì, “Z, o yìbìdì, m,” . . . anyi, “Z, o yìbìdì, n” ki mùdici, “Z, o yìbìdì, n.” Mpindyewu, mu—mu cyena-Ngelikà, bàdì bàcìbìikila ne Zoon udi umvwija ne “Cifùkùibwà.”

246 Mpindyewu, kabyèna n̄anku to . . . nwènù baswè kucìbala mpindyewu. Katwèna ne d̄ibà to. Nkààvwa muswè kucìbala, k̄adi ncyèna ne d̄ibà to. F̄ùndaayi Bwàkabuulwibwà 11, 13, ne 17. Mpindyewu, mwaba wùdì *nyama* awu, mu Bwàkabuulwibwà nshapità 11, 13, ne 17 amu, mbayìbìikile ne *nyama* mùshindù wùm̄wèwùm̄wè awu; k̄adi *nyama* mwaba awu, dyumvwija d̄idì “t-h-e-r-i-o-n,” therion. Mwakù awu, mwakù wà-cyena-Ngelikà *therion* awu, wùdì wùm̄vwijà “nyama mutombòke, k̄ayi mutekesha.” *Therion*, aci cidì cyùm̄vwija “nyama mutombòke, k̄ayi mutekesha.”

247 K̄adi Zoon ùdi ùmvwija “Cifùkùibwà,” nwamònu’s: “Bifùkùibwà (Zoon) b̄inaayi bìdì ne mwoyi.” Kaciyi *nyama* yà “mitombòke,” *therion* to; k̄adi, “Zoon, Bifùkùibwà bìdì ne mwoyi.”

248 Ne *therion* ȳèyè ùdi “mitombòke, yà mwitu kayìyi mitekesha.” Mu ngaakwilù mukwàbò, nwènù baswè kutàngila nshapità wa 11, “nyama wa lwonji wa Loomò.” Nshapità wa 13, “États-Unis.” Nshapità wa 17, “bònsò bàbìdì États-Unis ne Loomò,” èkeleeziyà yà cyena-màngumba midyènzè cimùkù ne cyena-Kàtòlikè bìdì bibàvwija kabàyi bakùdimùne mucimà, kabàyi batekesha ku Èvànjeeliyò to. Yoyóyò! Kabàyi batekesha!

249 “Nzambi àbeneshiibwè, twètù t̄udi bafùm̄ine ku èkeleeziyà munèna wa ba-Méthodistes, ba-Baptistes, ba-Presbytériens, dingumba dyà beena Mpenta. T̄udi bamanyè citùdì twamba! Muntu n̄ansha umwe k̄èna ùlombola . . . k̄àakutwàmbila bwalu to!” Ki bwalu abu’s. Kabàyi batekesha to! Kabàyi bakùdimùne mucima to! Kabàyi ne dinanga d̄itù naadì bantu edi to! Bashipi bàà bipungidi! Bashiminyinyanganyi bàà maalu! Kabàyi ne kudikànda! Ne bapeetudì bàà aba bàdì b̄impè! Biikàle ne cimwènekelu cyà . . .

250 [Katùpà k̄àà mukàbà wà m̄èyì munda mutupù—Muf.] . . . kenkètaayi aci mpindyewu. Ne mvw’ a kunanga ànu kusùsulula cintu aci mpindyewu mene, k̄adi ndi . . . bwà kumòna mwàkuyaci pa mukàbà wà m̄èyì ewu, n̄ansha bishi. K̄adi katwèna ne d̄ibà

dyà kucyènza to. Mpindyewu, s'nudi bumvwè's. Mbanganyi bàdi bumvwè? Ambàayi "Amen." [Disangisha didi dyamba ne: "Amen."] Nwamònu's, ebi bìdi . . .

²⁵¹ *Zoon* ncinyi, Z-o yìbìdi-n awu? Bifùkùibwà bìdi ne mwoyi. Ncifwànyine kushindumunyiibwa *Zoon*, Z, o yìbìdi, n. Nwènu nudi bafwànyine kucishindumuna bishi, "Zoon" awu? "Zoon," mûndi mêmè mufwànyine kwamba's.

²⁵² Kàdi *therion* ùdi yêyè t-h-e-r-i-o-n, *therion*, nwamònu's. Pa nàнку aci cidi cyùmvwija "nyama kayi mitekesha, mitombòke, yà mwitu." Ki cidi nyama ayi. . . Angàtà webè. . . angàtà nkòngamyakù webè wa cyena-Ngelikà awu kàdi wàlukilè buludì ùmonè ní kî mmwakù wùmfwèwùmfwè awu. Tàngilà mwòmò amu ùwùmònè. Angàtà webè—angàtà mukàndà webè wà dilongeshangana naawù cyena-Ngelikà, wàngatè Emphatic Diaglott webè awu. Mpindyewu, jandùlàbi ní kî ncilelèlè, bwà ne ncilelèlè, bwà ne cidi cyùmvwija "nyama udi kàyi mutekesha," mu Bwàkabuulwibà 11, 13 ne—ne 17 amu.

²⁵³ Kàdi mu Bwàkabuulwibwà 4 emu, cidi cyùmvwija "Cifùkùibwà cidi ne mwoyi," kaciya *nyama* to; kàdi ncibìikidìibwe ne "nyama" kàdi kî nnàнку to. Cintu cìmwècìmwè aci mu Yèhezèkèlè 1.8, 1 too ne ku .28, ncyòci. Pàmwàpa netùkakùfikè mu katanci kakesè emu.

Èyo: "Nyama kàyi mutekesha, kàyi mukùdimùne mucìma, mutombòke." Kàyi mutekesha!

²⁵⁴ Kà *ebi* bìdi "Bifùkùibwà bìdi ne mwoyi." Mbinganyi? Kí m'Banjèlo to. Ndi nnwàmbila, tùbalàayi mu Bwàkabuulwibwà 5, ànu luseke lukwàbò lwà dibeji alu. Bwàkabuulwibwà 5, ku mvensà wa 11:

Ne ngàkatàngila, ne. . . ngàkumvwa dîyi dyà banjèlò bààbùngì ("banjèlò," ku bùngì) mu nyùngulukilu wa nkwasà wa butùmbi ("Ne" mmutwàngaji.) ne nyama ne. . . bakùlù: . . .

²⁵⁵ Nwamònu's, "ne," mutwàngaji. Nwamònu anyi? Kabàvwa Banjèlò, anyi kabàvwa bakùlù to, bìvwa "Bifùkùibwà bìdi ne mwoyi" ku Nkwasa wa butùmbi. Kaa, kanwènaayikù banangè eci anyi? Bifùkùibwà bìdi ne mwoyi! Ki m'Banjèlo to, bwalu eci cidi cìcìjaadika mwaba ewu mene, nwamònu's:

. . . ngàkatàngila, ne. . . ngàkumvwa dîyi dyà banjèlò bààbùngì mu nyùngulukilu wa nkwasà wa butùmbi ne nyama ne bakùlù: . . .

²⁵⁶ Mpindyewu kùdi mîshindù yisàtù mîshìilàngàne mwaba ewu. Ndi ntèkemenà ne nudi bònso ne ndongolwelu ewu kwînshì eku mpindyewu. Mpindyewu, ndi muswè nnùleejè. Kùdi mîshindù yàci misungùlùkee yisàtù mîshìilàngàn, misungùlùke yisàtù mîshìilàngàne (Mpindyewu, tàngilàayi.) mu nyùngulukilu wa Nkwasa wa butùmbi.

257 Ki Nkwasa wa butùmbi *ewu*. Mpindyewu, byà kumpàla ku Nkwasa wa butùmbi ewu m’Bifùkiìbwà binaayi bìdì ne mwoyi. Pa kuumusha abi kùdì (ànu nùнку *ewu*) bakùlù makùmi àbìdì ne bànaayi basòmbe pa nkwasa wa butùmbi, pa nkwasa yàbò—yàbò yà butùmbi, nkwasa yà butùmbi mikèsè mwinshì amu. Ne mu nyùngulukilu wa cyòci eci, mùdì misùmbà minènè yà Banjèlo banyùngulùkile Nkwasa wa butùmbi awu. Nudi bumvwè cìndì muswè kwamba aci anyi? Mbashiilàngàne bònsò, ewu ne ewu. Ki Banjèlo *bàba*; ki bakùlù *aba*; ne ki Bifùkiìbwà bìdì ne mwoyi *ebi*.

258 Katwànji kushìya aci to bwà katanci. Tùcilamàayi ànu mwaba awu bwà katanci, “Bifùkiìbwà bìdì ne mwoyi.” Byòbì mbinganyi pìikalàbì kabiyi Banjèlo, kabiyi bantu bapikula? Mbinganyi? Nudikù baswè kumanya anyi? Dyànyì dyumvwija ndyòdì edi. Ndi ntèkemena ne ndyà cyà bushùwà; ndi ngiitabuuja ne ndyà cyà bushùwà. Mbalami bàà Nzambi bàà Nkwasa Wendè wa butùmbi. Mpindyewu, netùkupulè eci ànu kakesè cyanàànà. Mpindyewu, nudi numòna’s, byòbì kî—kî m’Banjèlo anyi bantu to. Kî nnyama mitombòke nànsha. M’Bifùkiìbwà, “Bifùkiìbwà bìdì ne mwoyi.”

259 Mpindyewu, ki Nkwasa wa butùmbi wa Nzambi nyèyè *ewu*. Ne ki balami Bèndè mbòbò *aba*. Twànjàayi kubala ànu ndambù wa cyòci aci bwà tujandulè mu tusunsa tukèsè emu. Nwamònu’s, bòbò abu m’Banjèlo bàà Nzambi anyi balami bàà Nzambi bàà Nkwasa Wendè wa butùmbi, nènku bàdì... Twàngataayi... ànu—ànu bwà katanci kakesè cyàkàbìdì cyanàànà, twàlukilàayi ku Yèhezèkèlè. Ndi—ndi ne bintu ebi bifùnda mwab’ewu, kàdì ntu ànu ngumvwa bibì bwà kubipità, ndi mumanyè ne eci cìdì... [Katupà kàà mukàbà wà mèyi munda mutupù—Muf.] Twàlukilàayi ku Yèhezèkèlè nshapità 1, ne tubàngilàayi ku mvensà wa 12 too ne ku wa 17, katanci kakesè cyanàànà.

Ne byàkaya byònsò kumpàla buludì: . . .

260 Mpindyewu, netwikalè mwà kutàpa dísu mu tusunsa tukèsè... Nènku nudi bavùlùke mvensà wa 7 ewu kaaba aka, mpindyewu, kutàngila mmwènekulu uvwabi nendè kaaba aka mu mvensà wa 7 wa nshapità umwèumwè wa Bwàkabuulwibwà awu, “bìnaayi.”

Ne nyama wa kumpàlè ùvwa mufwànàngàne ne nyama wa ntambwe... nyama mwibìdì ùvwa mufwànàngàne ne kànà kàà ngombe... nyama mwisâtù ùvwa kwìsù... ùvwa ne... kwà muntu, ne nyama miinâyì yìvwa mifwànàngàne... mikankù mùkàle yìbùùka... nyama mwinâyì... mufwànàngàne ne mukankù mwikàle wùbùùka.

261 Mpindyewu, Yèhezèkèlè pààkamònàye Butùmbi bwà Nzambi, wàkamòna cintu cimwècimwè cyàkamònàbo kùdì Yone aci. Nudi bavùlùke mu dyàlumingu dishààle mutùvwà bangàte “Butùmbi bwà Nzambi,” ne bangàte fòtò mùvwàYe

muDikwàcishe neetù amu anyi? Nudi bavùlùke aci anyi? “Butumbi bwà Nzambi,” cintu cimwècimwè cyàkamònàbo kùdì Yèhezèkèlè, cintu cimwècimwè cyàkamònàbo kùdì Yone aci, s’ki Cyôci eci leelù ewu. Cidi cyènza Yesù Kilistò umwèumwè awu mu cikondo cyà Yèhezèkèlè, cintu cimwècimwè civwà pa buloba apa aci, Nzambi umwèumwè udi neetù leelù ewu awu; umwèumwè awu makèèlèlè, leelù, too ne kashidi; Ewu Uvwakù, Udikù Awu, ne Wâlwa Awu; cibweledi cyà musùùkà, mubidi, ne nyumà; mbù wa cyamù cyà mitakù (Dîyì), Mujididi wa musùùkà wètù, ne Muuji wa ne Nyumà Mwîmpè. Cintu cimwècimwè aci, nwamònu’s, ànu byà mwomùmwè!

262 Mpindyewu, tàngilààyi eci. Èyo:

...ne nyumà...kwònsò kùvwàbi bìya aku;... mpindyewu...bwà kuya, bìwva bìya; kádi kabìwva bìkùdimuka pàvwàbi bìya apu to.

263 Kayìvwakù mwà kukùdimuka to. Bu yôyi yìya mu nùnkù, yìwva yìya byenzè bu muntu; yôyi yìya mu nùnkù, yìwva yìya bu mukankù; yôyi yìya mu nùnkù, yìwva yìya bu ngombe; yôyi yìya mu nùnkù, yìwva yìya bu nyama wa ntambwe. Kayìwva mwà kwalukila cyànyimà to! Yìwva ne cyà kuya kumpàla kwònsò kùvwàyi yìya aku, yònsò wa ku nyama ayi. Mpindyewu, *nyama* ùdi ùmwijja cinyi mu Bible? Bukolè. Èyo, ùdi ùmwijja “bukolè kampànda.”

264 Mpindyewu:

Bwà bìdì bitàngilà difwànangana dyà bifùkùbwà bìdì ne mwoyi, ne mmwènekèlu wabi ùwva bu mùdì makàlà a kapyà munkaci mwà kuteema, ne bu mùdì...wa... mmwènekèlu wa myéndù: civwa cibànda cipweka munkaci mwà bifùkùbwà bìdì ne mwoyi abi; ne kapyà kàwva kakolè, ne mu kapyà amu mùwva mùpàtuka bukènkè.

Awu n’Nzambi. Mu kapyà mùwva mùpàtuka Bukènkè; mpindyewu, kabùyì bukènkè bwà mu cibwàshìbwàshì to, Bukènkè bwà Cyendèlèlè.

Ne bifùkùbwà bìdì ne mwoyi abi bìwva bìnyeema ne bìkùdimuka (Tùmonèbi)...bifùkùbwà bìdì ne mwoyi abi bìwva bìnyeema ne byàlukila, ne bu mùdì mmwènekèlu wa dipènya dyà mukenyi wà mvùla.

Mpindyewu pàmvwà mmòna bifùkùbwà bìdì ne mwoyi abi apu, mònaayi lukàtà lùmwè pa buloba ku luseke lwà bifùkùbwà bìdì ne mwoyi abi, ne mpàlà yèndè yìnaayi.

Mmwènekèlu yà nkàta...mudimu wàyì wùwvwa mufwànàngàne ne...dùkàla dyà...dibwe dyà mushinga mukolè dyà beryl: ne yôyi yìnaayi yìwva ne

difwànangana dimwè: ne mmwènekèlu wayi ne mudimu wayi bivwa . . . civwa lukatà munkaci mwà lukatà.

265 “Cimfwànyì aci mwaba ewu ncinyì, Mwanèètù Branham? Ncinyì?” Cìdi cyùmvwija ne balami aba—balami aba bàvwa mmushèètè wà cipungidi wà Nzambi . . . Bàvwa mu lwendu, bàbùngulukila pa nkàtà pàvwà Yèhezèkèlè ubàmòna apu; kàdi pààkabàmònà Yone, bàkaavwa bamanè kubwela mu kaaba kààbò kàà menemene mu Dyulu. Mushèètè wà cipungidi wà Nzambi wùvwa pa buloba, wùbùngulukila pa nkàtà, pàvwàbò bàya naawù ku mwaba ne ku mwaba, byùmvwija ne wùvwa mu lwendu, bàkawangata kwenda naawù mu cipèèlè cijimà amu too ne mu ntempèlù ne bikwàbò; kàdi mpindyewu wùkaadi mwàngàcìbwe muulu bwalu bikondo byà Èkèleeziyà byàjiki, ne mwàngàcìbwe muulu mu Butùmbi. Nwamònu anyi? Wùkaadi mushààle kaaba kàmwè mpindyewu, mu Dyulu, pàmwè ne Baanjèlo bònsò ne bikwàbò biwùnyùngùlùkile. Tudi tubàmòna paanyimà pàà katanci bàtùùla bifulu byàbò byà butùmbi ne bàpòna batwè mpàla panshì biikàle bàfila butùmbi kùdiYe. Nwamònu anyi? Bàvwa balami bàà Nzambi bàà ntempèlù, bàà mushèètè wà cipungidi.

266 Mpindyewu, vùlukààyi balami bàà Nzambi bàà mushèètè wà cipungidi, anyi bàà nkwasà wa ngàsà. Mpindyewu, vùlukààyi. Bivwa bùngì kaayi, byàkamònàbo kùdi Yone abi, bùngì kaayi? Binaayi. Mbùngì kaayi bùvwàye—bùvwàye *yéyé* mumòne? Wàkamòna pèndè Bifùkiibwà bìdi ne mwoyi, binaayi. Mpindyewu, tàngilààyi, bònsò bàbìdi bàakamòna cìkèènà-kumòna cimwècimwè aci.

267 Ne inaayi ùdi nombà wa buloba. Nuvwakù bamanyè nàнку anyi? Mpindyewu mbanganyì bàdi bamanyè kumpàlà kwà twètù kubwelamù ne, *inaayi* ùdi nombà wa pa buloba? Bushùwà! Bu mùdi beena Ebèlù bànaayi . . . Ngwa pa bulob— . . . Nnombà wa buloba, wa “disùngidiibwa, disùngidiibwa.” Mpindyewu, kanùpu aci mwoyi to, “disùngidiibwa,” bwalu nèngìikalè mwà kucilenga, ànu katanci aka, byà bikolé menemene. Nwamònu’s, “Disùngidiibwa!” Mpindyewu, kùvwa bânà bàà beena Ebèlù bàsàtù mu cikùtù cyà kapyà, kàdi Mwinàyi wàkalwa, civwa ndisùngidiibwa. Lazàrò ùvwa mu lukitá matùkù àsàtù, kàdi pààkalwà diinàyi yéyé wàkasùngidiibwa. *Inaayi* ùdi nombà wa Nzambi wa “disùngidiibwa,” pa nàнку bìvwa bileeja ne Baakampàndà aba bàvwa ne cyà kwìkala ne cintu kampàndà cyà citàngìla buloba.

268 Ndi ntèkemena ne kanwèna mpindyewu ne nzala mipitèpìte bùngì to. Ndi ntèkemena ne nzala yènù yà nyuma yidi ndambù—ndambù kumutù kwà yènù yà mubidi mpindyewu. Nwamònu anyi? Èyo.

269 Mpindyewu, mònaayi: “Bìdi ne mèsù” (mu Yèhezèkèlè emu) “kumpàlà ne paanyimà ne munda.” Twánjààyi kucibala.

Tàngilàayi kùneeku, nwamònu's. Nudi numòna mwómò emu, ngeela meeji ne mbambè mwaba ewu ne, “nyama,” mpàlà yinaayi, mùdì mukankù amu, ne mapwâpwâ, byûle tètè ne mèsù pambèlu, ne munda. Tàngilàayi kùneeku apa:

Nenku nyama yinaayi ayi ne yònsò wa kùdìyi ùwwa ne mapwâpwâ àsambòmbò pa yéyè; . . .

270 “Ne bìwwa bìbùùka,” ne bikwàbò, “ne bìwwa ne mèsù pambèlu, munda, ne paanyimà.” Cìwwa cyàmba bwà meeji ààbì. Bìwwa bimanya cìwàku, cìdìku, ne cyàlwà; bwalu bìwwa menemene ànu ku Nkwasa awu, pabwìpì menemene mu mùshindù wà ne kabìwwa nànsha bantu to. Balami bàà ntempèlù, anyì, kì mbalami bàà ntempèlù to (Balami bàà ntempèlù, mbinunu lukàmà ne makùmi ànaayi ne binaayi abi.), kàdì aba mbalami bàà nkwasà wa ngàsà, balami bàà Nkwasa wa butùmbi, Nkwasa wa butùmbi, ànu pabwìpì menemene ne Nzambì, “Bifùkùbwà bidì ne mwoyi,” cintu cìdì cilondèle Nzambì, biimàne mwaba awu. Meeji ààbì, mbimanyè cìwàku, cìdìku, cyàlwà. Bìwwa ne “mèsù pambèlu,” bileeja cìwàbì mwà kumòna, cìwwa ne cyà kulwa; “mèsù munda,” bimanyè byònsò mpindyewu; ne “mèsù paanyimà,” mmwòmumwè ne bìwwa bimanyè cikaavwàku. Cìwàku, cìdìku, cyàlwà, bileeja mu bikondo byònsò byà èkèleeziyà “Ewu Uvwakù, Udikù Awu, ne Wàlwa Awu; Yesù Kilistò umwèumwè awu makèlèlè, leelù, too ne kashidi.”

271 Ikàlaayi babìkwàte mpindyewu. Netùlumbatanganè ne cintu aci bikolè ku cibàsà eku mu tusunsa tukesè emu. Cìtàngilaayi. Mpindyewu, bwà katancì kakesè cyanàànà.

272 Cìbuulula meeji ààbì, ne cìwwa cileeja ne bìwwa bimanyè, mbimanyè. Bìwwa bimanyè matùkù ònsò àcìwà àlwa ne a mpindyewu ne a kale, ne byònsò bidì biàtàngilà!

273 Ne wabì. . . Kabìwwa bìcyòka to. Kacya kabìwvakù bipetè dicyòka to. Kabìwvaku mwà kwikala ne cintu nànsha cìmwè cyà cìpetangana ne muntu to, yéyè ùdì ùcyòka. Kàdì byòbì kabìwva bìcyòka to, bìwva bimba ne “Wa cijila, wa cijila, wa cijila! Wa cijila, wa cijila, wa cijila! Wa cijila, wa cijila, wa cijila, wa cijila, wa cijila, wa cijila, wa cijila, wa cijila, wa cijila, wa cijila!” munyà mujimà ne bufùkù bujimà mu cikondo ne cikondo cyònsò. “Wa cijila!”

274 Twànjàayi kwalukila cyànyimà bwà katancì cyanàànà. Twànjàayi kwalukila cyànyimà, ndi ne Mufùndu mu meeji, Yeshàayi 6, lukàsàlùkàsà. Tàngilàayi! Yeshàayi wàkamòna cintu ànu cyòcì cìmwècìmwè aci menemene.

275 Cìkèènà-kumòna cyònsò cyà kùdì Mukalenge. . . Ki cìndì ngamba. Bìkèènà-kumòna bitùdì naabì leelù ewu byòbì kabìyi bìkèènà-kumòna byà Bible ànu menemene to, dìbà adi mbyà mafi. Byòbì bidìleeja, anyì, dibuulula kanà dyònsò didì dilèeja Nzambì mwikàle cintu kampànda cìdì kaciyi cìwàYe

misangu yònsò to, ndibuulula dyà mashimi. Èkèleeziyà mujimà mmwibakilapù, Maataàyi 17.

²⁷⁶ Tùmonààyibi, Yeshààyi, nshapità mwi6. Mupròfetà wa citende awu ùvwa mweyèmene pa mabòkò a mfùmù mwìmpè awu, ne ùvwa mumusùmbile bilàmbà bilenga byà mishindù yònsò. Ne yêyè ùvwa mupròfetà, ne ùvwa musòmbe ànu bîmpè kwònsò kùvwà...Kàdi dîngà ditùkù mfùmù awu kufwàye, pa nàнку kukèngelabi bwà—bwà kudikèbululayè nkààyendè. Ki kuyayè ku ntempèlù bwà kusambila. Bwalu wàkabanga kupàtuka ùmuka mu mwaba wùvwà mfùmù ùsanganyibwa awu, dibà adi, bwà kupeta...Mfumu mwìmpè wa kale awu ùvwa muntu mwìmpè wa cijila. Kàdi kupàtukayè e kumònyè mùvwà nsòmbe lu vwa nendè bantu abu, ki kuyayè ku ntempèlù. Mpindyewu, tèelejàayi.

Mu cidimu cyàkafwà mfùmù Uzìyà awu ngákamòna kàbidi Mukalenge musòmbe pa nkwasà wa butùmbi, mutùmbùke ne mubàndisha kuulu, ne musùmbà wà paanyimà pèndè wùvwa muujè ntempèlù tètè.

²⁷⁷ Butùmbi's wè! “Musùmbà wà paanyimà Pèndè” ncinyi? Ki wòwò awu's: “Banjèlo, Baakampànda,” musùmbà wà paanyimà Pèndè wùvwà wènda wùMulonda. Musùmbà wà paanyimà mbàdi bálwa paanyimà abu, nwamònu anyi?

...musùmbà wà paanyimà pèndè wùvwa muujè ntempèlù tètè.

Ne kumutù kwàwù kùvwa kwimàne baselèfimà: ne yònsò wa kùdibo ùvwa ne mapwàpwà àsambòmbò; ne àbidi ùvwa mubwikile kwìsù...ne àbidi ùvwa mubwikile makàsà, ne ne àbidi ùvwa ùbùuka naawù.

Ne umwe ùvwa wèla mukwèndè lubilà, wàmba ne: Wa cijila, wa cijila, wa cijila, m'MUKALENGE wa bilwilu: ne buloba bujimà mbùle tètè ne butùmbi... .

Ne pàvwà makunji a ciibi manyungè ku dîyi dyà uvwa wèla lubilà awu, nènku nzùbu wàkuula tètè ne mwìshi.

²⁷⁸ Ekèlekèlè! Kaa, ekèlekèlè! Aci's cidi cileea ne bikèèna-kumòna abi bidi menemene ànu byà mwomùmwè kùdi yònsò wa ku bantu abu. “Wa cijila, wa cijila, wa cijila!” Kabèèna bàcyòka to, muunya ne bufùku ne: “Wa cijila, wa cijila, wa cijila, kùdi Mukalenge!”

²⁷⁹ Twànji twàlukilààyibi paanyimà katanci kakesè cyanààna mpindyewu, bwà twikalè batwìshìbwe ne tudi bumvwè bantu aba bîmpè. Musangu wà nzànzànzà wàkatèediibwàku balami aba, mmu Genèsè. Mpindyewu, vùlukàayi ne, cyònsò citùdi tuyiisha bikèngela cyùmukilè ku Genèsè too ne ku Bwàkabuulwibwà. Dìbà kanà dyònsò dyùdi muswè kwela lukonko, lwà ùngeelè mèmè. Nwamònu anyi? Cidi ne cyà kwikala Bible mujimà, kaciyi ànu katùpà kèndè to, bwalu Nzambi

kàtù ùshintuluka to! CìvwàYe mu Genèsè aci, ncìdìYe leelù, ne ncìvwàYe mu Moyen Âge. Yèyè ùdi misangu yònsò ànu umwèumwè awu! Nwamònu anyi? Mpindyewu, mu Genèsè, pàvwà Bakèlùbà aba . . . Ki mûndì mufikè ku dibapeta's, bìvwa binkèngèle kwalukila paanyimà bwà kujandula cìvwàbo ku cibangidilu.

²⁸⁰ Tùbuululàayi mu Genèsè 3.24, bwà katanci cyanààna mpindyewu. Genèsè, nshapità mwi³ ku mvensà wa 24. Nudi baMunangè anyi? [Disangisha didi dyamba ne: "Amen."—Muf.] Èyo. Mpindyewu, tùbangilàayi lwà ku mvensà wa 22. Mémè—mémè ntu munangè Eci èyo! Eci ncintu cìndi ànu muswè kwela mwómò emu, ànu ndambù mukèsè cyanààna wa disàkìdila, kàdi cìdi mwà kwenza bîmpè menemene dîngà ditùkù.

Ki MUKALENGE . . . kwambayè ne: Mònaayi, mulùmè wàlu . . . umwe wetù, . . .

²⁸¹ Mpindyewu, nwènù bânà bèetù bàà bakàjì bananga ne bàà mushinga mukolè ne banangìibwe (Lekèlaayi ncitèèkè mùshindù awu.), kanwèdikù meji ne ndi nkùpa bukènkè bùdi pa lù—lulamatu ne pa buumaamù bwà musàngeelu, bwà mushinga mukolè abu to. Ndi nteeta kuleeja apa ne cìdi muntu mukàjì . . . Bu nwènù mwà kuswà! Ne nwènù batèeleji bàà mikàbà yà mèyi, nwènù bakàjì bìikalà mwà kutèeleja mukàbà wa mèyi ewu abu, ncyèna nteeta bwà kunüdyombola to, Mémè ndi ànu musadidi cyanààna wa Mukalenge bwà kutwàla Bukènkè. Cintu cyà citàmbe kwikala cyà ciipanshi ne cyà nsòmbelu wa masandi ne cyà citàmbe kwikala cikoooyike pa buloba mmukàjì pàdiye mubi. Kàdi cilengà cyà citàmbe kwikala cyà mushinga mukolè cìdikù bwà mulùmè, pa kuumusha lupàndù lwèndè, mmukàjì mwîmpè. Nènku ndi ngambila wa ciipanshi, wa nsòmbelu wa masandi, mupwekèshìibwe milongo awu. Ne nêngìikalè mwà kunùleeja kaaba aka mene patùcìdipù apa, bipìcìibwe ne mémè munùleejè bwà cinyi ndi . . . ne Bible ùdi ùlongesha bwà bakàjì kabìikadi bayiishi, bampaasàtà, balongeshi, anyi ní ncinyi cìkwàbò cyònsò mu èkèleeziyà. Mpindyewu, tèèlejàayi ànu eci:

Ki MUKALENGE . . . kwambayè ne: Mònaayi, mulùmè wàlu . . . umwe wetù, (Mpindyewu, Yèyè kàakamba ne mukàjì wàkalwa umwe wabò to, "mulùmè wàlu umwe.") . . . ne mumanyè bîmpè ne bibi: . . . (Mukàjì yèyè kàvwa mumanyè to; yèyè ùvwa museeswìshìibwe. Nudi nucimòna anyi?)

²⁸² Mpindyewu, Pòlò mmwambè ne: "Ncyèna ngiitaba bwà mukàjì kulongeshayè anyi kunyèngayè bukòòkeshi nànsha bwà bìshi to, kàdi . . . bwalu Adàmà ngwàkenjiibwa dyàmbedi ne pashìishe Evà. Ne Adàmà kî ngwàkaseeswìshìibwa to, kàdi mukàjì ngwàkaseeswìshìibwa." Pa nànkù mukàjì kàakalwa umwe ne Nzambì to. Kàvwa ne cìvwàye mumanyè to, ùvwa museeswìshìibwe. Nudi bacyùmvwè anyi? Nwènù bacyùmvwè,

ambàayi “Amen,” bwà mèmè... [Disangisha didi dyàmba ne: “Amen.”—Muf.]

... *MUKALENGE... kwambayè ne: Mònaayi, mulùme wàlu... umwe wetù, bwà kumanya bìmpè ne bibi: nènku kumanya... nènku mpindyewu, bwà kikkadi wàluwa kwolola cyanza cyèndè, wàngata kàbìdì ku mucì wà mwoyi, ne wàdya, ne wikala ne mwoyi bwà kashidi:*

Ki bwà cinyi MUKALENGE... wàkamuumusha mu budimi bwà Edènà, bwà kudimayè buloba kwàkangaciibwàye.

Pa nànkù yéyè wàkiipata mulùme; ne wàkatèèka Bakèlùbà ku esètè kwà budimi bwà Edènà, ne mwelè wà mvità mu lupeepèle... mwelè wà mvità wà kapyà mwikàle wùnyùnguluka ku nseke yònsò, (Nudi bamòne nyama yinaayi ayi anyi? Kùdì nseke ànu yinaayi kùdì mwà kuya, nwamònu’s: esètè, nord, wesètè, ne sud. Bakèlùbà aba bàvwa ne mwelè wà mvità wà kapyà ku ciibi cyà lupangu...) bwà kulama njila wa ku mucì wà mwoyi.

²⁸³ Bwalu bu muntu mwà kulenga cyanza ku Mucì wà Mwoyi, díbà adi ùvwa mufwànyine kwikala ne mwoyi bwà kashidi.

²⁸⁴ Nènku Bakèlùbà aba, batèèdiibwe bwà musangu wà nzànzànzà, bàakatèèkiibwa ku esètè kwà lupangu, bàya ku nseke yinaayi. Bìvwa bikèngela mèmè kwikala mwenzè aci cishìllàngàne ndambù ne cyòcì aci; ncyèna ne mùshindù wà kwenza bikùmbànàngàne menemene ne mèyi matùma a Nzambì ne bikwàbò mùshindù awu to, kàdì ndi—ndi ànu... bwà nùmanyè cìndì muswè kwamba. Ki budimi bwà Edènà *mbwòbù abu*. Ne ciibi ncyeci *apa* mene, cìkàngukila *apa*, cyùnzuluka cìshààla bwàshì, ne ku ciibi eci kùvwa Bakèlùbà. Bakèlùbà! Nènku, vùlukàayi ne, kî mbambè ne “Mukèlùbà” to, mbambè ne “Bakèlùbà.” Bakèlùbà bàakatèèkiibwakù bwà kulama Cinyi? Mucì wà Mwoyi. Ki Cìvwbò ne cyà kulama, Njila wa ku Mucì wà Mwoyi. Njila, Udi Njila awu Nganyi? [Mwanèètù wa balùme kampàndà ùdì wàmba ne: “Yesù.”—Muf.] Ciinè aci ncileejila penyì? Mwaba wà cijila ngwòwò *ewu*, Bakèlùbà mbòbò *aba*.

²⁸⁵ Mpindyewu, tàngilàayi, fùndaayi byònsò ebi. *Ewu* ki wà Cijila—wà Cijila... Mwaba mutàmbe cijila *ewu*, Mwaba mutàmbe cijila, *ewu* mmwaba wà cijila, ne mbù nyèyè *ewu*, ne tùndeyi twà bukènkè ntwòtò *etu*, mwandamutekètè yìdì yìfidilà Bukènkè *apa*, munda *emu*, munda *emu*, munda *emu*, munda *emu*, munda *emu*. Nwamònu anyi? Yidi yileejà cinyi? Yidi yilama ne yileejà ne Kapyà kàà Nzambì Njila wa ku Mucì wà Mwoyi awu. Nwamònu’s, kacyèna mwà kufùmina lwà *apa*, sèminèrè wa ba-Presbytériens anyi sèminèrè wa beena Mpenta to, bikèngela cìfuminè *Apa*, ciikàle cileejà Bukènkè. *Eyo*.

286 Nudi numòna's, Bakèlùbà bàvwa Yone mumòne apa ababa bàvwa ne cyà kwikala batùme ntèmà ku dilama dyà Mucì wà Mwoyi, pa nàнку bàvwa ne cyà kwikala batùme ntèmà kùdì bantu. Anyì nùbalàayi Genèsè, twalukila cyàkàbìdì ku Genèsè ne: "Bàvwa bàlama Mucì wà Mwoyi, bàWùlama, Njila wa ku Mwoyi." Njila wa Mwoyi! Njila awu ùdì bishi? Yesù wàkamba ne: "Mémè ki Njila awu. Mémè ki Dyàmpà didì difùme kùdì Nzambì mu Dyulu adi. Muntu yéyè mudyè Dyàmpà edi, neikalè ne mwoyi kashidi." Mpindyewu ki Njila wa dyalukidila ku Mucì wà Mwoyi awu nyawù. Nwacyũmvù anyì?

287 Mpindyewu, ku eci, ndi muswè mpindyewu kuleeja ne kucìvwija cyà bushùwà ne: ncyoshelu. Mpindyewu, eci cìvwa ne cyà kwikala cyoshelu mu budimi bwà Edènà. Ndi nnwàmbila ne mbwà cinyì. Nudi bavùlùke ne Kaayinà ne Abèlè bônso bàbìdì bààkalwa mwaba mwinè ewu bwà kukuukwila anyì? Pa nàнку aci cìdì cileeja ne cyoshelu cyà Nzambì cyàkatentemunyiibwa ne kutèèkiibwa mwaba ewu mu budimi bwà Edènà, ne njila umwèpelè wa dyalukidila mu Edènà nku cyoshelu. S'ki bwalu mbwòbù ebù cyàkàbìdì, nwamònu's, kwalukidila ku cyoshelu bwà kuya mu Edènà. Nènku bàvwa ne cyà kulama njila awu kuntwaku, kumulama, bwà kabìikadi bààlwa kwalukilamù to pàvwà cyoshelu eci kacìyi cibwikila kùdì mashi.

288 Éyi Nzambì, bantu kabèènakù mwà kucimòna anyì's? Nwamònu's, kakùyi cingà cintu to ànu Mashi! Bikèngela kwikalè difuta dyà cibawu, nkwasà wa ngàsà mwaba awu, cyoshelu cyà cilumbulwidi eci cìdì ne cyà kulwa nkwasà wa ngàsà; ne piikalà cyoshelu eci, piikalà Mashi muumusha, mu Ditùkù dyà cilumbulwidi adi nekwikalè kapyà kàà ciiji cìkolè cyà Nzambì bwà kulama cyàkàbìdì wòwò Mucì awu. Cintu cìdì ànu cìmwèpelè cyàbwelà cyàkàbìdì ku ciibi cyà Edènà eci, necìikalè nku Mashi a Yesù Kilistò. Nudi nucimòna anyì?

289 Mpindyewu, mònaayi. Èyowà, mpindyewu Kaayinà. . . Kaa, ki Kaayinà ewu; ne ki Abèlè ewu, Abèlè. Èyo. Mpindyewu, nsongààlùmè yònsò yìbìdì ayi yìdì yìlwa ku ciibi cyà lupangu eci bwà kukuukwila. Ncyà bushùwà anyì? Pa nàнку cìvwa ne cyà kwikala cyoshelu cyà Nzambì. Ncyà bushùwà anyì? Ne kumpàlà kwà cyoshelu eci bôbò bààkiibaka mupinganyi, cyoshelu cikwàbo. Cyoshelu cilelèlè cyà Nzambì ncyôci eci, cìdì mu mwoyi wà muntu. Pashìishe kùdì cikwàbò cyoshelu kwìnshì eku, cìvwa cìleejà Mwaba mutàmbe cijila mu mwaba wà cijila.

290 Kaa! Kaa! Ndi ndyũmvwa ànu bu muswè kwakula mu myakulu's. Kaa, ekèlekèlè, Butùmbì bwà. . . Kanwènakù mwà kumòna ne nCipwàngàne anyì? Mònaayaakù ànu cyanàànà! Kaa, cìndì mwambìlè nàнку, mbwalu ncyèna mwà kupeta mèyì búngì bukùmbàne mu wànyì mùshindù sungasunga wà mwakulu wà Anglais bwà kwamba njiyà yìndì naayi to. Nwamònu's, bikèngela bwà cintu kampànda cyàmbè patòoke.

291 Bu mùdì Mwanèètù Rowe, diplòmàtè wa Mfùmù wa ditùnga... Bamfùmù bàà ditùnga batwè ku bànaayi anyi bàtaanu, kwambayè ne: “Kaa, Mwanèètù Branham, dilòòlò kampànda ndi mulwè mu disangisha.” Yèyè ne: “Ncìvwa mumanyè cyà dyanza to,” yèyè ne, “mvwa mwimanè mwaba awu.” Ki yèyè ne: “Kaa,” yèyè ne, “ntu munangè Mukalenge matùkù àànyì ònsò a mwoyi.” Yèyè ne: “Ntu” (ngeela meeji) “Épiscopalien.” Yèyè ne: “Ne mvwa ndyàmbidila ne mvwa mumanyè Mukalenge.” Yèyè ne: “Kàdi dilòòlò kampànda mèmè kukènzakana, ncìyi mumanyè cyà dyanza to.” Yèyè ne: “Ncì—ncìvwakù mufwànyine kubwelamù pàànyì ànu nàнку cyanààna to, kàdi” yèyè ne, “mèmè kuumvwa Diyì dipàtuka. Kaa, ki kubangaDì kulwa.” Yèyè ne: “Mèmè kubanga nkàadi ntwà eku ntwà eku pambèlù pàà nntèntà apu, ntwà kumpàla ntwà paanyimà,” ki yèyè ne “dyàkàmwè ncìvwakù mwà kwindila bwà kufika ku ciibi to, mèmè kuya ngenda nkalaba mwinshì amu pààkenzekà dibìkila dyà ku cyoshelu apu, ki mèmè kuya lubilu ku cyoshelu e kudyèla panshì, yèyè ne: “Mukalenge, mèmè ndi ngènzàmpèkàatù!” Ki yèyè ne: “Dibà adi Yèyè kunguuja tèntè ne Nyumà Mwímpè Wendè.”

292 Ki yèyè ne: “Ndi mwà kwakula myakulu mwandamukùlù mishiilàngàne,” bwalu yèyè ndiplòmàtè’s. Nwamònu anyi? Yèyè ùtu . . . ùtu mu . . . ùtu—ùtu dì—diplòmàtè wa Mfùmù wa ditùnga, ne . . . kacya ànu ku Woodrow Wilson too ne leelù. Yèyè ùtu diplòmàtè wa yònsò wa ku Bamfùmù beètù bàà ditùnga, diplòmàtè bwà matùngà a ku baabendè, mumanyè mwà kwakula mwakùlu mwenyi kàna wònsò ewu. Yèyè ne: “Ndi mumanyè pabwìpi ne mwakulu wònsò wà pa buloba wùdìbo bàfùnda ewu.” Kàdi yèyè ne: “Mvwa mùle tèntè ne butùmbi mu mùshindù wà ncìyiku mwà kwakula nànsha wùmwè wà ku yòyi ayi bwà kuMutùmbishakù to, pa nàнку ki Mukalenge kumpèèshaYè wà mupyamùpyà wà mu Dyulu bwà mèmè kuMutùmbisha naawù.” Kaa! Kaakakakaka! Ki bwalu mbwabù’s.

293 “Balamè ciibi eci.” Kaayinà ne Abèlè kulwabò kaaba aka bwà kukuukwilabò. Pa nàнку cìvwa ne cyà kwikala cyoshelu kampànda cidìbo bàlama’s. Ncyà bushùwà anyi, Bakèlùbà aba?

294 Cìkwàbò cintu, mònaayi ne cileeji cìkwàbò ncyòci eci. Kaayinà . . . Tàngilàayi Bible mpindyewu! Nùнку ndi munwàmbile bwà nwènù kubuululapù, kàdi bìdi . . . kí mbwalu to, nudi nucìpetela mu Genèsè. Èyo, tàngilàayi. Kaayinà wàkapàtuka, Kaayinà wàkapàtukila mu Bwikadi bwà Mukalenge ku ciibi cyà lupangu ku budimi aku. Pa nàнку Bwikadi bwà Mukalenge bùvwa ne cyà kwikala ku cyoshelu aci, ne cyoshelu aci cìvwa cìsanganyibwa ku ciibi aci. Butùmbi’s wè! Kaa! Èyo. Mmwaba wa cisòmbedi cyà Nzambì, ku cyoshelu Cyendè aku. Mpindyewu, Kaayinà wàkapàtuka mu Bwikadi bwà Mukalenge, muumùke mu mwaba ewu. Nudi baswè kucifùnda

anyi? Genèsè 4.16, nwênù baswè kucifùnda. Mpindyewu, mpindyewu, nudi naabi byònsò, bifùnda, kí mmwómò anyi?

²⁹⁵ Mpindyewu, ndi ne cikwàbò cintu cìndì muswè kuzòla kaaba aka bwà katanci kakesè cyanààna. Ndi ntèkemena ànu ne nkùndè yà nànsha umwe wa kunùdì kayèèna yilungula to, anyi ní ncinyi cyònsò pèku pèènu. . . Mpindyewu, mōnaayi. . . Yilungulè mwinè, bìdi ànu bìmpè, yòyi miinè's neyibutukè. Twánjì—twánjì twèlanganàayikù meeji pa kaaba aka, eci ki—eci ki cintu cidì—cidì cyà bushùwà.

²⁹⁶ Mòsà wàkangaciibwa mu Dyulu, Mòsà, muumùshìibwe pa buloba e kwangaciibwa mu Dyulu ne kumònayè cyoshelu cyà Nzambi aci. Ncyà bushùwà anyi? Ndi nteeta bwà kujaadika kaabwalu kàànyì kaaba aka. Nudi bamanyè cìndì nteeta kwenza, kí mmwómò anyi? Èyo. Yèyè wàkaya mu Bwikadi bwà Nzambi. Nènku pààkatuùlukàye kuumuka mu Bwikadi bwà Nzambi, wàkamba, Mò-. . . Nzambi kwambila Mòsà ne: “Enzà bintu byònsò pa buloba mu citembelu cyà byà mu Dyulu.” Ncyà bushùwà anyi? Èyo.

²⁹⁷ Mpindyewu, pashìishe pààkenzàye, pàkenzàye Mushèètè wà Cipungidi, wàkatèèka Bakèlùbà bàbìdi bwà kulamabò mushèètè awu. Nudi bamòne cìdìci anyi? Cìvwa nntempèlù. . . cìvwa ncyoshelu, balami bàà Nkwasa wa butùmbi. Bakèlùbà bàbìdi abu, Yèyè kwamba ne: “Ùbàfwimbè bàà cyamù cyà kabanda ne ùteekè mapwàpwà àbò àlengangana *nùnkù ewu*,” bwalu ki cyòci aci menemene cyàkamònàye mu Dyulu.

²⁹⁸ Ki cyòci aci menemene cyàkamònà Yone mu Dyulu, Bakèlùbà bànaayi aba ku nseke yìnaayi yà mushèètè wà cipungidi wà Nkwasa wa butùmbi mu Dyulu. Bàvwa mbalami bàà mushèètè wà cipungidi. Bakèlùbà, balami bàà ku nkwasà wa ngàsà.

²⁹⁹ Nwênù baswè kubala Mufùndu awu (katwèna ne dìbà dyà kukùfika to), fùndaayi Ekèsòdè 25.10 too ne ku 22.

³⁰⁰ Mpindyewu, bôbò bàdi bàlama nkwasà wa ngàsà pàdi Nzambi mu Butùmbi Bwèndè bwà Shekinàh apu. Butùmbi bwà Shekinàh bùvwa penyì? Ku nkwasà wa ngàsà awu. Ncyà bushùwà anyi? Bàdi bàlama Butùmbi bwà Shekinàh abu. Hmm! Yoyóyò! Tèèlejàayi, nwènu balundà bàanyi! Dìbà adi's bìdi bìleeja ne cimonyamonya cyònsò eci kacýèna mwà kulwa kuntwaku kwangata Cyòci aci nànsha. Bikèngela wikalè mulongolola kumpàlà kwà wèwè kubwela mu Bwikadi bwà Cì.

³⁰¹ Tàngilàayi Aalònà, mu cifwànyikijilu. Kumpàlà. . . Mpindyewu, vùlukaayi ne, disangisha mu matùkù awu kadìvwakù nànsha mwà kuseemena pabwìpì naawù to nànsha mu mùshindù kaayi. Kàdi pàvwà Aalònà ùbwelamù. . . Mmisangu bùngì kaayi yìvwàbi bikèngela bwà kubwelayè mùvwàWu amu? Musangu wùmwèpelè ku cidimu. Mmunyi mùvwàye ne. . . ? Bìvwa bikèngela kwikalayè muvwàle bilàmbà

kampànda, byenza kùdì byanza kampànda, mùshindù wà pabwàwù wà bilàmbà. Bìvwa bikèngela kwikalayè muvwàle mùshindù wà dikèma. Ûvwa ne kangonga kàvwà ne tumuma twà grènàdè, bwà musangu wónsò wùvwàye wènda kàdilè ne “Wa cijila, wa cijila, wa cijila, kùdì Mukalenge.” Ûvwa ùseemena ku nkwasà wa ngàsà aku, ne mashi.

³⁰² Ne bìvwa bikèngela kwikalayè mwela maanyi kampànda, mwela mànànanshì menza ne cilòngò cyà rose wa Shalònà. Ne Yesù nguvwa Rose wa Shalònà awu. Nènku, mōnaayi, cilòngò cyà rose ncintu cilenga kumòna, cidi ne mànànanshì munda mwàci. Kàdi kumpàlà kwà mànànanshì awu kwikalawù mwà kupàtuka, bikèngela bàvìngè cilòngò cyà rose aci, ne pashìishe bàcikàmè bwà mànànanshì kupàtukawù mu cilòngò cyà rose amu. Yesù, mu mwoyi Wendè, ùvwa mwoyi wà mutàmbe kwikala mulenga kumòna wùkààvwakù kacya; kàdi Kàvwa mufwànyine kushààla mùshindù awu to, bwalu bìvwa bikèngela kulaabaYè Èkèleeziyà Wendè (bwà kuseemena pabwìpi ne Cijila Cyèndè), pa nàнку mwoyi Wendè wàkakàmiibwa bwà kupàtukawù. Ne Nyumà Mwìmpè umwèumwè uvwa pa Yèyè awu nguudi mutèèka pa Èkèleeziyà, ne Yèyè ùdì ùMuvwija umwèumwè awu makèèlèlè, leelù, too ne kashidi, Rose wa Shalònà, mànànanshì a cilòngò aci. Muntu udi useemena mu Mwaba mutàmbe cijila ewu bikèngela àlaabiibwè ne Nyumà Mwìmpè umwèumwè awu. Nènku pàdiye wènda: “Wa cijila, wa cijila, wa cijila, kùdì. . .” (Kì nnè cifwankà cipàyika ku mishikù to.) “Wa cijila!” (Kì nnè nshìngù wendè wa nkoolò mubùnya to.) “Wa cijila, wa cijila, wa cijila,” muvwàle cijila cyà Yesù Kilstò. Hmm! Mùshindù mwìnè Wùdì mulenga’s wè! Kaa!

³⁰³ Mpindyewu, “nkwasà wa ngàsà.” Mpindyewu, nkwasà wa ngàsà ùdì mu mwoyi, nkwasà kùdì dikenka dyà Butùmbì Bwèndè—Bwèndè bùpàtuka mu bânà Bèndè bōnsò, Butùmbì bwà Shekinàh mu mwoyi wà buntu. Mwoyi wà muntu’s ngwòwò *ewu*. Ncyà bushùwà anyi? Kì nkwasà wa ngàsà awu anyi? Mmuniyè mùdiku upìcilamù bwà kubwela mu Cyòci aci kupìcila ku ndongolwelu mishìilèshìilàngàne eyi? Nkupìcila ku budìswìlè, budìswìlè. Ûbwela *emu*, ne ùpicila *kwàka*, ùpàtukila mu *cinyi*? Butùmbì bwà Shekinàh. Butùmbì bwà Shekinàh ncinyi—ncinyi? M’Bwikadi bwà Nzambi. Nènku pàdi muntu mulème wènda, anyi muntu mukàjì, ùdì ùleeja Butùmbì bwà Shekinàh. Kèna ùbwela mu binàyidi byà twartà twà mfrangà ne—ne wènda bintu byà lukutukutu, ne ùpàtuka apa mwikàle ùvila Dìyi nànsha. Cidì bantu bàmba nànsha ciikàle cinyi, yèyè mmutèèke wèndè mwoyi pa cintu ànu cìmwèpelè: Nzambi. Ne pìikalàbi bulelèlè ne yèyè mmubiikidiibwe kùdì Nzambi dìbà adi Yesù Kilstò ùdì ùDìleejila mu yèyè ne Bùtumbì bwà Shekinàh, wènda bintu bìmwèbìmwè byàkenzàYe Yèyè kale wàwa abi; ùmwènesha Èvànjeeliyò umwèumwè awu, ùyiisha Dìyi ùmwèdimwè adi, Dìyi ùmwèdimwè adi

dimwèneshiibwa mu cipimu cimwècimwè cívàku musangu awu aci, ànu mùvwàbi bulelèlè ku Mpenta amu mmùdici cipimùbwè cyàkàbìdi. Kaa, ekèlekèle!

³⁰⁴ “Nkwasa wa ngàsà.” Yèhezèkèlè ne Yone bwònsò bwàbò bàakamòna bintu bimwèbimwè abi. Mpindyewu, mònaayi, mpindyewu tukàadi ànu pabwípì ne kufiika ku ndekeelu, ànu mu katanci kakesè cyanààna emu. Mpindyewu, ki mwaba wùndi muswè bwà nwènù kupetelakù cintu kampànda ewu. Kaa, bu nwènù mwà kuswà kacìnùpìcìkù to! Mpindyewu, mbanganyì bàdikù bamanyè ne Bakèlùbà abu ki bàvwà *Bifukùibwà bìdì ne mwoyi* kabàyi nyama? Bòbò ki bàvwà. . . mulongo wà mutàmbe kutùmbuka.

³⁰⁵ Mpindyewu, Mwanjèlò ùdi mulongo mutùmbùke kutàmba muntu anyì mmulongo mushàadìle? Èyo, mukalenge. Udi mutàmbe bunène nganyì, mmwànà wa Nzambi anyì m’Mwanjèlò? Mmwànà wa Nzambi! Nganyì udi Nzambi mufwànyìne kutàmba kuumvwila, m’Mwanjèlò udi mwimàne kumpàlà Kwèndè aku ùsèngeleela bwà cintu kampànda, anyì ng’umwe wa kunùdi nwènù abu wàkwilangana? S’ng’umwe wa kunùdi nwènù awu! Nwamònu’s, mbwalu nudi bàna bàà balùmè ne bàà bakàjì. Bòbò—bòbò mbasadidi. Nwamonu anyì? Bòbò mbasadidi, kàdi nwènù nudi bàna bàà balùmè ne bàà bakàjì. Pa nàнку mònaayi ne mbukòokeshi kaayi bunùdi naabù, twètù tudi ànu tuciina bwà kukwàta naabù mudimu.

³⁰⁶ Mpindyewu, ndi muswè bwà nùmonè kaaba aka, eci ncilenga be. Kaa, ekèlekèle! Lekèlaayi mfikè ku kaaba aka ntupikèku bimwè byà ku cyòci eci bwà ngaamòna mwà kupweka ku eci. Angàtaayaaku crayons yènù mpindyewu, cìmvwà menemene nswà bwà nwènù kuzòla ncyeci. [Mwanèètù Branham ùdi ùzòla ku cibàsà—Muf.] Pàmwàpa mbìmpè ncikèpèshèku ndambù. Mpindyewu, Izalèlèlè mu lwendu lwàbò, pàvwàbo bààsa bitùùdilu, mpindyewu tàngilàayi eci ne ntèmà, bàvwà bààsa bitùùdilu: cimwè, bibìdì, bisàtù, binaayi. (To, ngeela meeji ne ndi mutùpàkàne.) Cìmwè, bibìdì, bisàtù; cimwè, bibìdì, bisàtù; cimwè, bibìdì, bisàtù; cimwè, bibìdì, bisàtù; mùshindù awu ngùvwàbo bààsa bitùùdilu binyùngùlùkile nkwasa wa ngàsà. Mpindyewu, ndi mumanyè ne, nwènù bònsò nudi bamanyè aci, nukàadi bacitàngile ne bacibalè mu Dipungila Dikùlukulu.

³⁰⁷ Mpindyewu, ku luseke lwà ku esètè, luseke lwà ku esètè, apa mene, nèncifundè bwà nwikalè batwìshìibwe bwà kucyùmvwa. Esètè, luseke lwà ku esètè lùvwa misangu yònsò ànu Yudà. Eci nciibi, Y-u-d-a, Yudà. Nènku ne Yudà. . . ùvwa mfùmù wa bisàmbà bisàtù biikàle ne dyàbò dibèndelà; bisàmbà bisàtù biikàle ne dyàbò dibèndelà, dibèndela dyà Yudà. Nudi bavùlùke. . . Mbanganyì bàkaadiku bamòne *Mikenji Dikùmì, Mikenji Dikùmì* yà Cecil DeMille? Èyo. Anyì, nudi nùcibalè ànu apa mene mu Mifundu, mu Mifundu amu’s wè, èyo, kùvwà Yudà ku luseke lwà ku esètè. Èyo.

308 Ku luseke lwà ku wesètè, kwinshi *eku*, (Mpindyewu cífúndaayi, nùcibalè bímpè. . . cidi mu Ekèsòòdè, ne bikwàbò, pààkapàtukàbo.) kùvwa Efàlàyimà, E-f-à. Ne yéyè ùvwa ne bisàmbà bisàtù biikàle ne dyàbò dibèndelà. Èyo, Efàlàyimà.

309 Mpindyewu, ne ku luseke lwà ku sud kùvwa Luubènà, L-u-u-b, ne bisàmbà bisàtù biikàle ne dyàbò dibèndelà.

310 Ne ku luseke lwà ku nord kùvwa Danà, Danà ne bisàmbà bisàtù biikàle ne dyàbò dibèndelà. Èyo.

311 Mpindyewu, mùshindù awu ki wùvwàbo bàasa bitùùdilu. Mpindyewu, vùlukàayi, tùbalàayi mpindyewu mu Mifùndu mpindyewu bwà twètù kucyùm vwa bímpè menemene. Nèmbangilè lwà paanyimà ku mvensà wa 7:

Ne nyama. . . ùvwa mufwànyikijìibwe ne nyama wa ntambwe, ne mwibìdì. . . mufwànyikijìibwe ne kànà kàà ngombe, (anyì ngombe mwànà) ne nyama mwisàtù ùvwa mufwànàngàne ne kwísù kwà muntu, ne nyama wa inaayi ùvwa. . . ne. . . nyama mwinàyi ùvwa mufwànàngàne ne mukankù munkaci mwà kubùuka.

Ne nyama yìnaayi ayi yìvwa umwe ne umwe wa kùdiyi ne mapwàpwà àsambòmbò; ne yìvwa myùle tètè ne mèsù munda: ne kayèèna ne diikisha to muunyà ne bufùku, yàmba ne: Wa cijila, wa cijila, . . . Mukalenge Nzambi wa Bukolè bwónsò, uwwakù, udikù, ne wàlwa awu.

Ne pàakafilà nyama eyi butùmbi ne luumù ne kusàkidila kùdì ewu uvwa musòmbe pa nkwasà wa butùmbi, udi ne mwoyi kashidi ne kashidi awu,

Bakùlù makùmi àbìdì ne bànaayi abu bàakapòna panshì kumpàlà kwà ewu uvwa musòmbe pa nkwasà wa butùmbi awu, ne bàakakuukwila ewu udi ne mwoyi kashidi ne kashidi, ne bààkeela bifulu byàbò byà butùmbi—bààkeela bifulu byàbò byà butùmbi panshì kumpàlà kwà nkwasà wa butùmbi, bàmba ne:

Wèwè udi mukùmbànyìne, Éyi Mukalenge, bwà kupeta butùmbi. . . luumù. . . bukolè: bwalu wèwè udi wàkafùka bintu byónsò, ne bwà disànkà dyèbè byòbì bìdì. . . byàkafùkiibwa.

312 Mpindyewu, mpindyewu, tàngilàayi. ku luseke lwà ku esètè—luseke lwà ku esètè, yéyè wàkamòna kwísù kwà mùshindù kaayi? Bu nwènù mwà kumòna, ùvwa nnyama wa ntambwe, n-t-a-m-b-w-e, ki cìvwà dibèndelà adi. Ki cìvwà—ki cìvwà dibèndelà dyà cipiminu cyà Yudà. Bwalu Yéyè ùdì. . . Yesù mmupàtùkile mu. . . Cyà bushùwà! Ne Yéyè ki Ntambwe wa cisàmbà cyà Yudà.

313 Mpindyewu, mbanganyi bàkaadiku bamòne cidiminanzaji? Bààbúngì bàà kunùdì mbamanyè cidìci: mùtootò awu. Nwamònu anyi? Ki cìvwà Bible wa kumpàla wa Nzambi. Mpindyewu,

cidi cibangila pa cinyi, nombà wa kumpàla mu cidiminanzaji, cimfwànyì cyà kumpàla? M'virgò! Ncyà bushùwà anyi? Kàdi cyà ndekeelu ncinyi? Leo, nyama wa ntambwe. Dilwa dyà Kumpàlà ne Dilwa Diibìdi dyà Kilistò, kwònsò aku. Bàdi bàngata kànsère kacyàmàkàne. . . anyi cikondo cicyàmàkàne cidi ànu too ne kùdici mishipa micyamàkàne, cidi cikondo cyà kànsère, ne mu cyôci aci ki mutùdi mene ne mwoyi tupicilamù emu.

³¹⁴ Nènku mònaayi mu cipaapu cyà musàkà pààkaciibakàye, mu cikondo cyà Henòkà, dibwe dyònsò divwa mwómò amu. Bàvwa mwà kupima bintu abi ànu menemene ne kwamba bwà mwità ne bikwàbò. Byònsò mbikùmbànàngàne pa kuumusha Dibwe dyà mùsongà. Bwà cinyi? Nudi numòna pa kabèji kèenu kàà ndola umwe aku anyi? Kàpàtùlaayi nùtangilè, mùsongà mmuumushakù. Bwà cinyi? Kacya kacitukù cyanji kwashiibwa mùsongà to. Kilistò ki Dibwe dyà mùsongà dyàkabèngiibwà adi, Yèyè nguvwa Dibwe dyà mùsongà dibèngiibwe. Udi wàlukila àbìdi adi pànshì aa. Tàngilàayi nùmonè mùvwà Èkèleeziyà awu kale wàwa, mu cikondo cyà ba-Luthériens, mwalàbàle menemene ku ntàku; pashìishe kulwayè wa banyààbanyà, mutàmbe kwikala ndambù wa banyààbanyà, ndambù menemene kàbìdi too ne pàdiye ùpweka kwìnshì; paanyimà pàà dyumukayè mu cikondo cyà beena Mpenta, pashìishe ùya buludì too ne pàdi dibwe dyònsò ne cyà kukùmbanangana ànu menemene bwà kutèekamù mùsongà awu, Èkèleeziyà wàtwala Yesù umwèumwè awu makèèlèlè, leelù, too ne kashidi awu. Bipwàngàne ànu ne mwàbì mwònsò!

Mpindyewu, Yèyè nguvwa Ntambwe wa cisàmbà cyà Yuda.

³¹⁵ Mpindyewu, muntu yònsò ukààdikù mubalè Bible mmumanyè civwa nombà wa Danà, anyi civwà—civwà Danà. . . Kaa, ndi nswà kwamba civwà, èyowà, Danà ùvwa cinyi? Dyèndè, yèyè ùvwa mukankù. Ncyà bushùwà. Yèyè ùvwa mukankù. Muntu kampàndà utukù ùbala Bible. Yèyè's ùvwa mukankù.

³¹⁶ Mpindyewu, Luubènà ùvwa muntu. Yèyè nguvwa wa kumpàlà, mutàmbe kwikala wa butekètè ku musùmbà mujimà awu. Yakòbò kàakambakù nànu awu mu—mu Genèsè 49 anyi? “Luubènà, wèwè ngudi wa kumpàla wa dikàndà dyànyì; kàdi ànu mùdi màyi amu, wèwè kubànda pa bulààlù bwànyì ne kukooyisha bulààlù bwànyì,” ne kulààlayè ne mukàji wa nsàkidilù wa tatwèndè. Nwamònu's, aci's ki nsòmbelu wa masandi wa buntu. Nudi numòna anyi? Nyama kàtu ne nsòmbelu yà masandi ayi to, ntambwe, nànsha cimwè cyà ku bintu ebi kacyèna ne byà nànu to; kàdi muntu ngudi naabi, wènda masandi ne mukàji wa mwena mutumba nèndè ne bikwàbò. Ànu mùdi. . . Cintu ànu cimwècimwè aci, byònsò mbikùmbànàngàne.

³¹⁷ Mpindyewu, eci cidi kwìnshì eku eci, eci, Danà ùvwa mukankù. Kàdi, eci, Luubènà ùvwa kwìsù kwà muntu. Kàdi Efàlàyimà ki ngombe awu. Mpindyewu, nuumvù cimfwànyì aci

anyi? Efàlàyimà . . . Mùshindù awu ngùvwàbo bàasa bitùùdilu, mu Bible.

318 Mpindyewu, bu nwênù mwà kumòna, Danà ùdi mfùmù wa bisàmbà bisàtù, Yudà ùdi mfùmù wa bisàmbà bisàtù, Luubènà ùdi mfùmù wa bisàmbà bisàtù, ne Efàlàyimà ùdi mfùmù wa bisàmbà bisàtù. Ìnaayi yìsàtù yìdi dikùmi ne ìbìdì, bisàmbà dikùmi ne bibìdì byà Izàlèlèlà. Nwamònu’s, cyònsò cyà ku byòbì ciikàle ne dyàbò dibèndelà; ne dibèndelà dyà Yudà òvwa nntambwe; dibèndelà dyà Luubènà, muntu; dibèndelà dyà Efàlàyimà, ngombe; dibèndelà dyà—dyà—dyà Danà òvwa mmukankù.

319 Mpindyewu, tàngilàayi paanyimà apa cìdi Yone mwambè: “Ne umwe ùvwa ne kwìsù . . .” Tùbalàayaaku kaaba aka mpindyewu, tùmònè ànu ní kacỳèna cintu cìmwècìmwè cìvwa mu Dyulu aci:

. . .nyama wa kumpàla ùvwa mufwànàngàne ne nyama wa ntambwe, (Yudà) . . .nyama mwìbìdì ùvwa mufwànàngàne ne kànà kàà ngombe, (mbwena kwamba ne ngombe mwànà) . . .nyama mwisàtù ùvwa kwìsù kwà muntu, ne nyama mwinàyi ùvwa . . . mukankù mwikàle wùbùùka.

320 Ànu menemene mùvwà bisàmbà byà Izàlèlèlà byàsa bitùùdilu mu nyùngulukilu amu, biikàle bàlama, bòbò mbalami bàà pa buloba bàà bukenji bwà ku mushèètè wà cipungidi. Kaa, àlèluuyàh! Kanwènàkù nucìmòna anyi?

321 Mòna! Luse, n-k-w-a-s-a w-a n-g-â-s-à, “nkwasa wa ngàsà.” Cintu kacìvwakù mwà kulwa mwaba nànsha wùmwe mu nyùngulukilu wawù amu kacìyi cìpìcila mu bisàmbà abi to. Cìpìcila mu cinyi? Ntambwe; cìpìcila kùdi muntu, meeji a muntu; ne cìpìcila kùdi kabalù kàà mudimu, mùdi ngombe; anyi cìpìcila kùdi mukankù, lubilu lwàwù lukolè alu. Nwamònu anyi? Dyulu, buloba, munkacì amu, ne mu nyùngulukilu mwònsò; nudi numòna’s, bàvwa balami. Ne kuulu kwàwù kùvwa Dikunji dyà Kapyà. Mwanèètù, cintu nànsha cìmwè kacìvwa cilengakù nkwasà wa ngàsà awu kacìyi cìseemena . . .

322 Ne cintu cìmwèpelè cìvwa mwà kuseemenakù cìvwa nku mashi. Aalònà ùvwa ùbwelamù musangu wùmwe ku cìdimu mwikàle ne mashi. Mpindyewu nudi nucìmòna anyi? Mpindyewu, tàngilàayi. Mfùmù yònsò wa bisàmbà bisàtù mwikàle ùlama nkwasà wa ngàsà, nkwasà wa ngàsà wa Dipungila Dikùlukulu. Mpindyewu, nwafùndu aci anyi, nwênù bònsò? Mpindyewu, cipyacipyà ncyòci eci, mwanèètù. Tèèlejàayi eci, pashìishe netùye kumpàla. Mpindyewu, vùlukàayi ne, abu bàvwa balami bàà Dipungila Dikùlukulu. Mbanganyi bàkaadiku bacibalè mu Bible, bamanyè ne ncyà bushùwà? Nwamònu’s, ki balami bàà Dipungila Dikùlukulu mbòbò abu.

³²³ Mpindyewu tudi ne mwoyi mu cikwàbò cikondo. Butùmbi's wè! Kaa, mèmè ndi munangè eci cikondo! Kàdi nwènù? Mpindyewu, Nzambi ùdi ne nkwasa wa ngàsà leelù ewu udi ne cyà kulamiibwa. Nudi nwitabuuja aci anyi? Nkwasa wa ngàsà ùdi ùsanganyiibwa penyi? Mu mwoyi wà muntu. Mmwaba kaayi wàkabwelelaye mu mwoyi wà muntu? Mu ditùkù dyà Mpenta pàakabwelà Nyumà Mwímpè (udi mwikàle Nzambi awu) mu mwoyi wà buntu. Ncyà bushùwà anyi? Mpindyewu, tùfundàayi eci nwinshì eku, nènku nùdilongòlolaayi bwà kucizòla panwikalà baswè kucizòla. Mpenta, M-p-e-n-t, nêmfundè Mpenta. Eci nnkwasa wa ngàsà, Nyumà Mwímpè. Tèèkaayi emu. . . nênnwàmbilè mùdì bwalu, ncìvwija citàmbe kwikala cikumbànangàne, tùteekàayi apa "Nkuci" udi umvwija. . . nyuunyi, nwamònu's. Èyo, bàlama nkwasa wa ngàsà, mpindyewu Nzambi ùdi ne balami bwà nkwasa wa ngàsà leelù ewu anyi? Mpindyewu udi. . . Mpindyewu, tàngilàayi mùdici cizòdiibwe bilenga byà dikèma.

³²⁴ Mwà musómbe ditùkù adi nènku mèmè kumòna cyòci eci, ki mèmè kutùpika kàdi kubanga nyeemakana mwikàle nyùnguluka nyùnguluka nyùngulukila nkwasa awu, ngamba ne: "Butùmbi's wè! Butùmbi's wè! Butùmbi's wè! Butùmbi's wè! Butùmbi's wè," nyùnguluka, nyùnguluka. Charlie, nêngénzè byà bibi kutàmba mùntù misangu mikwàbò ngenza mwitu amu. Mwanèètù wa bakàji Nellie, bu mèmè mwà kwenza nànkù, wèwè's neùngiipàtè mu nzùbù mwèbè ne lùkàsà lwònsò. Huh? Kaa, mèmè's mwà ànu mpucìle mu cikondo cyà butùmbi. Mpindyewu, tàngilàayi nùmònè cìvwàci, cyàkenzà Mukalenge aci.

³²⁵ Mpindyewu, Mpenta, paanyimà pàà Mpenta, bàakafùnda Mukàndà wà (Cinyi?) Byenzedi byà Nyumà Mwímpè, B-y-e-n-z-e-d-i. Ncyà bushùwà anyi? Byenzedi bìdì bibanga ne cinyi, cintu cyà kumpalà bwà kubwela mu lupàndu? Byenzedi 2.38. Cyà ndekeelu ncyòci eci, mwaba awu. Ncyà bushùwà anyi? "Bàakuujiibwa bònsò tètè ne Nyumà Mwímpè ne bàakabanga kwakula mu myakulu mikwàbò. Ki Peetèlò kujuuka e kubàyiisha diyiisha. Bòbò kwamba ne: 'Citudi mwà kwenza ncinyi? Netùbwele mu cyòci aci bishi?' Yèyè ne, Byenzedi 2.38: 'Nyingàlalaayi, nùbatiijiibwè muntu ne muntu wa kunùdì, Dìna dyà Yesù Kilistò.'"

³²⁶ Mpindyewu, vùlukàayi ne, Nzambi ùdi ne balami bwà—bwà nkwasa wa ngàsà awu. Nkwasa wa ngàsà awu udibò bàlama awu ncinyi? Èyo. M-a-a-t, Maatàayi, ku esète; Luukà, Luukà; Maakò; ne Yone. Èvànjeeliyò yàbò yònsò yinaayi ayi yidi yishindika Mukàndà wà Byenzedi wùcìvwà wùlwa awu, bàdi bàwùlama mwaba wònsò wùdì muswè kùwùtàngila awu.

³²⁷ Twànjàayi kwangata ànu umwèpelè, umwèpelè cyanàànà, katwèna ne dìbà to. Ndi naabì makùmi àbìdì anyi bipite bifùnda kaaba aka, kàdi twàngatàayi ànu umwèpelè cyanàànà pa cyena-bwalu cyà lupàndu eci. Netùpetè dìbà dyà kusambila

anyi? To, tukàadi díbà ùmwe jaajaaja, nènku ndi ngeela meeki ne katwàkwikala naadi to ambà ànu nwènù baswè bwà kusambidila babèèdi. Mpindyewu, ndi ne. . . Ndi ne díbà búngì cyanaànà. Nwamònu anyi? Èyo.

328 Mpindyewu, mōnaayi eci! Maatàayi, Maakò, Luukà, ne Yone, ncinyi aci? Nombà wa pa buloba, wa maaÈvànjeeliyò, inaayi. Èyo, mōnaayi.

329 Mpindyewu, Maatàayi 28.19.28, mpindyewu, ki panùdi nwènù bānà bèètù bàà ba-Trinitaires nulalukila mpòpò apu, mwaba awu, 28.19. Èyo. Maatàayi, ku citùpà cyà ndekeelu cyà nshapìtā, mmwambè ne: “Ndaàyaaku, nùkalongeshè bàà matunga ònsò, nubàbàtiiza mu Dìnà dyà Taatù, Mwānà, Nyumà Mwìmpè”; kàdi ki Mpenta ulwàlwa ewu, ki Peetèlò kwambayè ne “Nyingàlālaayi, nùbatijiibwè mu Dìnà dyà Yesù.”

330 Kùdi cintu cipampàlāmùke mwaba awu. “Maatàayi, wèwè ki mulami wa ku esètè awu anyi?”

331 Ciibi aci cidi bìshi? Ciibi ncinyi? Yesù. Yesù mmwambè ne: “Mushikù wà mbèlu mmubùmbàkàne.” Ncyà bushùwà anyi? Cidi cìfùndiibwa. . . Cidi cìfùndiibwa bìshi ku dìleetà ku dìleetà, s-t-r-a-i-t anyi s-t-r-a-i-g-h-t? *S-t-r-a-i-t* mbwena kwamba ne “māyi,” “māyi àdi ciibi.” Udi ubwela bìshi? “Nyingàlālaayi, muntu ne muntu wa kunùdi ne nùbatijiibwè mu Dìnà dyà Yesù Kilistò,” ùkàngula biibi. Èyowà! Yoyòyò!

332 “Kaa, kàdi, Mwanètù Branham, wèwè’s udi ne Maatàayi 28.19 lwà kwinshì aku.” Aci ncyà bushùwà menemene. “Kàdi, Maatàayi, wèwè ki mulami wa ku cyòci aci anyi?”

“Bushùwà’s, mèmè’s ki mulami mu kaabujimà.”

333 Mpindyewu angàtaayi Maatàayi 1.18 nùmonè cidiye wamba, nùmonè ní ùdi ùlama—ùlama cyòci eci. Mōnaayi Maatàayi 1.18 ní ùdi ùlama Maatàayi 1. . . 28 ne Byenzenedi 2.38. Mōnaayi ní ùdi ùbilama!

Mpindyewu dilediibwa dyà Yesù Kilistò dyàkenzeka mùshindù ewu: . . .

“Nzambi Taatù nyewù, Nzambi Mwānà, Nzambi Nyumà Mwìmpè,” mùdìbo bàteeta kwamba.

. . . dilediibwa dyà Yesù Kilistò dyàkenzeka mùshindù ewu: Pāvà . . . mamwèndè Màriyà mubangila kùdi Yòzefù, kumpàlā kwà kabāyi banjì kulwa pāmwe, wàkasanganyūibwa mwikàle ne difù dyà kùdi Nyumà Mwìmpè.

Ngwèpi awu? Aci’s cyàkabàvwija bònsò bàbidi Umwe’s!

Nènku ebi bìvwa . . . byònsò . . . byàkenzeka, ne . . . Nènku mōnaayi, . . .

Mpindyewu Yòzefù bàyendè, bu mùvwàye muntu wa maalu malulàme, . . . kàyi muswè bwà kumunyangila

luumù kumpàlà kwà bantu to, wàkeela meeji a kumubènga mùshindù ewu.

...mònaayi, mwanjèlo wa Mukalenge, ùpweka, kulwayè kùdiye (Nudi bamanyè.) ne kwambayè ne: Yòzefù, wéwè mwànà wa Davìdì, kùcìnyì bwà kwangata Màriyà mukàjèèbè to: bwalu udi mwimicìibwe munda mwèndè awu ngwà kùdi Nyumà Mwìmpè. (Nwamònu anyi?)

Nènkù yéyè neàlelè mwànà wa balùme, . . . nebàmwinjìkè dìnà ne YESÙ: . . .

Ebi bìwwa . . . byònsò . . . byàkenjìibwa, bwà kumònakù mwà kuula . . . kùdi mupròfetà, . . .

Bwalu, virgò neimitè difù. . . (Yeshàayi 9.6) . . . virgò neimitè difù, ne . . . neàlelè mwànà wa balùme, nènkù nebàmwinjìkè dìnà ne . . . [Disangisha dìdi dyàmba ne: “Emanùwèlè.”—Muf.]

334 Ùdi ùcilama anyi? “Taatù, Mwànà, ne Nyumà Mwìmpè,” Taatù, Mwànà, ne Nyumà Mwìmpè, ànu cyòcì eci’s: myànzù yà Dìnà dimwèpelè adi. Pa nànkù mulamì awu mmwimàne ànu mwaba awu mene bwà kucitwa nyama ku mikòlò. Nwacyùmvù anyi? Kaa, ekèlekèlè! Mpindyewu, mbanganyì bàdi bamanyè nànkù? S’ki cyòcì eci! Yéyè mmulami.

335 Mpindyewu, twánjàayi ànu . . . Ndi ne musùmbà mujimà wà bakwàbò bwà lupàndù, kwangata bakwàbò aba. Kàdi mpindyewu twètù baswè kwenza mulongo wà babèèdi mu katanci kakesè emu, ànu bwà tusunsa tutwè ku dikùmi cyanàànà twánjì tùteetàyibì cintu kampànda cikwàbò bwà katanci kakesè cyanàànà. Twàngatàayi ndambù wa Mifùndu mpindyewu. Ndi mufwànyìne kufùnda biinè ebi penyì? Mbyòbì ebi. Eyo.

336 Mpindyewu twàngatàayi bwà kumòna ní Maatàayi ewu mpindyewu neàcilamè bwà dyondopa dyà kùdi Nzambì. Nudi ne crayons yènu ne bikwàbò mpindyewu, yinùdi nufùnda naayi cyòcì eci anyi? Eyo. Tùmonèbi Maatàayi ní ùdi ùtàpulula . . . ùcilama. Twàngatàayi Maatàayi 10.1.

337 Twàngatàayi bwà tùmonè Yone ní . . . ànu umwe anyi bàbìdì, twàngatàayi bàbìdì, anyì umwe anyi bàbìdì bàà ku cìdì aba nùnkù, Yone 14.12, ne 15.7.

338 Tùmonèbi ní bàdi bàlama dyondopa dyà kùdi Nzambì banyùngùlùkile Nkwasa wa butùmbi wa Nzambì! Maakò 16, Maakò 11.21 ne 22.

Luukà 10.1 too ne ku 12, ne Luukà 11.29 too ne ku 31. Twánjàayi kwangata ndambù wabò, tùmonèbi ní bàdi bàlama, tùmonèbi ní bàdi bàlama bukenji bwà kufika ku dyondopa dyà kùdi Nzambì byà mwòmùmwè ne mùdìbo bàlama ciibi bwà

dibàtiiza dyà mu Dîna dyà Yesù. Tudi mwà kucyàngacila mu yònsò wa kùdìbo. Ncyà bushùwà.

³³⁹ Mpindyewu twànjàayi ànu kwalukila cyànyima bwà kumòna Maatàayi 10.1. Buulùlaayi ànu cyanàana mpindyewu bwà twètù . . . ne pashiishe netùjikijè mu tusunsa tukwàbò tùtaanu, anyi dikùmi, bwà twòtù tupite búngì, bu Mukalenge mwà kwanyisha. Èyo, twàngatàayi Maatàayi 10, tùmònèbi Maatàayi ní ùdi ùlama Byenzi byà bàpostòlò.

³⁴⁰ Nuvwa nwela meeji ne—ne Nzambi kàtu ùtèeka balami banyùngùkile Dìyi Dyèndè anyi? Tùmònàayi ngombe awu, nyama wa ntambwe, muntu, mukankù ní kabyèna ànu kacya byàsòmba ku biibi abi pa buloba apa mene mpindyewu mene anyi? Èvànjeeliyò nyòyi eyi, Èvànjeeliyò yìnaayi ayi. Nwamònu anyi? Nènku, nudi numòna's, luseke lwònsò lùvwàyi yìya yìvwa yìya ànu kumpàlà. Kayèna yàmba maalu àbèngangana ne a mukwàbò to, yìdi yìtwàngana nyama ku mikòlò ewu ne ewu. Nwamònu anyi? Ewu ùya ne meeji a ngwengwengwe a muntu; mukwàbò ùya ne lubilu lukolè lwà nyuunyi wa mukankù; mukwàbò mmpaasàtà . . . Ewu mmutangadiki, bwà kubùuka mùtù mutangadiki amu, nwamònu's; mukwàbò mmpaasàtà; mukwàbò mmukolè wa biyooyi; mukwàbò mmwena meeji a ngwengwengwe. Nwamònu's, mulama ku nseke yònsò, Nzambi mwikàle ùlama Èvànjeeliyò wa Nyumà Mwimpè ewu! Mwitàbùjè, wèwè mwanèètù! Èyo.

³⁴¹ Mpindyewu twàngatàayi Maatàayi 10.1.

Nènku pàakabùkilàye bayiidi bèndè dikùmi ne bàbìdi kùdiye, wàkabàpeesha bukolè . . . (Hmm!)

Bàakadisanga mu cibambalu cyà kuulu,
 Bònsò munkaci mwà kusambila mu Dîna
 Dyèndè,
 Babàtìijìlwe ne Nyumà Mwimpè,
 Ne bukolè bwà mudimu kulwabù;
 Cyàkabènzèlè Ye bòbò mu ditùkù adi aci
 Yèyè neàkwenzèlè byà mwomùmwe,
 Mémè ndi nsànka be mùndi mwà kwamba ne
 ndi umwe wa kùdìbo.

³⁴² Kaa, anjì pùwishàku ànu mwànà bwà katanci kakesè cyanàana mpindyewu. Anjì tèèleja, tèèlejà ne ntèma:

. . . ne wàkabàpèèsha bukolè bwà kulwishangana ne nyumà yà bukooyà, . . .

³⁴³ Bampaasàtà bààbùngì bàtu bàlekela ànu nyumà yà bukooyà yishàala mu èkèleeziyà wabò; mvwàdilu wa bakàji, ngenzèlù wa maalu, manàyi a twartà, manàyi a mubèlè, maja, madyà à nsupù mu èkèleeziyà, byònsò . . . Kaa, luse wè!

*..kulwishangana ne nyumà yà bukooyà, bwà
kuyùpata, ne kwondopa mabèèdi a mìshindù yònsò
ne mäsaaamà a mìshindù yònsò.*

344 Nudi bamòne mùdi mulami awu musòmbe ku ciibi aku anyi? Mulami wa Èvànjeeliyò bwà kutwà mukàndà wà Byenzedi wàkafùndiibwà awu nyama ku mikòlò!

345 Mpindyewu, mvwa mumvwè mulongeshi munène ànu àbìdi àdi panshi aa, wàmba, kùdi . . . umwe . . . muntu munène's, muntu wa maalu malenga, mèmè mutwilàngàne nendè, mumulabùle ku cyanza, mwanèètù wa maalu malenga. Kwambayè ne: “Kàdi Byenzedi byà bàpostòlò's bìvwa ànu cibùmbà cyà kwibakilapù bwà Èkèleeziyà.” Huh! Mu ngaakwilù mukwàbò, yéyè ùvwa ne cibùmbà cyà kwibakilapù aci pambèlu *apa*, nwamònu's. Kàdi pààbì, Byenzedi byà bàpostòlò bìvwa munda, ne Èvànjeeliyò eyi yìdi cibùmbà cyà kwibakilapù bwà kuCii manyika pàmwè ne kuCikùba. Mònaayi mùdi meeji a—a—a muntu mwà kwenza cintu kanà cyònsò's. Mèmè's mvwa mufwànyine kwela meeji àmwèàmwè awu bu kabùyi Bwèndè Yéyè. Nwamònu anyi?

346 Cibùmbà cyà kwibakilapù, Mpenta kàvwa cibùmbà cyà kwibakilapù cyà Èvànjeeliyò to. Èvànjeeliyò yinaayi ayi yìdi cibùmbà cyà kwibakilapù bwà kutwà Mpenta nyama ku mikòlò! Paanyimà pàà bamanè kujuula cibùmbà cyà kwibakilapù eci, Mpenta kulwayè ku diikalakù. Ncyà bushùwa anyi? Cyàkafùndàbo dyàmbedi ncyèpì, m'Mukàndà wà Byenzedi anyi—anyi mbàpostòlò? Bàpostòlò. Yesù wàkaya wènda wènda byenzedi ne ùdyanjila kwamba cìvwà mwà kulwa, ki Maatàayi, Maakò, Luukà, ne Yone, balami bànaayi abu kulwàbò ne kubangabò kufùnda byònsò bìvwàbo bamòne byènzeka abi, bàbìlondelangana ànu menemene mùvwàbì amu, mùvwàbì mwà kwenzeka, cìvwà mwà kulwa kwenzeka. Ki dyàkàmwè bòbò kwibaka cibùmbà ciCinyùngùlùkile, ne ki Cyòci cìlwalwà eci! Amen! Maatàayi, Maakò, Luukà, ne Yone, ki cibùmbà cyà kwibakilapù aci, anyi mudimu wa mulami udi ukùba ntempèlù wa musinga munène awu, Nkwasa wa butùmbi, Dibènesha dyà Mpenta.

347 Kì ndingumba dyà beena Mpenta to, mwanèètù wa balùme, mwanèètù wa bakàjì, bòbò mbaalùkile buludì pambèlù pàà cintu cyònsò nkòong, uh-hum, baalùkile bayè kule kutàmba èkèleeziyà mikwàbò kanà yònsò eyi. Bàdi kule kutamba ne mùvwà ba-Luthériens. Ba-Luthériens bààkashàalakù bìmpè ndambù kutàmba mùvwàbo bòbò, ne aci ncyà bushùwà, batàmbe kufwànganakù ne cintu. Cyà bushùwà menemene's, Gene, bwalu, mpindyewu, ncìvwakù mumòne Yesù pambèlù pàà èkèleeziyà wa ba-Luthériens to, ùteeta bwà kubwela, kàdi ùteeta . . . bwalu ndi ngeela meeji ne bangabanga Yéyè kàvwakù mwómò to. Kàdi Yéyè—Yéyè ùvwa mu èkèleeziyà wa beena Mpenta kàdi kwipaciibwa. Aci's ncyà bushùwà.

Mpindyewu, Maataàyi 10.1.

348 Mpindyewu tuyaayaaku ku Yone 14.12 eku bwà tùmonebí ní—ní—ní Yone neàtwe bintu byà mushinga mukolè byà Mpenta ebi nyama ku mikòlò. Mu Yone, nshapità wa 14 ku mvensà wa 12, Yesù ngudi wákula ewu:

Bulelèlè, bulelèlè, ndi nnwàmbila ne: Ewu udi ungiitabuuja mèmè, byenzedi bìndi ngenza yèyè neàbyènzè pèndè; ne yèyè neènzè byenzedi binène bitàmbe ebi; bwalu ndi nya ku Taatù wanyì.

349 Kaa, mwanèètù, ciibi aci, kùvwà mukankù awu musòmbe mwaba awu mene aku bwalu ki mudimu wa butangadiki ngwòwò awu, nudi bamanyè's, mwikàle ùbùùka bu mukankù. Lubilu lukolè, ùbànda too ne muulu ùkabwela mu cipaapu cyà cipròfetà muulu mwàmwa, nudi numòna's, mwikàle mwà kudyànjila kumòna bintu ne kwamba maalu àkaavwàku, àdiku, ne àlwawà. Nwamònu anyi? Musòmbe mwaba awu mene mwikàle ùcilama, mwambè ne: "Byenzedi bìndi Mèmè ngenza!" Tàngilàayi mukankù awu, nwamònu's.

350 Nyama wa ntambwe nyèyè ewu, musadidi awu. Yesù wàkabàpèèsha bukolè. Ne Yèyè ùdi ùCikùba, Ùdi ùkùba Byenzedi 2.38. Ùdi umutwà nyama ku mikòlò mwaba awu mene, nyama wa ntambwe awu.

351 Ki lubilu lukolè lwà Èvànjeeliyò lùlwalwà elu, ne mukankù ewu, wàmba ne: "Byenzedi bìndi Mèmè ngenza nenubyènzè pèènù. Nenwènzè byàbùngi bipite ebi," ubùùka ùya naaCì pa buloba bujimà! Cyenzè bu nyuunyi wa nkuci mwena mulùme uvwabò bakòse mutù, ne bapòngòlòle mashi, bààmyamina pa buloba, wèla lubilà ne: "Wà cijila, wa cijila, wa cijila, kùdì Mukalenge," ùkezula mwena nsudi. Eyowà.

352 Mpindyewu, ndi ne mukwàbò mwaba awu, Yone 15.7. Tùbuululàayi buludì mu nshapità wa 15, ku mvensà wa 7:

Nwènù bashààle munda mwànyi, mpindyewu, ne mèyi àànyi. . . (kadiyi díyi dyà mu sèminèrè to) . . . mèyi àànyi mashààle munda mwènù, nenùlombè cinwàsàwà nwènù aci, ne nebànwènzèlèci.

353 Neyà bushùwà anyi? Dìbà adi Èvànjeeliyò awu mmulamè mwaba awu mene. Dìbènesha dyà Mpenta edi ndilamiibwe kùdì Yone ne Èvànjeeliyò wendè; mDilamiibwe kùdì Maataàyi, Èvànjeeliyò wendè.

354 Mpindyewu, tuyaayi ku Èvànjeeliyò udi ulonda, Maakò, nshapità wa 16, bwà tùmone ní Maakò ùvwa mulamè Dìbènesha dyà Mpenta edi. Maakò, nshapità wa 16. Mpindyewu, túbàngilàayi apa lwà ku . . . paanyimà. . . ùdi wákula bwà dibiiikà dyà ku lufù. Mpindyewu, tùtungunukàayi too ne kwìnshì ne patùdì tukafikà ku mvensà wa—wa 14 wa Maakò 16:

Paanyimà pàà yéyè *mumanè kumwènekela bàà dikùmi ne umwe pàrwàbo basòmbe bàdya, ki kubàdyulayè bwà bupidyà bwàbò ne dipapa dyà mwoyi wàbò, bwalu bòbò kabàvwa biitàbùùje aba bàvwà bamumòne pàrwàye mubiike ku lufù to.*

355 Kabàvwa biitàbùùje aba bàvwà bàteetà kubàmbila mukenji awu to. Nwamònu's, mùshindù awu ki wùdìbi leelù ewu. Bantu bàdì ne bujaadiki bwà Nyumà Mwimpè; bantu bàákamba ne: "Macimbu's, s'bàdì musumbà wà bansantu babùnguluki bàà mu malaba." Ki Yéyè kubàdyula bwà dipapa dyà mwoyi wàbò, nwamònu's, ne bupidyà bwàbò; bàvwà baMujingùlùle mu dibìikà Dyèndè dyà ku lufù abu.

Ne yéyè wàkabàmbila ne: Ndàayi pa buloba bujimà, nukayiishè cifùkiibwà cyònsò Èvànjeeliyò.

356 Cinyi? Bwà kuyiisha...eci...kùdi Èvànjeeliyò ànu umwèpelè; balami bànaayi. "Nùyiishè cifùkiibwà cyònsò Èvànjeeliyò ewu!" Mpindyewu, vùlukàayi ne, Yéyè ùdi wàngata bàbìdì, balami bònsò bànaayi (Maatàayi, Maakò, Luukà, ne Yone), nwamònu's: "Nùyiishè cifùkiibwà cyònsò Èvànjeeliyò!"

Ewu udi witabuuja ne ùbàtijiibwa neàsungidiibwè; ne ewu udi kàyi witabuuja neàpiishiibwè. (Nwamònu's, bikèngela ùbwelè mu dibàtiiza edi.)

Ewu ùdi witabuuja ne ùbàtijiibwa neàsungidiibwè;...ewu udi kàyi witabuuja neàpiishiibwè. (Kàà, mwanèètù, itàbùùjà, bu wèwè mwà kuswà!)

Ne... (Mutwàngaji, bwà kuswikakaja bikwàbò byà ku byambilu abi)...Ne bimanyinu ebi nebifilè aba bàdì biitabuuja;...

357 Èè, mpindyewu, twànji tùmonebi, ba-Méthodistes bàdì bàmba cinyi? "Bu wèwè mwà kwela mbilà, kwikala ne nsòmbelu mwimpè." Ba-Baptistes bàdì bàmba ne: "Ikàlà ànu ne diitabuuja ne ùbàtijiibwè." Ba-Épiscopaliens bàdì bàmba ne: "Ikàlà mwimàne bu épiscopalien, nùнку ewu, ne inyika mutù pàdì musambu wènda wimbika apu." Beena Kàtòlikè bàdì bàmba ne: "Ambà 'Mwoyi, Màriyà.'" Beena Mpenta bàdì bàmba ne: "Shààla mwena dìngumba dyètù. Bàtijiibwà mu Dìnà dya 'Taatù, Mwànà, ne Nyumà Mwimpè.'" Ki bwalu mbwòbù abu's. Nwamònu anyi?

...bimanyinu ebi nebifilè aba bàdì biitabuuja; Mu dìnà dyànyì... (Hmm. Kì mbyà "Taatù, Mwànà, Nyumà Mwimpè" pa bwalu abu to)... Mu dìnà dyànyì bòbò nebùpatè baadémons; nebàakulè mu myakulu mipyamìpyà;

Nebàkwatè nyòka ne byanza;...bòbò banwè cintu kanà cyònsò cidi cishebeyanganà, kacyakubenzela

bwalu to; nebàtentekelè babèèdi byanza, ne babèèdi nebasangalè. (Amen! Kaa, mwanètù!)

358 Mpindyewu alùkilaayi buludì ku wa 11 awu, nènku pashìishe netwikalè pabwìpi ne kujikija. Maatàayi 11, ne ndi ne 20 ne 21, Yesù ngudi wakula ewu. Byònsò ebi Yesù ngudi wakula, mpindyewu, kakwèna nànsha umwe mùdi Yesù kàyi wàkula to, mu yònsò.

Nènku pààkacyàbu, pàkaavwàbo . . . bàseemena pabwìpi ne Bèètaanìyà, nzala yàkamusùma:

Ne pààkamònàye mucì wà mfigì . . .

359 Ki pààkeelàYe mucì awu mulawu's (awu m'Maatàayi 21). Ndi ne . . . :12, bu nwènù mwà kuswà mfwilaayikù luse. Maakò 11.21 ne 22:

Nènku Peetèlò wàkamuvùlwija e kumwambilayè ne: Mulongeshi, mòna, mucì wà mfigì wùvwà mwelè mulawu mu njila awu . . .

Kàdi Yesù wàkandamuna e kumwambila ne: Ikàlaayi ne diitabuujà kùdi Nzambì. (Nwamònu anyi?)

Bwalu bulelèlè ndi nnwambila ne: (dìbà adi, mùvwa mmunda) . . . nnwàmbila ne: Ewu yònsò wàmbila mukùnà ewu ne: Tentèmùkà, ne edùbwà mu mbù, ne kàyi wèla mpatà munda mwà mwoyi wèndè to, kàdi . . . wìtabuujà ne bintu byàmbiye abi nebyènzekè, yéyè ùdi mwà kupeta . . . neàpetè byònsò byàmbiye abi.

360 Balùmyànà, ciibi cyà ku sud's ncilama kùdi ngombe. Ciibi cyà ku nord ncilama kùdi nyama wa ntambwe, ciibi cyà ku nord . . . Ndi njinga kwamba ciibi cyà ku esètè. Ne ciibi cyà ku nord ncilama kùdi mukankù munkaci mwà kubùuka, Yone, mutangadiki. Pashìishe ngàngàbukà elu luseke, Luukà, muntu.

361 Mpindyewu, tùmònàayi bì cìdì Luukà wàmba. Angàtaayi Luukà, nshapìt- . . . wa kumpàla awu. Ngeela meeji ne tudi ne Luukà 10.1 too ne ku 12, ki—ki mudimu mubàtùma naawù ngwòwò awu. Nwènù bònsò nudi bamanyè cidìwu, kàdi . . . Luukà, nshapìtà wa 10, ku 1 too ne ku 12. Èyo, tudi bafwànyine kuya ànu kumpàlà ne kucibala cyònsò, kàdi katwàkwikala ne dìbà dyà kwenza nàнку to. “Kwàtaayi njila ndàayi . . .” Nèmbangilè ku mvensà mwi3:

Kwàtaayi njila ndàayi: mònaayi, ndi nnùtùma bu bânà bàà mìkòòkò munkaci mwà mbwà yà diitu.

Kanwàmbulu nì nkabuta kàà mfranga, nì nsàpu wa ku luseke, . . .

362 Nwamònu's: “Kanùyi mu dìnà kampàndà dyà dingumba to. Ndàayi mùndì Mémè nnùtùma amu. Nwamònu ànyi? Kanùyi ne ditwishibwa dyà ne nenùpetè ndola binunu lukàmà bwà ditàbuluja edi to; nwènù kanùyi naayi, kanùyi to. Nudi

numòna's. Nulongololè tùmpanyè twènù atu." Yèyè ne: "Ndàayi kùndi Mémè nnùtùma aku." Nwamònu's.

Kanwàmbulu nì nkabuta kàà mfrangà, nì nsàpu wa ku luseke, nì mbisàbaatà: . . . kanwèdi muntu nànsa umwe muoyi mu njila amu nànsa.

363 "Kanwimanyi pa kaaba nwamba ne: 'Nèngǎnji kuya mmonè mùdi. . . aba nì mbalàale bishi. . . mùdi aba. . . ' Ndàayi buludi kùndi Mémè nnùtùma aku. Kanùtumu meeji kùdi muntu kampànda mukwàbò to."

Ne ku nzùbù yònsò kunwikalà mwà kubwela aku, . . . nwàmbè ne: Ditalala dùkalè ku nzùbù ewu.

. . . mwòmò mwikàle mwànà wa ditalala, ditalala dyènu nedyàlukilè. . . nedishaalè kùdiye; kabiyi nanku to, nedyàlukilè kunùdi.

Ne dībà òmwèdimwè adi nùshaalè, mu nzùbu umwèumwè awu (eyowa's wè) nùshaalè, nudyà ne nunwà bintu bìdìbo bàfila abi: (Mpindyewu, bintu byònsò byà "kubènga kudyà minyìnyi, ne bikwàbò" ebi. Èkèlekèle, Nzambì wanyi! Nwamònu anyi?) bwalu mwena mudimu mmukùmbànyine difutu dyèndè. Kanùyi ku nzùbu ne ku nzùbu to.

364 Kuya ne ba-Jones leelù, ku didyà dyà mundaamuunyà, ne kuya ne—ne babàkà bakwàbò ditùkù didi dilondà, ne bakwàbò kàbìdi didi dilondà adi. "Nùshaalàayi ànu mwòmò amu!"

Apu mpàndi mbwela mu masangisha kampànda, nudi bamanyè's, mòna's ndi nshàala ànu mu nzùbu wa cilàala-beenyi, ne nshàala ànu mwòmò amu, mwòmò amu menemene ki mùndi mpeta ditalala. Nwamònu anyi? Kùyi ku nzùbu ne ku nzùbu to!

Ne mu cimenga kanà cyònsò munwikalà mwà kubwela amu, mwòmò amu bóbò banwàkidilemù, nùdyayi bintu byònsò bìdi bitèèkiibwa kumpàlà kwènù abi:

Nènkù nwòndopè babèèdi—nwòndopè babèèdi bàdimu abu, ne nubàmbilè ne: Bukalenge bwà. . . Nzambì mbulwè pabwìpi neenù.

365 Kàdi mpindyewu, èè, ngǎnji mbalè mvensà udi ulonda awu:

Kàdi mu cimenga kanà cyònsò munùdi nubwela, kàdi bóbò kabàyi banwàkidile to, kwàtàayi njila nùye nùpatukè. . . mu cimenga aci mu. . . ditùkù. . . òmwèdimwè adi; . . .

Nànsa mene lupwishi lwà mu cimenga aci, lùdi lulamàte pambidi—pambidi pèètù, tudì. . . (Twǎnjibi kumòna mpindyewu.) . . . Nànsa mene. . . Ne. . . Nànsa mene lupwishi lwà mu cimenga cyènù, lùdi lulamàte pambidi pèètù, tudì tunùtuutwilalù: kàdi

ikàlaayi batwishùbwe bwà eci ne, bukalenge bwà Nzambi bwàfikì pabwìpì neenù.

Kàdi ndi nnwàmbila ne, necùikalè cyà bàtwàla mu ditùkù dyà cilumbulwidi bwà Sodomà, kutàmba bwà aci cimenga.

³⁶⁶ Kaa, mwanètù, ne ditwishibwa dibèneshùbwe adi's! Bôbò kabàyi bamòna, kabàyi bakwakidile to, ndà kumpàla, ambà ànu cyanànà ne: "Èè, panwikalà kanùyì banswè to, néntuutulé ànu lupwishi, ne lwà ku bisàbaatà byànyì, ne nèmpatukè nye." Mu ngaakwilù mukwàbò, ambà ne: "Ncyèna mwangàte kantu nànsha kàmwè to; mémè mudyè nì ncinyì cyònsò, nènnùfutèci, ne twètù tuya kutùyaaya." Yèyè kwamba ne: "Bulelèlà..." Ne cyònsò cyà ku bimenga mwàkayàbo kàdi kabàyi babàkidile amu, cyònsò cyà ku byòbi abi cyàkatùkina mu màyi ne bwàci mbutuùke leelù ewu. Ne cimenga cyònsò—cimenga cyàkabàakidilà aci, ncishààle too ne leelù ewu. Ki bwalu mbwòbù abu's.

³⁶⁷ Mpindyewu, mukwàbò kàbìdì, ne pashìshe tùjikijè. Tùmonèbi, tudi ne 10. 11.29 too ne ku 31, Luukà 11.29 too ne ku 31, pashìshe netùjikijè. Kaa, ndi munangè Eci!

Nènkù pàakakùngwilà bantu . . .

³⁶⁸ Tùmonèbi, ndi mwangàte...Awu n'Luukà, Luukà 11.29 anyi? Èyowà, ngeela meeji ne ewu mmufwànyìne kwikala yèyè. Èyowà:

Nènkù pàakakùngwilà bantu musùmbà mujimà, yèyè wàkabanga kwamba ne: Elu ndukòngo lubi: lùdì lùkèba cimanyinu; kàdi kakwàkwikala...kwikala... cimanyinu nànsha cimwè...cyàlùpèèshàbo to, pa kuumusha cimanyinu cyà Yona mupròfetà.

Bwalu ànu mùvwà Yona cimanyinu kùdì Niinìwà amu, kì...mwikàle kàbìdì Mwànà wa muntu kùdì lukòngo elu.

Mukalenge-mukàjì wa ku sud neàjuukè...ku cilumbulwidi ne...lukòngo elu, ne yèyè nealùpùishè: pààbì yèyè wàkafùma ku bitùpà byà kuleekùlè byà buloba bwà kutèèleja lungènyì lwà Solòmò; kàdi, mònaayi, munène mutàmbe Solòmò ùdì apa.

Bantu bàà mu Niinìwà nebàjuukè ku lufù ku cilumbulwidi ne lukòngo elu, ne...nebalùpùishè: bwalu bààkanyingalala ku diyùsha dyà Yona; kàdi, mònaayi, munène mutàmbe Yona ùdì apa.

³⁶⁹ Cìdì ngamba mpindyewu aci ncinyì? Bwà kujikija, nebikengelè ànu ndekelè bikwàbò bìye. Kàdi, bwà kujikija, ndi muswè kwamba nùnkù bwalu ngànùlamì ntàntà mule be. CìdìYe wàmba kaaba aka ncinyì? "Nekùlwe ditùkù diikalà lukòngò lwà beena lwonji ne beena masandi," (Mpindyewu

vùlukàayi!) “Iwikalà mwà kukèba cimanyinu. Ne elu ndukòngò lwà beena lwonji ne beena masandi.” Ki Yèyè kwamba ne: “Lukòngo alu nelùpetè cimanyinu.” Tàngilàayi nùmonè mùdìci cìkùmbanangana ne bikwàbò byònsò byà mu Bible, cimanyinu cyà Yona aci. “Yona ùvwa mu difù dyà mushipa wà bàlenà munda mwà matùkù àsàtù a muunyà ne a bufùku; ki mùdì kàbìdì Mwànà wa muntu ne cyà kwikala mu difù dyà—dyà buloba matùkù àsàtù a muunyà ne a bufùku.” Neciikalè cinyi? Cimanyinu cyà dibìikà dyà ku lufù. Nwamònu anyi? Cimanyinu cyà dibìikà dyà ku lufù necyènjiibwè mu lukòngò lwà beena lwonji ne beena masandi, ne cyàkenzeka mu Mukàndà wà Byenzedi. Yesù wàkabiika ku bafwè, wàkabwela mu Peetèlò, Yakòbò, ne Yone, ne bàpostòlò, ne bóbò bàakenza Mukàndà wà Byenzedi ewu (kabìvwa byenzedi byà bàpostòlò to), bìvwa byenzedi byà Nyumà Mwìmpè ùkwàcila mudimu *mu* bàpostòlò.

³⁷⁰ Ki mmuntu leelù ewu to; n’Nyumà Mwìmpè ùkwàcila mudimu munda mwà muntu, anyi mwà bantu, nwamònu’s, ngudi ukwata mudimu. Ki mmuntu awu to; muntu yèyè ùdì anu dibùngù cyanàànà, nwamònu’s, kàdi Nyumà Mwìmpè m’Maanyi àdì mu dibùngù adi. Nwamònu anyi?

³⁷¹ Kàdi tàngilàayi cyàkenzàbò, tàngilàayi bimanyinu byàkenzàbò byà Yesù abi. Byàkakèngela bwà bóbò kubàbàngidila bwalu... Bàvwa—bàvwa bapangi, kabàyi bamanyè mukàndà to, Peetèlò ne Yone. Kàdi byàkakèngela bwà bóbò kubàbàngidila ne, bàvwa ne Yesù! Bàvwa bènza bintu byàkenzàYe abi. Pa nànkù, nudi numòna’s, Mukàndà wònsò mu Bible, yònsò... Mikàndà yìnaayi ayi, Èvànjeeliyò yìnaayi ayi yìdì yilama Dibènesha dyà Mpenta pàmwè ne Mufundu wònsò bwà kutwà ànu menemene cyàkambàbò nyama ku mikòlò. Nènku mpindyewu Byenzedi byà bapostòlò bìdì bishindika leelù ewu pàmwè ne Èvànjeeliyò yìnaayi ayi ne Yesù Kìlistò ùdì umwèumwè awu makèèlèlè, leelù, too ne kashidi. Nudi baMunangè anyi?

Bàvwa badisangishe mu cibambalu cyà kuulu
aci,
Bònsò munkaci mwà kusambila mu Dìna
Dyèndè,
Babàtìjìibwe ne Nyumà Mwìmpè,
Ne bukolè bwà mudimu kulwabù;
CyàkabènzèlèYe bóbò ditùkù adi aci
Yèyè neàkwenzèlè byà mwomùmwe,
Mémè ndi nsànka be mùndì mwà kwamba ne
ndi umwe wabò.

³⁷² Ngànji ngwimbe:

Bàvwa badisangishe mu cibambalu cyà kuulu,
Bònsò munkaci mwà kusambila mu Dìna
Dyèndè,

Babàtìjìibwe ne Nyumà Mwímpè,
 Ne bukòlè bwà mudimu kulwabù; (Ki cìdì
 cìtùkèngelà leelù ewu ncyacì.)
 Cyàkabènzèlà Ye bòbò ditùkù adi aci
 Yèyè neàkwenzèlè byà mwomùmwè,
 Mémè ndi nsàнка be mûndì mwà kwamba ne
 ndi umwe wabò.

Bantu aba bàdi mwà kwikala kabàyi balongè,
 (Kabàyi . . . Ànu bu mùdì Peetèlò, Yakòbò, ne
 Yone amu.)
 Anyì kuditàmbisha bwà luumu lwà pa buloba,
 Mbapètè bònso Mpenta wabò,
 Babàtìjìibwe mu Dìná dyà Yesù;
 Ne bàlondelangana leelù, ne kule ne ku nseke,
 Bukòlè Bwèndè bùcìdì ànu bùmwèbùmwè abu,
 (Bùmwèbùmwè abu ànu mwàkadìbu amu.)
 Mémè ndi nsàнка be mûndì mwà kwamba ne
 ndi umwe wabò.

Ndi umwe wabò, ndi umwe wabò,
 Mémè ndi nsàнка be mûndì mwà kwamba ne
 ndi umwe wabò.

Umwe wabò, ndi umwe wabò,
 Kaa, mémè ndi nsàнка be mûndì mwà kwamba
 ne ndi umwe wabò.

Kaa, lwâyi, bânà bèètù wanyì, kèbaayi
 dibènesha edi
 Dyàkezulà mwoyi wèbè ku mpèkaatù,
 Dyàbangà kudidisha tungonga twà disàнка
 Ne dyàlamà musùùkà wèbè wùlàkuka kapyà;
 Kaa, ki kulàkukadi kapyà mu mwoyi wanyì
 eku,
 Kaa, butùmbi kùdì Dìná Dyèndè,
 Mémè ndi nsàнка be mûndì mwà kwamba ne
 ndi umwe wabò.

Umwe wabò, umwe wabò,
 Mémè ndi nsàнка be mûndì mwà kwamba ne
 ndi umwe wabò; (Àlèluuyàh!)
 Umwe wabò, ndi umwe wabò,
 Mémè ndi nsàнка be mûndì mwà kwamba ne
 ndi umwe wabò.

³⁷³ [Katùpà kàà mukàbà wà mèyi munda mutupù—Muf.]
 Cìdì cìseeswisha bantu bààbùngì be. Bàdi . . . Bantu bààbùngì
 pambèlu apa mu mùsèèsù emu bàtù bàya mu èkèleeziyà, mbàà ku
 màèkèleeziyà, bàdi bàseeswishiiibwa mwàkaseeswishiiibwà Evà
 ku cibangidìlu amu. Kí mbamanyè cìdì bwalu to.

³⁷⁴ Kaa, lwàku wàngatè Mucì wà Mwoyi! Mpindyewu, pamutù
 pàà Bakèlùbà . . . Mpindyewu, ndi njinga kwamba cintu

kampànda. Pamutù pàà Bakèlùbà abu kulamabò Nkwasa wa butùmbi ewu, bàdi kaaba aka munkaci mwà kukèba, bàteeta bwà kutùma bantu, kubàlama ku Nkwasa wa butùmbi, bàteeta bwà kubàpicishila ku ciibi, kubààluja cyàkàbìdì ku Muci wà Mwoyi bwà bààmòna mwà kwangata Eci. Yesù wàkamba ne: “Mémè ndi Dyàmpà dyà Mwoyi didi difùme kùdì Nzambì mu Dyulu. Ewu udi udyà Mubidi Wànyì ne ùnwa Mashì Àànyì ùdì ne Mwoyi wà Cyendèlèlè ne Nèmmubiishè ku lufù ku ditùkù dyà ndekeelu.” Ncyà bushùwà. Kaa, ndi nsànka be!

³⁷⁵ Mbanganyi bàdi bàsaamà mu cibambalu emu? Tùmonààyìbì byanza byènu, elààyì byanza muulu. Èyo. Mbanganyi bàdi bapetè. . . . Aci cidi. . . . Mvwa—mvwa muumvwè Billy bimpè anyi? Ùdì penyì? Mmwabànye twartà twà disambila anyi? Uvwà. . . ? [Katùpà kàà mukàbà wà mèyì munda mutupù—Muf.] Èyo, nganyi udi mupetè. . . [Katùpà kàà mukàbà wà mèyì munda mutupù.]

³⁷⁶ Mpindyewu, tàngilààyi mu nùнку, nwènù bònso. Mpindyewu, bìdì ànu bu mùdìbì pàdìci cilwa mwinshì mwà Butùmbi kaaba aka, nwamònu's. Nwamònu anyi? Nwamònu anyi? Cìdì cilwa. . . M'Bukènkè lwà kuulu eku. Nudi nwendakeena mwab'ewu, nudi numòna's. Mpindyewu, tàngilààyi, cidi ànu—cidi ànu ndidileeja dyà mu cimfwànyì, ànu didileeja dyà mu cimfwànyì, ki cidici, nwamònu's. Kì m'Bukènkè abu to. Bukènkè abu's nyewù bulembèlèlè kaaba aka mene, nwamònu's, kaaba aka mene kùdì mukàjì ewu. Mbyenzèkè ànu ne mBùbakulè ne mvwa ngeela meeji ne Bùvwa kumutù kwà muntu kampànda's.

³⁷⁷ Mpindyewu, nudi numòna bùmwè kàdi mémè mmòna àbìdì. Bùmwè bwà ku wòwò mbwà mu bufùki, ne Bukwàbò n'Citàmbe-mfùkìlu. Kùdì muntu musòmbe pambèlu apa, mu mulongo ewu mutàngile ku Bukènkè bwàbwa. M'Bumulengè. Ngwa ku Seymour, mu Indiana, ne ùdì ne. . . ùvwa mupetè dipàtakana dyà mashi mu bwongò. Bu wèwè mwà kwitabuuja, mukalenge, Nzambì nèakwondòpè dipàtakana dyà mashi mu bwongò adi. Amen! Itàbùjùjà mpindyewu!

³⁷⁸ Udi witabuuja ne mwoyi wèbè wònsò anyi? Nènku bu Mukalenge Nzambì, Mufùki wa mauulu ne buloba, mwà kwenza ne mémè ngènzèku cintu kampànda bwà kukujaadikila ne n'Nzambì, dìbà adi newitabuuje ne mwoyi wèbè wònsò anyi? Disaamà dyèbè—dyèbè ndisaamà dyà dibinduluka dikèba kùdì dì—dì—dibènga kuya ku mashi. Udi witabuuja ne Nzambì nèakwondòpè anyi? Nànsha wèwè kwèna wa muneemu to.

³⁷⁹ [Katùpà kàà mukàbà wà mèyì munda mutupù—Muf.] . . . lutàtù lwèbè lùdì cinyi? Nènku, mu kwenza kwà nàнку ne, Yèyè mmufwànyìne kukusàngaja anyi? [Katùpà kàà mukàbà wà mèyì munda mutupù.] . . . mmufwànyìne kukusàngaja, bwalu kí ngwèwè udi muswè kusàngajibwa to, mmwanèèbè wa balume.

Nwamònu anyì? Yéyè awu ùdi mu Virginie. Udi witabuuja ne ndi mwà kukwambila cìdì cìmutàcisha, ku dikwàcisha dyà Nzambì anyì? Ùdi ne byùjà. Aci ncyà bushùwà. Ne kùdi cikwàbò cintu cìdì cìmutàcisha, kì mmusùngìdìibwe to. Nènku yéyè ngùdì usambidila. Mpindyewu, Màndàmù Baker, alùkilaaku ku Somerset ne itàbùùjà ne mwoyi wèbè wònsò, Yesù Kilstò neàmwondòpè. [Katùpà kàà mukàbà wà mēyì munda mutupù.] . . .? . . .kukusàngàja, udi uMwitaba bu Mwondopi webè anyì? Bu nwènù mwà. . .[Katùpà kàà mukàbà wà mēyì munda mutupù.] . . .mwondopi. Pòlò wàkamba musangu kampànda ne. . . [Katùpà kàà mukàbà wà mēyì munda mutupù.]

³⁸⁰ Batèèleji aba bàdì batèèlèje ne ntèmà yònsò too ne dîbà ditùkaadi edi mu ditùkù, Mukalenge, mpindyewu, Mukalenge Nzambì, ndi ndòmba bwà luse ne bwìmpè Bwèbè bìikalèku pambidi pààbò.

³⁸¹ Sàtaanà, ndi nkwela kadyòmbò mu Dîná dyà Yesù Kilstò, pàtukà mu bantu aba! Mbashààle bwà kutèèleja Èvànjeeliyò. Kwèna mwà kubàpangisha kàbìdì to. Bukolè bwà dyabùlù bùdì buswike bantu aba, bùùmukè!



BWAKABUULWIBWÀ, NSHAPÌTÀ MWINÁYÌ CITÙPÀ III LUA61-0108
(Revelation, Chapter Four Part III)

DILONDANGANA DYÀ MALONGESHA PA DIBUULUDIBWA DYÀ YESÙ KILISTÒ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu dilòlò, mu matùkù 8 a ngondo wa kumpàla, cidimu cyà 1961, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêtù ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org